

Números

On israelitas okimpojkej ne Sinaí

1 ¹Ipan on achtoj tonajli de on ika ome metstli ijkuak ye kipiyya ome xipan ika on israelitas okiskej Egipto, toTEKO okinots Moisés ne xalpatlajkan Sinaí. Okinots ipan on tabernáculo* kampa nemi Dios, niman okijlij: ²⁻³“Xkimpouakan nochimej on israelitas yejuan ye kipiyyaj sempoajli xipan para tlakpak yejuan uelis yaskej ken soldados ipan on guerra. Xkijkuilokan itoka cada se, niman itoka itataj, niman itoka iclan*. Xkimpouakan keskimej nemij, niman Aarón ma mechpaleui. ⁴No ijki, mechpaleuis sen tlayekanki de cada tribu* yejuan kisas itech Israel, yejuan no tlayekanki itech sen clan.”^a
⁵⁻¹⁵Nikan onkaj imintoka on tribus niman imintoka intlayekankauan on tribus:

Tribu

Rubén
Simeón
Judá
Isacar
Zabulón
Efraín,

Manasés,

Benjamín
Dan
Azer
Gad
Neftalí

Tlayekanketl

Elisur, itelpoch Sedeur
Selumiel, itelpoch Zurisadai
Naasón, itelpoch Aminadab
Natanael, itelpoch Zuar
Eliab, itelpoch Helón
itelpoch José Elisama, itelpoch
amiud
itelpoch José Gamaliel, itelpoch
Pedasur
Abidán, itelpoch Gedeoni
Ahiézar, itelpoch Amisadai
Pagiél, itelpoch Ocrán
Eliasaf, itelpoch Reuel
Ahira, itelpoch Enán

¹⁶In yejuamej katkaj on tlayekankej intech on tribus yejuan kisasj itech Israel niman yejuan okintlapejpenijkej itech cada clan.

a 1.4 Tribe means: Several clans which come from just one forfather.

¹⁷Moisés iuan Aarón iminuan in tlayekankej, ¹⁸okiminnotskej nochimej on israelitas para ma nosentlalikan ipan on achtoj tonajli kampa ika ome metstli. Kemaj okimpojkej niman okimijkuilojkej imintoka nochimej on israelitas yejuan tlakamej de sempoajli xipan para tlakpak. Cada se okijkuilojkej akinon tlayekanki ipan iclan* niman akinon tajtli ipan cada familia. ¹⁹Moisés okimpou on israelitas ipan on xalpatlajkan Sinaí ijkon ken toTEKO okinauatij.

²⁰⁻⁴³Moisés, Aarón niman on majtlaktli uan ome tlayekankej otlankej kinmijkuilouaj intoka nochimej on israelitas. Cada se okijkuilojkej itech tlen tribu* ualeua, akinon tleyekanki ipan iclan, niman akinon tajtli ipan cada familia. Ichkich in okimpojkej yejuan kipiyayaj sempoajli xipan para tlakpak yejuan ueliskej yaskej ken soldados ipan guerra:

| Tribus | Tlapouajlotl |
|--------------------------|---------------------|
| Rubén, iyenkuiyou Israel | 46,500 |
| Simeón | 59,300 |
| Gad | 45,650 |
| Judá | 74,600 |
| Isacar | 54,400 |
| Zabulón | 57,400 |
| Efraín, itelpoch José | 40,500 |
| Manasés, itelpoch José | 32,200 |
| Benjamín | 35,400 |
| Dan | 62,700 |
| Azer | 41,500 |
| Neftal | 53,400 |

⁴⁴In yejua ichkich okis de on tlapouajli yejuan okichijkej Moisés, Aarón niman se tlayekanki itech cada tribu* yejuan no tlayekanki itech iclan. ⁴⁵Nochimej on israelitas yejuan yokajxitijkej sempoajli xipan para tlakpak yejuan ueliskej yaskej ken soldados ipan guerra, ⁴⁶katkaj 603 mil 550.

On Levitas xokimpojkej

⁴⁷On levitas xokimpojkej iminuan on oksekimej israelitas, ⁴⁸pampa toTEKO ijkin okinauatij Moisés: ⁴⁹“Ijkuak tikimpouas on israelitas, maka tikimpouas iuejyakoneuan Leví. ⁵⁰On levitas xkinmaka tekintl ipan tabernáculo* kampa onkaj on yekcaja, niman nochi on tlajtlamach* yejuan ompa notekitiltia ipan on tabernáculo. Ijkuak nenyaskej oksekan, on levitas yejuamej intekiu yes para kiktiskej notabernáculo niman nochi on tlajtlamach* yejuan ijtik notekitiltia. Niman on levitas kitelketsaskej

iminkajkal iyeualkan on tabernáculo. ⁵¹Niman ijkuak kiktiskej on tabernáculo, yejuamej kixoxotoniskej. Niman ijkuak nemajsiskej oksekan, oksejpa yejuamej kisasaloskej on tabernáculo* ken onkatka. Pero tla yakaj yejuan xlevita kinisiuis on tabernáculo* kampa ninemi, ika onkaj kimiktiskej. ⁵²Nochimej on oksekimej israelitas nochachantiskej ken soldados cada se ipan icampamento, niman ika ibandera. ⁵³On levitas kitelketsaskej iminkajkal iyeualkan on tabernáculo* kampa onkaj on yekcaja yejuan kipiya on pacto*. Yejuamej kitlajpiyaskej on tabernáculo* para maka san akinon kalakis niman nikualanis intechkopa on israelitas.”

⁵⁴On israelitas okichijkej nochi ken toTEKO okinauatij Moisés.

Cada tribu* okititijkej kanon kitlalis icampamento

2 ¹ToTEKO okijli Moisés iuan Aarón in tlanauatiltin: ²“On israelitas nochachantiskej uejkatsin de iyeualkan on tabernáculo* kampa nejua ninemi. Cada se nokauas itech ibandera iclan* niman itech ibandera itribu*.

³⁻⁸Kampaka ikisayan tonaltsintli de on tabernáculo, nochachantiskej on yeyimej tribus yejuan kiktiskej ibandera Juda. Nikan onkaj imintoka on tribus niman imintoka intlayekankauan on tribus:

| Truibus | Tlayekankej | Tlapoualtin |
|----------------|------------------------------|--------------------|
| Judá | Naasón, itelpoch Aminadab | 74,600 |
| Isacar | Natanael, itelpoch Zuar | 54,400 |
| Zabulón | Eliab, itelpoch Helón | 57,400 |

⁹Ijkin notekpanaskej on yeyi tribu* yejuan kitokaskej ibandera Juda. Yejuamej nemij 186 mil 400 yejuan tlakamej, niman in yeyi tribu* yejua achtoj kisas ijkuak yaskej. ¹⁰⁻¹⁵Kampaka sur de on tabernáculo, nochachantiskej on yeyi tribus yejuan kiktiskej ibandera Rubén. Nikan onkaj imintoka on tribus niman imintoka intlayekankauan on tribus:

| Tribu | Tlayekankej | Tlapoualtin |
|--------------|---------------------------------|--------------------|
| Rubén | Elisur, itelpoch Sedeur | 46 mil 500 |
| Simeón | Selumiel, itelpoch Zurisadai | 59 mil 300 |
| Gad | Eliasaf, itelpoch Reuel | 45 mil 650 |

¹⁶Ijkin notekpanaskej on yeyi tribu* yejuan kitokaskej ibandera Rubén. Yejuamej nemij 151 mil 450 yejuan tlakamej, niman in yeyi tribu* yejua ika ome kisas ijkuak yaskej.

¹⁷Kemaj tetokaskej on levitas. Yejuamej kiktiskej on tabernáculo. Ijkon yejuamej yaskej intlajkotian on naui campamentos de on matlaktli uan ome tribus.

Yaskej tekpantiaskej ken tekpantokej kampa chantij, niman cada campamento kitokas ibandera. ¹⁸⁻²³Kampaka ikalakiyan tonaltsintli de on tabernáculo, nochachantiskej on yeyimej tribus yejuan kiktiskej ibandera Efraín. Nikan onkaj imintokaj on tribus niman imintoka intlayekankauan on tribus:

| Truibus | Tlaekankej | Tlapoualtin |
|----------------|-------------------------------|--------------------|
| Efraín | Elisama, itelpoch amiud | 40,500 |
| Manasés | Gamaliel, itelpoch Pedasur | 32,200 |
| Benjamín | Abidán, itelpoch Gedeoni | 35,400 |

²⁴Ijkin notekpanaskej on yeyi tribu* yejuan kitokaskej ibandera Efraín. Yejuamej nemij 108 mil 100 yejuan tlakamej, niman in yeyi tribu* yejua ika yeyi kisas ijkuak yaskej. ²⁵⁻³⁰Kampaka norte de on yektiopan nochachantiskej on yeyimej tribus yejuan kiktiskej ibandera Dan. Nikan onkaj imintokaj on tribus niman imintoka intlayekankauan on tribus.

| Tribus | Tlayekankej | Tlapoualtin |
|---------------|-------------------------------|--------------------|
| Dan | Ahiezar, itelpoch Amisadai | 62,700 |
| Azer | Pagiel, itelpoch Ocrán | 41,500 |
| Neftalí | Ahira, itelpoch Enán | 53,400 |

³¹Ijkin notekpanaskej on yeyi tribu* yejuan kitokaskej ibandera Dan. Yejuamej nemij 157 mil 600 yejuan tlakamej, niman in yeyi tribu* yejua sa ika nochi kisas ijkuak yaskej.”

³²On tlapouajli kijtousa keskimej tlakamej katkaj intech on chanejkej israelitas yejuan okimpojkej nochimej yejuan ueliskej yaskej ken soldados ipan guerra. Ichkichin onoteketsato on tlapouajli: 603 mil 550 tlakamej. ³³Pero on levitas xteuan okimpojkej ijkon ken toTEKO okinauatij Moisés. ³⁴On israelitas okichijkej nochi ken toTEKO okinauatij Moisés. Ijkon tej, cada

tribu* onochachantijkej itech iminbandera ken okinmijlijkej. Niman ijkuak nejnemiyaj, yayaj cada se iuan iclan* niman iuan ifamilia.

Intekiu on levitas

3 ¹Ipan on tonaltin ijkuak toTEKO okinots Moisés ipan on tepetl Sinaí, ikoneuan Aarón niman ikoneuan Moisés yejuamej in katkaj: ²Ikoneuan Aarón katkaj: Nadab yejuan yenkuiyotl, Abiú, Eleazar, niman Itamar. ³In nauimej okinkuatekijkej ikan aceite para okinmakak tekiuajyotl ken tiopixkej. ⁴Pero Nadab niman Abiú omikkej ixpan toTEKO pampa ipan on xalpatlajkan Sinaí xokitlakamatkej itlajtoltsin toTEKO pampa yej okitekiltijkej sen tlitl yejuan Dios xokinnauatij ma kikuikan. Yejuamej xokipixkej inkoneuan. Niman Eleazar iuan Itamar okichijkej on tekittl de tiopixkej niman Aarón imintataj kintitiaya ken tekitiskej.

⁵ToTEKO okinots Moisés niman okijlij: ⁶“Xkimijli on iuejkakoneuan Leví ma uajlakan itech Aarón para kipaleuiskej. ⁷Yejuamej kipaleuiskej Aarón niman tekitiskej impampa nochimej on israelitas ipan on tabernáculo* kampa ninemi. Niman yejuamej kichiuaskej nochi on tekittl yejuan noneki ipan on tabernáculo. ⁸Cuidaroskej nochi on tlajtlamach* yejuan onkaj ijtik on tabernáculo* kampa nejua ninemi. Yejuamej tekitiskej impampa on israelitas, kichiuaskej nochi on tekittl ipan on tabernáculo. ⁹Xkinxelo on levitas de intech on oksekimej israelitas para on levitas san ika nokauaskej kipaleuiskej Aarón, niman ikoneuan. ¹⁰Niman xkinkauili Aarón niman iuejkakoneuan^b on tekittl de tiopixkej. Tla yakaj tlakatl yejuan xtiopixki kinakis kichiuas on tekittl ken sen tiopixki, ika onkaj nenkimiktiskej.”

On Levitas teyaxkauan* itech toTEKO

¹¹ToTEKO okinots Moisés niman okijlij: ¹²“Intech nochimej on israelitas yonikintlapejpenij on levitas, pampa inka onikimpatlak on yenkuiyomej israelitas. Yejuamej noyaxkauan ¹³pampa nejua noyaxkauan nochimej on yejuan achtoj tlakatij. Ijkuak onikchiu para ma mikikan nochimej yejuan yenkuiyomej ne imanian Egipto, onikinnoyaxkatij nochimej inyenkuiyokoneuan on israelitas, niman no ijki nochimej on yolkej yejuan achtoj tlakatiskej, ye noyaxkauan. Nejua ninemoTEKO.”

Okimpojkej on levitas

¹⁴ToTEKO oksejpa okinots Moisés ipan on xalpatlajkan Sinaí, niman okijlij: ¹⁵“Xkimpoua nochimej on levitas. In tlajpouajli

b 3.10 Sekimej versiones kijtouaj “itelpochuan”.

tikchiuas por clanes* niman por familias. Xkimpoua nochimej on tlakakokonej yejuan yokaxitijkej se metstli para tlakpak.”

¹⁶Niman Moisés okichiu on tlajpouajli ken toTEKO okinauatij.

¹⁷Ikoneuan Leví katkaj: Gersón, Coat niman Merari. ¹⁸Ixuiuan Leví yejuan kisaj itech Gersón, omemej katkaj: Libni niman Simeí. ¹⁹Ixuiuan Leví yejuan kisaj itech Coat nauimej katkaj: Amram, Izhar, Hebrón niman Uziel. ²⁰Ixuiuan Leví yejuan kisaj itech Merari omemej katkaj: Mahli niman Musi.

In yejuamej clanes katkaj itech inchanejkauan Leví.

Clanes yejuan kisaj itech Gersón

²¹On clanes yejuan kisaj itech Gersón katkaj omemej, Libni niman Simeí. ²²Nochimej on tlakamej yejuan okinmijkuilojkej de se metstli para tlakpak katkaj 7 mil 500. ²³Yejuas in omemej clanes onochachantijkej ikuitlapan on tabernáculo* kampa ikalakiyan tonaltsintli. ²⁴Eliasaf, itelpoch Lael, onochiu tlayekanketl itech on clanes yejuan kisaj itech Gersón.

²⁵Yejuamej imintekiu katka para cuidarouayaj on tabernáculo* kampa ninemi, on ome tlanepantli tlakuapachojli de kuetlaxtli, on cortina yejuan kipilouaj ipan ikalakiyan on tabernáculo, ²⁶on cortinas yejuan ika kitsakuaj ikiauak on tabernáculo, on cortina yejuan kipilouaj kampa ikalakiyan on kiauak yejuan kiyeualojtok on tabernáculo* niman on tlaixpan*, niman nochi mekatl yejuan kitekitiltiaj ipan on tabernáculo.

On clanes yejuan kisaj itech Coat itelpoch Leví

²⁷On clanes yejuan kisaj itech Coat katkaj nauimej: Amram, Izhar, Hebrón niman Uziel. ²⁸Nochimej on tlakamej yejuan kipiayaj se metstli para tlakpak katkaj 8 mil 600. In yejuamej tlcuidarouaya ipan on tabernáculo. ²⁹Yejuamej onochachantijkej kampa Sur nisiu on tabernáculo. ³⁰Elizafán, itelpoch Uziel, onochiu tlayekanketl itech iclanes Coat. ³¹In clanes yejuamej kipiayaj tlanauatijli para cuidaroskej on yekcaja, on mesa para pan, on lámpara, on tlaixpan* kampa kitlaliayaj para kopajli, on tlaixpan* para uentli yejuan nochi tlatla, nochi on tlajtlamach* yejuan notekitiltia ijtik on tabernáculo, on yekcortina niman nochi on tlajtlamach* yejuan ompa notekitiltia.

³²Eleazar, itelpoch on tiopixki Aarón, yejuas onochiu tlayekanketl más ueyixtikatka de nochimej on levitas. Yejuas kintekimakaya on levitas yejuan tlapaleuiyayaj ijtik on tabernáculo.

On clanes yejuan kisaj itech Merari itelpoch Leví

³³On clanes yejuan kisaj itech Merari omemej katkaj: Mahli niman Musi. ³⁴Nochimej on tlakamej yejuan kipiayajaj, se

metstli para tlakpak katkaj 6 mil 200. ³⁵Zuriel itelpoch Abihail, onochiu tlayekanketl itech iuejkakoneuan Merari, niman onochachantijkej kampaka Norte ika de on tabernáculo. ³⁶Niman yejuamej kipiayaj iminteki para cuidaroskej on kojtsatsastin, on tlapalokojtin, on kuamantin, on tsintlatoktin, niman nochi on tlajtlamach* yejuan ompa notekitiltia. ³⁷No kincuidarouayaj on kuamantin yejuan kintlalijayaj iyeualkan on kiauak iuan intsintlatokyo, iminestacas niman on iminmekayouan.

³⁸Moisés, Aarón niman itelpochuan Aarón onochachantijkej nisiu ixpan on tabernáculo* kampaka ikisayan tonaltsintli. Yejuamej iminteki katka para kitlajpiyayaj nochi on tabernáculo* impampa on israelitas. Pero tla yakaj tlakatl yejuan xtiopixki kinekiya kichiuas on tekittl ken sen tiopixki, ika onkaj kimiktiyayaj. ³⁹Ijkuak Moisés niman Aarón okimpojkej on levitas niman okinmijkuilojkej por clanes ken toTEKO okinnauatij, nochimej yejuan tlakamej yejuan kipiayaj se metstli para tlakpak katkaj 22 mil san yejuan tlakamej.

Kenijki kinkouiliskej toTEKO on yenkuiyokokonej

⁴⁰ToTEKO okijlij Moisés: “Xkimpoua nochimej inyenkuuyokoneuan on israelitas yejuan tlakamej de se metstli para tlakpak, niman xkijkuilo imintoka. ⁴¹Xnechinmaxkati on levitas para ika tikimpatlas inyenkuuyokoneuan on israelitas. No ijki, para tikimpatlas inyenkuuyokoneuan inyolkauan on israelitas, xnechinmaka inyolkauan on levitas. Nejua ninemoTEKO.”

⁴²Ijkon tej, Moisés okimpou inyenkuuyokoneuan on israelitas ken toTEKO okinauatij. ⁴³Nochimej on yejuan tlakamej de se metstli para tlakpak okimpojkej 22 mil 273. ⁴⁴ToTEKO okinots Moisés niman okijlij: ⁴⁵“Xnechinmaka nochimej on levitas para ika xkimpatla inyenkuuyokoneuan on israelitas, niman inyolkauan on levitas ika xkimpatla inyenkuuyokoneuan inyolkauan on israelitas, niman ijkon on levitas noyaxkauan yeskej. Nejua ninemoTEKO. ⁴⁶Pero inyenkuuyokoneuan on israelitas más miyekej xken on levitas. Ijkon tej, para nomanauiskej on 273 yenkuuyomej yejuan onokajkej, ⁴⁷xtlajtlanili cada tajtli israelita ma kitlaxtlaua ipampa iyenkuuyokoneu makuijli tepostomin de plata yejuan kipiya majtlaktli uan se gramos ika yetik, ijkon ken kitlajtlanj ipan on tabernáculo. ⁴⁸Niman on tomin xmaka Aarón niman itelpochuan para ika tikinmanauis on oksekimej 273 yenkuuyomej.”

⁴⁹Moisés okisentlalij on tomin yejuan ika okintlaxtlajkej para oquinmanauijkej on oksekimej yenkuuyomej israelitas yejuan onokajkej. ⁵⁰Niman okisentlalij se mil 365 tomin de plata, ijkon

ken kitlajtlanij ipan on tabernáculo. ⁵¹Kemaj Moisés okimakak Aarón niman itelpochuan nochi on tomin ken toTEKO okinauatij.

Itekiu iclan* Coat

4 ¹ToTEKO okinots Moisés iuan Aarón, niman okinmijlij: ²“Xchiuakan poualistli itech iuejkakoneuan Leví niman xpeuakan ika ikoneuan Coat. Cada se xkijkuilokan itech katlejua clan* ualeua niman akinon tajtli ipan cada familia. ³Xkimpouakan nochimej on tlakamej yejuan kipiay 30 xipan hasta 50 xipan yejuan ueliskej tekitskej ipan on tabernáculo* kampa nejua ninemi.

⁴On tekittl yejuan kichiuaskej iuejkakoneuan Coat sanoyej tlatiochijitli. Niman in yejua on tekittl yejuan kichiuaskej: ⁵Ijkuak on israelitas nejkuaniskej, Aarón niman itelpochuan kitemoltiskej on yekcortina yejuan pilkak ijtik on tabernáculo* kampa Más Tlayekkan, niman ika kitlapachoskej on yekcaja yejuan kipiya on pacto*. ⁶Kemaj tlapani kitlapachoskej ikan kuetlaxtin yejuan más kualtsitsimej. Niman más tlapani kisouiliskej sen tela morada yejuan san se patlauak. Kemaj kintlaliliskej on kojtin* ueueyakej para ika kechpanojtiaskej.

⁷Niman no kisouaskej sen tela morada ipan on mesa kampa kitlaliaj pan yejuan kiteititia ika ninemi nemouan. Niman ipan on tela kintlaliskej platos, niman cucharas yejuan uejueyimej, on copas niman on jarras yejuan kitekitiltiaj ijkuak kitoyauaj uentli yejuan de vino. No ijki, ompa kitlaliskej on pan yejuan nochipa kitlaliaj ipan on mesa. ⁸Niman tlapani de nochi on tlajtlamach*, kisouaskej sen tela chichiltik. Kemaj más tlapani kisouiliskej kuetlaxtin yejuan más kualtsitsimej, niman kintlaliliskej on kojtin* ueueyakej para ika kechpanojtiaskej.

⁹Kemaj kuiskej sen tela morada niman ika kitlapachoskej on lámpara, on itlauiluan, on tepostlakitskijli, on iplatitos, niman nochi on vasos yejuan kintekitiltiaj para on aceite. ¹⁰Nochi on tlajtlamach* kitlapachoskej ikan kuetlaxtin yejuan más kualtsitsimej niman kitlaliskej ipan sen kojtlapechtli para ika kiktiskej

¹¹No kisouaskej sen tela morada ipan on tlaixpan* de oro kampa kitlatiaj kopajli. Kemaj kitlapachoskej ika kuetlaxtin yejuan más kualtsitsimej niman kintlaliliskej on kojtin* ueueyakej para ika kechpanojtiaskej. ¹²Kemaj, nochi on tlajtlamach* yejuan notekitiltia ijtik on tabernáculo* kinsentlaliskej niman kintlaliskej ipan sen tela morada. Kemaj kintejkuiyaskej ikan kuetlaxtin yejuan más kualtsitsimej niman kinsaloskej. Kemaj kintlaliskej ipan sen kojtlapechtli para ika kiktiskej.

¹³On tlaixpan* yejuan de bronce, kixtiliskej on tlikonextli iuan on chauak. Niman kemaj kisouiliskej sen tela morada. ¹⁴Niman

tlapani kitlaliskej nochi on tlen notekitiltia ipan on tlaixpan*, on tepostli yejuan ipan kitemaj tlixochtli, on teposchijkolmej para kitskiskej nakatl, on teposxopiltin, niman on uajkaltin kampa kajsij yestli, niman nochi on sekimej tepostin yejuan ompa notekitiltiaj. Nochi on kitlapachoskej ikan kuetlaxtin yejuan más kualtsitsimej, niman kintlaliskej ipan kojtlapechtli para ika kechpanojtiaskej. ¹⁵Ijkuak Aarón niman itelpochuan yotlankej kitlapachouaj nochi on tlajtlamach* yejuan tlatiochijtli, niman ijkuak nochimej on israelitas ye nemiskej listas para yaskej, uajlaskej iuejkakoneuan Coat para yejuamej kiktiskej in tlajtlamach*. Pero yejuamej xuelis kitskiskej on tlajtlamach* tlatiochijtli, pampa tlamo mikiskej. Nochi in tlajtlamach* yejuan notekitiltia ipan on tabernáculo, kintocaroua kiktiskej iuejkakoneuan Coat.

Itekiu Eleazar itelpoch Aarón

¹⁶ Eleazar, itelpoch on tiopixki Aarón, notekiutis ika on aceite para tlauiltin, on kopajli yejuan ajuiyak, on uentli de trigo noso cebada yejuan nochipa nechuentlaliliskej, niman on aceite yejuan ika tlatiochiuskej. No ikij Eleazar tlayekanas ipan nochi on tlen nochiuas ipan on tabernáculo, ipan nochi tlen ompa onkaj niman nochi on tlajtlamach* tlatiochijtin yejuan ompa notekitiltia.”

¹⁷ToTEKO okinots Moisés iuan Aarón, niman okinmijlij:

¹⁸“Kuajli xkincuidarokan iclanes Coat para maka mikiskej niman popoliuiskej intech iuejkakoneuan Leví pampa tla kimatokaj on tlajtlamach* yejuan tlatiochijtin uelis mikiskej. ¹⁹Para maka kiseliskej castigo ikan mikilistli tla kimatokaskej on tlajtlamach* yejuan tlatiochijtli, noneki ijin kichiuaskej: Aarón niman itelpochuan kijliskej cada se tlinon kichiuas niman tlinon kiktis ²⁰para ijkon yejuamej xkaman onkalakiskej ipan on tabernáculo* para kitaskej on tlajtlamach* yejuan sanoyej tlatiochijtli niman ijkon yejuamej xmikiskej.”

Itekiu iclan* Gersón

²¹ToTEKO okinots Moisés niman okijlij: ²²“No ijki, xkimpouakan iuejkakoneuan Gersón. Cada se xkijkuilokan katlejua clan* itech ualeua niman akinon tajtli ipan cada familia. ²³Xkimpouakan nochimej on tlakamej yejuan kipiay 30 xipan hasta 50 xipan yejuan ueliskej tekitiskej ipan on tabernáculo* kampa nejua ninemi.

²⁴In yejua yes inteki iuejkakoneuan Gersón: ²⁵Yejuamej kimiktiskej on cortinas yejuan kimpilouaj ipan on tabernáculo. No kiktiskej on tabernáculo* kampa ninemi, on ome tlanepantli tlakuapachojli de kuetlaxtli niman on cortinas yejuan kipilouaj

kampa ikalakiyan on tabernáculo* kampa nejua ninemi. ²⁶No ijki, kiktiskej on cortinas yejuan kimpilouaj kiauak, yejuan ika yeualsakutikaj on tabernáculo* niman on tlaixpan*. No ijki, kiktiskej on cortina yejuan kipilouaj ipan ikalakiyan on kiauak, on mekamej, niman nochi on tlajtlamach* yejuan kitekitiltiaj ijkuak kintlalaj on cortinas. In yejua yes intekiu iuejyakoneuan Gersón. ²⁷Aarón niman itelpochuan kinyekanaskej iuejyakoneuan Gersón ipan on tekintl yejuan kichiuaskej niman ika on tlajtlamach* yejuan kiktiskej.

Itekiu iclan* Merari

²⁸In yejua tekintl kichiuaskej on iclanes niman iuejyakoneuan Gersón ipan on tabernáculo, niman ipan in tekintl kiyekanas Itamar itelpoch Aarón.

²⁹No ijki, xkimpoua iuejyakoneuan Merari. Cada se xkijkuilokan itech katlekua clan* ualeua niman akinon tajtli ipan cada familia. ³⁰Xkimijkuilo nochimej yejuan kipiayaj 30 xipan hasta 50 xipan yejuan ueliskej tekitiskej ipan tabernáculo* kampa nejua ninemi. ³¹Imintekiu ipan on tabernáculo* yes: Kiktiskej on kojtsatsastin de on tabernáculo, on tlapalokojtin, on kuamantin niman intsintlatokyo. ³²No kiktiskej on kuamantin yejuan ika kitsakuaj on kiauak iyeualkan on tabernáculo* niman intsintlatokyo, estacas, inmekayouan niman nochi on tlajtlamach* yejuan kitekitiltiaj ijkuak kitelketsaj on tabernáculo. Tejua Moisés tikijlis cada tlakatl tlinon kiktis ijkuak nemejkuaniskej. ³³In yejua tekintl yes yejuan kichiuaskej iclanes Merari ne ipan on tabernáculo* kampa nejua ninemi, niman Itamar, itelpoch on tiopixki Aarón, yejua kinyekanas.”

³⁴Moisés iuan Aarón niman nochimej on tlayekankej itech on israelitas okimpojkej. Okimpojkej inuejyakoneuan Coat niman okimijkuilojkej itech katlejua clan* ualeuaj niman akinon tajtli ipan cada familia. ³⁵Okimpojkej yejuan kipiayajaj 30 xipan hasta 50 xipan niman yejuan ueliskej tekitiskej ipan on tabernáculo* kampa nemi Dios. ³⁶Niman nochimej on tlakamej yejuan okimijkuilojkej katkaj 2mil 750. ³⁷In yejua tlapouajli de iuejyakoneuan Coat yejuan ueliyay tekitiyay ipan on tabernáculo* kampa nemi Dios. Moisés iuan Aarón okimpojkej niman okinmijkuilojkej ken toTEKO okinnauatij.

³⁸No okimpojkej iuejyakoneuan Gersón, niman okimijkuilojkej itech katlejua clan* ualeuaj niman akinon tajtli ipan cada familia. ³⁹Okimpojkej on tlakamej yejuan kipiayajaj 30 xipan, hasta 50 xipan, yejuan ueliskej tekitiskej ipan on tabernáculo* kampa nemi Dios. ⁴⁰Niman nochimej on tlakamej yejuan okimijkuilojkej itech katlejua clan* ualeuaj niman akinon tajtli ipan cada familia

katkaj 2 mil 630. ⁴¹In yejuamej katkaj iuejkakoneuan Gersón yejuan ueliyaj tekityaj ipan on tabernáculo* kampa nemi Dios. Moisés iuan Aarón okimpojkej niman okimijkuilojkej ken toTEKO okinnauatij.

⁴²Niman no okimpojkej iuejkakoneuan Merari. Okinmijkuilojkej itech katlejua clan* ualeua niman akinon tajtli ipan cada familia.

⁴³Okimpojkej on tlakamej yejuan kipiayaj 30 xipan hasta 50 xipan yejuan ueliskej tekitiskej ipan on tabernáculo* kampa nemi Dios.

⁴⁴Niman nochimej on tlakamej yejuan okimijkuilojkej katkaj 3 mil 200. ⁴⁵In yejua tlapouajli de iuejkakoneuan Merari yejuan ueliyaj tekityaj ipan on tabernáculo* kampa nemi Dios.

Moisés iuan Aarón okimpojkej niman okimijkuilojkej ken toTEKO okinnauatij.

⁴⁶Moisés iuan Aarón niman on tlayekankej itech on israelitas, okimpojkej nochimej on levitas. Cada se okijkuilojkej itech katlejua clan* ualeua, niman akinon tajtli ipan cada familia. ⁴⁷On yejuan okimpojkej yejuan kipiayaj 30 xipan hasta 50 xipan, yejuan ueliskej tekitiskej niman kiktiskej on tabernáculo* kampa Dios nemi, ⁴⁸katkaj 8 mil 580. ⁴⁹In tlapouajli onochiu ken toTEKO okinauatij Moisés. Cada se okijlijkej tlinon kichiuas niman tlinon kiktis ijkuak yaskej oksekan, ijkon ken toTEKO okinauatij Moisés.

On tlajtlamach* yejuan xchipauak ixpan toTEKO

5 ¹Kemaj toTEKO okinots Moisés, niman okijlij: ²“Xkinnauati on israelitas ma kinkixtikan ipan on incampamento nochimej on yejuan kimajsi on kokolistli itoka lepra, noso on yejuan ixikaj kampa tlapiasouaj, noso nochimej yejuan xchipajkej ixpan Dios pampa okimatokakej yakaj mikatsintli. ³Ma kinkixtikan ipan on campamento on tlakamej noso siamej yejuan kipiayaj on kokolistli, para ijkon xkijtlakoskej on campamento kampa iminuan ninemi.”

⁴On israelitas okitlakamatkej on tlen toTEKO okinauatij Moisés, niman okinkixtijkej nochimej on yejuan kipiayaj on kokolistli.

Tlanauatiltin para on tlen xkuajli kitechiuilij

⁵ToTEKO okinots Moisés, niman okijlij: ⁶“Ijkin xkinmijli on israelitas: Ijkuak yakaj tlakatl noso siuatl xipan nechita, niman kichiuilij yakaj tlen xkuajli, tlajtlakoua nixpan nejua nemoTEKO.

⁷On tlakatl noso on siuatl ika onkaj kinokuitis on tlen xkuajli okichiu, niman kitlaxtlauas ken kitocaroua on tlen xkuajli okitechiuilij, niman kitemakas makuijli por ciento más. ⁸Tla on tlakatl yejuan okichiuilijkej tlen xkuajli yomik niman xkipiya nion se yejuan ken kita para yejua kitlaxtlauiliskej, tla ijkon, nechtlaxtlauiliskej nejua nemoTEKO niman on tomin kimakaskej

on tiopixki. No kuajuikas sen borrego, niman on tiopixki nechmakas para ijkon kiselis tetlapojpoluulistli ipampa itlajtlakol.

⁹Nochi on tlen ika tlatlaxtlauaj noso nochi uentli yejuan nechmakaj on israelitas nejua nemoTEKO, itech nokauas on tiopixki. ¹⁰Nochi uentli yejuan nechyaxkatiaj nejua nemoTEKO, itech nokauas on tiopixkej.”

Tlanauatiltin para on chauatiltistli

¹¹ToTEKO okinots Moisés, niman okijlij: ¹²“Ijkin xkinmijli on israelitas: “ San ma tikonijtokan yakaj suatl kajkayaua iueuentsin* iuan okse tlakatl, ¹³niman iuan noteka sen tlakatl yejuan xiueuentsin. Niman iueuentsin* xkimati on tlen onochiu, pampa on suatl okichiu on tlajtlakojli san ichtaka, niman ijki onokau xkaman omachiyak pampa xakaj okitak ijkuak okichiu on tlajtlakojli. ¹⁴Tla saman ijkon nochiuaskia niman iueuentsin* peuaskia sanoyej chauati pampa kinemilia ika otlajtlakoj isiuau, noso tla saman san chauati maski tla isiuau xkipiya itlaj tlajtlakojli, ¹⁵tla ijkon, on tlakatl kuikas isiuau ixpan on tiopixki. Niman kiktis sen uentli ipampa isiuau ome kilo harina de cebada. Pero maka kitlalilis aceite nion kopajli on harina, pampa on sen uentli de harina ipampa chauatiltistli, sen uentli para kipanextis sen tlajtlakojli.

¹⁶’On tiopixki kuajuikas on suatl nixpan nejua nemoTEKO. ¹⁷Kemaj on tiopixki kikuis achijtsin tlatiochualatl ika sen tlaltekomatl, niman kitlalilis achijtsin tlalkuechtli yejuan kixtis ikalijtik on tabernáculo* ipan tlajli. ¹⁸Sakin, kichiuas para on suatl ma notelketsa nixpan nejua nemoTEKO, niman kitsonxotonis. Kemaj on tiopixki kitlalis ipan imauan on suatl on uentli de harina ipampa on chauatiltistli para kipanextis sen tlajtlakojli. Niman on tiopixki kipiayas ipan imauan on atl chichik yejuan kuajki castigo. ¹⁹Kemaj on tiopixki kichiualtis on suatl ma notlajtolmaka ixpan toTEKO niman on tiopixki ijkin kijlis: “Tla xotimotekak iuan okse tlakatl, nion xotikajkayau moueueentsin, niman tla xitlaj* otikchiu yejuan xkuajli iuan okse tlakatl yejuan ipampa xok tichopauak yeskia ixpan toTEKO, tla ijkon, xitlaj* mopan nochiuas ijkuak tikonis in atl chichik yejuan kuajki castigo. ²⁰Pero tla otikajkayau moueueentsin, tla otimotekak iuan okse tlakatl niman otikchiu tlen xkuajli, yejua ika xok tichipauak ixpan toTEKO, ²¹tla ijkon, ToTEKO ma kichiuas para mopan ma uetsi castigo imixpan nochimej on israelitas. Mosiuayo ma posau para xok uelis titlaskaltis. ²²Niman on castigo uajlas mopan, ijkuak tikonis in atl yejuan kuajki itlauelil toTEKO.” Niman on suatl kijtos: “Ma ijki nochiua.”

²³’Kemaj on tiopixki kijkuilos in itlauelil toTEKO ipan sen amamoxtli* niman kipopolos ika on atl yejuan chichik. ²⁴Kemaj

on tiopixki kichiualtis on suatI ma koni on atl yejuan uelis kuajkis on tlauelijli, niman tla on suatI kipiya tlajtlakojli, on atl yejuan konis sanoyej kitlajyouiltis. ²⁵Niman kemaj on tiopixki kiselilis on suatI on uentli de harina ipampa on chauatilstli, niman koolinis yolik nixpan nejua nemoTEKO. Kemaj kiktis on uentli ipan on tlaixpan*. ²⁶Kemaj kikuis se mapichtli on uentli de harina niman kitlatis ipan on tlaixpan*. In se mapichtli yejuan tlatla, kijtosneki ika nochi kiuentlalia on uentli yejuan okiktilijkej.

Ijkuak on tiopixki yokonitij on suatI on atl chichik, ²⁷tla yejua okajkayau iueuentsin* iuan okse tlakatl, on atl yejuan kuajki itlauelil toTEKO, kichiuas para ma kitlajyouilti on suatI niman kichiuas para isiuayo ma posaui niman para xok uelis tlaskaltis. Niman nochimej on israelitas kitaskej on castigo itech on suatI niman kimatiskej ika kipiya tlajtlakojli. ²⁸Pero tla on suatI xkipiya tlajtlakojli, xitlaj* ipan nochiuas niman uelis tlaskaltis.

²⁹In yejua tlanauatijli: Ijkuak sen tlakatl kichauatilia isiuau pampa okajkayau iuan okse tlakatl, ³⁰noso ijkuak sen tlakatl san kichauatilia isiuau maski tla xkipiya tlajtlakojli, on tlakatl noneki kuajuikas isiuau, niman on tiopixki kichiuas para on suatI ma uajla nixpan nejua nemoTEKO, niman kichiuilis ken kijtous in tlanauatijli. ³¹Iueuentsin on suatI xkipiyas tlajtlakojli, pero tla on suatI kipiya tlajtlakojli, yejua tlajyouis ika on castigo.”

Tlanauatiltin para on nazareos

6 ¹ToTEKO okinots Moisés niman okijlij: ²“Ijkin xkinmijli on israelitas: Tla sen tlakatl noso sen suatI notlajtolmaka ixpan Dios yejuan ikatlakajtli para noteyaxkatis notech nejua nemoTEKO ken sen nazareo, ³xuelis konis vino noso itlaj okse yejuan tlaxokolijli. Nion xuelis konis vinagre yejuan kichijchiuaj ikan vino, noso okse tlaonijli yejuan yokixokolijkej niman tetlauantij, nion iyayo uva. No ijki, xuelis kikuas uvas yejuan ayoj nion uvas yejuan tetsoltik. ⁴Ipan nochi on tonaltin ijkuak nazareo yes, xitlaj* kikuas yejuan kisas ipan itlakyo uvas, desde ixinachyo noso ikakauayo on uvas. ⁵No ijki, xuelis noximas, yej kinokauilis ma tsonueueyakiya, hasta tlamis on tonaltin ika yejua onoteyaxkatij notech nejua nemoTEKO. Ijkon tej, nokauas tlatiochijtlI san chika nemis ken nazareo. ⁶Niman ipan on tonaltin, xuelis yas itech sen mikatsintli, ⁷maski mikis itataj, inanaj, noso sen ikniu yejuan tlakatl, noso sen ikniu yejuan suatI. Xas para maka nijtlakos, pampa nemis teyaxkatijli notech nejua nemoTEKO. ⁸Nochi on tonaltin chika nemi ken nazareo, tlayaxkatijli yes notech nejua nemoTEKO.

⁹Tla yakaj san isijkapan mikis itech on nazareo, niman on itson ijkon ijtlakauis yejuan okiteyaxkatij, tla ijkon, noneki noximas

kampa ika chikome tonajli. In kijtosneki, nokuatexikalos ipan on tonajli ijkuak on tiopixki kitemachistis ika yochipau. ¹⁰Niman kampa ika chikueyi tonajli, kuajuikas ome pichontsitsimej, noso ome kokotetsitsimej, niman kimakas on tiopixki itech ikalakiyan on tabernáculo* kampa ninemi. ¹¹On tiopixki nechmakas se de yejuamej para uentli ipampa tlajtlakojli, niman okse nechmakas para uentli yejuan nochi tlatla. Niman in yejua kixtilis itlajtlakol pampa okiktsij sen mikatsintli. On tonajli oksejpa nechyaxkatis itson nejua nemoTEKO. ¹²Niman oksejpa peuas on tonaltin para noteyaxkatis notech nejua nemoTEKO. On tonaltin yejuan yopanok, xkipouaskej pampa on itson yejuan yonechyaxkatijka xok chipauak katka. No ijki, noneki nechuikilis sen borreguito yejuan se xijkayotl, para sen uentli pampa onijtlakoj nixpan.

¹³Niman ijkuak tlamis nochi on tonaltin ijkuak noteyaxkatis notech nejua nemoTEKO ken se nazareo, noneki yas kampa ikalakiyan on tabernáculo* kampa nejua ninemi. ¹⁴Niman nechmakas sen borreguito yejuan se xijkayotl niman yejuan xkanaj tlakokojli* ipan itlakayo para sen uentli yejuan tlatlas. No ijki, nechmakas se borreguita yejuan xkanaj tlakokojli* ipan itlakayo para sen uentli ipampa tlajtlakojli. No ijki, nechmakas sen borrego yejuan xkanaj tlakokojli* ipan itlakayo para sen uentli de yoltlalijli. ¹⁵No ijki, kiuentlalis se chikiutli pan yejuan tlachichijtl ika on harina yejuan más kuajli, niman xkipiyas tlaxokolilistli* niman tlanelojli yes iuan aceite, pan yejuan kajkanauak pero xkipiyas tlaxokolilistli* yejuan kajuichiskej ikan aceite. Iuan nochi in uentli de pan, no kiuentlalis trigo noso cebada, niman vino para kitoyauaskej ipan on tlaixpan*.

¹⁶On tiopixki kiuentlalis nixpan nejua nemoTEKO ken sen uentli ipampa tlajtlakojli niman sen uentli yejuan nochi tlatla. ¹⁷Niman nechmakas on borrego para sen uentli de yoltlalijli iuan on chikiutli ikan pan yejuan xkipiya tlaxokolilistli*. Niman no kiuentlalis uentli de trigo noso cebada niman vino para kitoyauaskej ipan on tlaixpan*.

¹⁸Kemaj on nazareo nokuatexikalos ne ikalakiyan on tabernáculo* kampa nejua ninemi, niman on itson yejuan onechyaxkatijka konchapanis ipan on tlitl kampa onkaj on uentli de yoltlalijli.

¹⁹Niman sakin*, ijkuak yonokuatexikalos on nazareo, on tiopixki kikuis ikechpannakayo on borrego yejuan iksik niman kitlalis ipan ima on nazareo iuan sen pan yejuan xkipiya tlaxokolilistli* yejuan onkaj ipan on chikiutli, niman sen pan yejuan kanauak yejuan xkipiya tlaxokolilistli*. ²⁰Kemaj on tiopixki koolinis yolik on uentli nixpan nejua nemoTEKO. Iyelpannakayo on yolki yejuan kooliniaj, niman imetskojyo

yejuan nechajkuilia, on ye tlatiochijtin niman kiyaxkatiaj on tiopixki. Niman sakin*, ijkuak nochi in yonochiu, on nazareo ye uelis konis vino.

²¹In yejua tlanauatijli para se yejuan kichiu sen promesa para noteyaxkatia notech ken sen nazareo. Yejua no uelis nechuentlalilis okseki uentli tla yejua kineki. Pero maski ijkon kichiuas, ika onkaj kintemakas on uentin yejuan yonechprometerouilijka.”

On tiopixkej kintiochuij on israelitas

²²ToTEKO okinots Moisés niman okijlij: ²³“Xkijli Aarón niman itelpochuan ika ijkuak kintiochuiaskej on israelitas, ijkin ma kijtokan:

²⁴ToTEKO ma mitstiochiua niman ma mitsejeua. ²⁵ToTEKO ma mitsita ikan pakilistli, niman ma mitsikneli. ²⁶ToTEKO ma mitstlajsojkaita niman ma mitsmaka yolsekilistli.

²⁷Ijkin kiteneuaskej notokatsin Aarón niman itelpochuan imimpan on israelitas, niman nejua nikintiochuias.”

Uentli para kitiochuiaskej on tabernáculo

7 ¹Ipan on tonajli ijkuak Moisés otlán kichijchiua on tabernáculo, okajuichij ikan aceite niman okiteyaxkatij itech Dios iuan nochi on tlajtlamach* yejuan onkaj kalijtik. No ijki, okiteyaxkatij itech Dios on tlaixpan* niman on tlajtlamach* yejuan kitekitiltiaj ipan on tlaixpan*. ²Kemaj on tlayekankej israelitas ipan cada tribu* yejuan otlapaleuijkej para okichijkej on pualistli, oyajkej ³niman okimakakej toTEKO ken uentli chikuasen carretas yejuan tsakutokej inyeualkan, niman majtlaktli uan ome uakax. In kijtosneki ika cada ome tlayekanki okitemakak sen carreta niman cada tlayekanki okimakak toTEKO sen uakax. Nochi in okitemakakej ikalakiyan on tabernáculo.

⁴Niman toTEKO okijlij Moisés: ⁵“Xkinselili on carretas niman on uakaxtin, niman xkinmaka on levitas para kitekitiltiskej ken nonekis ipan cada tekittl yejuan kichiuaskej ipan on tabernáculo* kampa nejua ninemi. Cada se xmaka ken nonekis ipan itekiu.”

⁶Yejua ika, Moisés okinselij on carretas niman on uakaxtin, niman okinxexelouilij on levitas. ⁷Iclan* Gersón okinmakak ome carreta niman nauí uakax, ichkich ken noneki para kichiuaskej intekiu. ⁸Iclan* Merari okinmakak nauí carreta niman chikueyi uakax, ichkich ken noneki para kichiuaskej intekiu. Niman Itamar, itelpoch on tiopixki Aarón, kinyekanaya. ⁹Pero iclan* Coat xokinmakak nion se carreta, nion se uakax, pampa on tlen

yejuamej kiktiskej tlatiochijtli, niman noneki sa no yejuamej kechpanojtiaskej.

¹⁰Ijkuak okiteyaxkatikej itech Dios on tlaixpan*, on tlayekankej ipan cada tribu* okiktikej iminuen, niman okitlalijkej ixpan on tlaixpan*. ¹¹Kemaj toTEKO okijlij Moisés: “Mojmostla ma nopatlatiakan on tlayekankej ipan cada tribu* yejuan kiktiskej iminuen para kitiochiuaskej on tlaixpan*.”

¹²Ipan on achtoj tonajli, okiktik iuen Naasón, itelpoch Aminadab, yejuan tlayekanki katka itech itribu* Judá. ¹³Inuen katka: sen ueyi plato tlachijchijtli ikan plata yejuan yetik katka se kilo uan tlajko, sen ueyi taza de plata yejuan yetik katka tlajko kilo, ijkon ken kitlajtlanij ipan on tabernáculo. Niman nochi tentiayaj ika harina yejuan más kuajli, niman tnelojli katka iuan aceite para sen uentli de harina. ¹⁴No ijki, okuajkik sen ueyi xopijli de oro yejuan yetik katka 110 gramos niman tentiaya ikan kopajli, niman okuajuikak ¹⁵sen becerro, sen borrego, sen borreguito yejuan kipiya se xipan para sen uentli yejuan nochi tlatlas, ¹⁶sen chivo para sen uentli ipampa tlajtlakojli, ¹⁷niman sa ika nochi, okuajkik sen uentli para yoltlalilistli iuan toTEKO. Okuajuikak ome uakax, makuijli borrego, makuijli chivo niman makuijli borreguito yejuan se xijkayomej. In yejua iuen Naasón itelpoch Aminadab.

¹⁸Kampa ika ome tonajli, okiktik iuen Natanael, itelpoch Zuar, yejuan tlayekanki katka itech itribu* Isacar. ¹⁹⁻²³On tlen okiuentlalij, no sano ijki ken okitemakak Naasón.

²⁴Kampa ika yeyi tonajli okiktik iuen Eliab, itelpoch Helón, yejuan tlayekanki katka itech itribu* Zabulón. ²⁵⁻²⁹No okiuentlalij sa no ijki ken on oksekimej.

³⁰Kampa ika naui tonajli okiktik iuen Elisur, itelpoch Sedeur, yejuan tlayekanki katka itech itribu* Rubén. ³¹⁻³⁵No okiuentlalij sano ijki ken on oksekimej.

³⁶Kampa ika makuijli tonajli, okiktik iuen Selumiel, itelpoch Zurisadai, yejuan tlayekanki katka itech itribu* Simeón. ³⁷⁻⁴¹No okiuentlalij sano ijki ken on oksekimej.

⁴²Kampa ika chikuasen tonajli, okiktik iuen Eliasaf, itelpoch Reuel, yejuan tlayekanki katka itech itribu* Gad. ⁴³⁻⁴⁷No okiuentlalij sano ijki ken on oksekimej.

⁴⁸Kampa ika chikome tonajli okiktik iuen Elisama, itelpoch Amiud, yejuan tlayekanki katka itech itribu* Efraín. ⁴⁹⁻⁵³No okiuentlalij sano ijki ken on oksekimej.

⁵⁴Kampa ika chikueyi tonajli okiktik iuen Gamaliel, itelpoch Pedasur yejuan tlayekanki katka itech itribu* Manasés. ⁵⁵⁻⁵⁹No okiuentlalij sano ijki ken on oksekimej.

⁶⁰Kampa ika chiknaui tonajli okiktik iuen Abidán, itelpoch Gedeoní, yejuan tlayekanki katka itech itribu* Benjamín. ⁶¹⁻⁶⁵No okiuentlalij sano ijki ken on oksekimej.

⁶⁶Kampa ika majtlaktli tonajli, okiktik iuen Ahiezer, itelpoch Amisadai, yejuan tlayekanki katka itech itribu* Dan. ⁶⁷⁻⁷¹No okiuentlalij sano ijki ken on oksekimej.

⁷²Kampa ika majtlaktli uan se tonajli, okiktik iuen Pagiel, itelpoch Ocrán, yejuan tlayekanki katka itech itribu* Aser. ⁷³⁻⁷⁷No okiuentlalij sano ijki ken on oksekimej.

⁷⁸Kampa ika majtlaktli uan ome tonajli, okiktik iuen Ahira, itelpoch Enán, yejuan tlayekanki katka itech itribu* Neftalí. ⁷⁹⁻⁸³Niman yejua no okiuentlalij sano ijki ken on oksekimej.

⁸⁴Ijkon tej, ijkuak okiteyaxkatijkej itech Dios on tlaixpan*, on tlayekankej intech on israelitas okitemakakej majtlaktli uan ome platos tlachijchijtin ikan plata, majtlaktli uan ome tasas uejueyimej tlachijchijtin ikan plata, niman majtlaktli uan ome xopiltin uejueyimej de oro. ⁸⁵Cada plato okipix se kilo uan tlajko ika yetik, niman cada tasa de plata okipix tlajko kilo ika yetik. Nochi on tlajtlamach* tlachijchijtin ikan plata san se ueyi katka 27 kilos ika yetik, ijkon ken kitlajtlanij ipan on tabernáculo.

⁸⁶On majtlaktli uan ome xopiltin de oro yejuan tenticatkej ikan kopajli, cada se kipiyya 110 gramos ika yetik, ijkon ken kitlajtlanij ipan on tabernáculo. Nochi on oro de on xopiltin, san se ueyi onochiu se kilo ipan 320 gramos ika yetik.

⁸⁷On yolkej yejuan para on uentli yejuan tlatlas katkaj majtlaktli uan ome becerro, maktlaktli uan ome borrego, majtlaktli uan ome borreguito yejuan se xijkayomej, iuan on uentli de trigo noso cebada. Niman no majtlaktli uan ome chivo para uentli ipampa tlajtlakojli. ⁸⁸Nochi on yolkej para uentli de yoltlalilistli katkaj 24 becerros, 60 borregos, 60 chivos, niman 60 borreguitos yejuan se xijkayomej. Sakin, ijkuak yokiteyaxkatijkej itech Dios on tlaixpan*, nochi in uentli okimaktlijkej toTEKO para on tlaixpan*.

⁸⁹Ijkuak Moisés okalak ipan on tabernáculo* kampa nemi Dios para iuan tlajtos toTEKO, okak ika toTEKO kinotsaya intlajkotian on omemej ángeles yejuan imintoka querubines*. Yejuamej ijkayaj tlapani ipan itsaka on yekcaja yejuan kipiya on pacto*.

Kanika ontlauilojtiaskej on tlauiltin

8 ¹ToTEKO okinots Moisés niman okijlij: ²“Xkijli Aarón ijkuak kintlalis on tlauiltsitsimej, ma kichiua para ma ontlauilojtiakan iyakapan ika on lámpara.” ³Niman Aarón okichiu ijkon ken toTEKO okinauatij Moisés. Okintlalij on tlauiltsitsimej para ma on tlauiilojtiakan ixpan ika on lámpara. ⁴On lámpara tlachijchijtli katka de oro yejuan okitetsetsonkej ikan martillo desde itsinkax hasta ikuapan kampa kipiya on ken ixochiyo. Okichijchijkej on lámpara ken toTEKO okititij Moisés.

On levitas okinteyaxkatijkej itech toTEKO

⁵ToTEKO okinots Moisés niman okijlij: ⁶“Xkinxelo on levitas de intech on oksekimej israelitas, niman xkiminchipaua nixpan. ⁷Para tikchius on chipaualistli, ijkin tikchius: Tejua tikinjmaichis ikan atl yejuan notekitiltia para techipaua ixpan Dios. Niman sakin*, noximaskej niman notsojmiyouauanaskej ipan nochi imintlalnakayo. Kemaj ma naltikan, niman ma kimpakakan intlakeuan, niman ijkon nokauaskej chipajkej nixpan. ⁸Kemaj kuajuikaskej sen becerro, niman no kuajkiskej on uentli de harina yejuan más kuajli niman tlanelojli iuan aceite. Niman no, kuajuikaskej okse becerro para sen uentli ipampa tlajtlakojli. ⁹Tejua tikchius para on levitas ma uiyan ixpan on tabernáculo* kampa nejua ninemi, niman nochimej on israelitas no ompa ma nosentlalikan. ¹⁰Ijkuak on levitas yotikinuajuikak nixpan nejua nemoTEKO, tikinnauatis on israelitas ma kitlalikan iminma ipan intsontekon on levitas. ¹¹Niman Aarón nechinmaktilis ken uentli yejuan ikatlakajtli. Ijkon nechinmaktilis nochimej on levitas ken sen ueyi uentli yejuan nochimej on israelitas nechmakaj nejua nemoTEKO. Niman ijkon noyaxkauan yeskej para notekitkauan.

¹²’Kemaj on levitas kitlaliskej iminma ipan intsontekon on becerros. Sen becerro nechmakaskej para sen uentli ipampa tlajtlakojli, niman okse becerro nechmakaskej para sen uentli yejuan nochi tlatla para on levitas kiseliskej tetlapojpoluulistli ipampa intlajtlakol. ¹³Kemaj tejua tikintelketsas on levitas ixpan Aarón niman itelpochuan yejua, niman tinechinmakas ken sen uentli yejuan tlaoolinjli yeskia para nejua nemoTEKO. ¹⁴Ijki tikinxelos on levitas de on oksekimej israelitas para noyaxkauan yeskej. ¹⁵Kemaj ijkuak yotikinchipajkatlalij on levitas, niman yotinechinyaxkatij no ijki ken on uentli yejuan tlaoolinjli, yejuamej ueliskej kalakiskej para nechtekipanoskej ipan on tabernáculo* kampa nejua ninemi, ¹⁶pampa de intech nochimej on israelitas on levitas nochimej noyaxkauan. Nejua yonikinselij pampa onikimpatlak ika inyenkuuyokoneuan on israelitas yejuan nonekiyaj nechinmakaskej, ¹⁷pampa nejua onikinnoyaxkatij nochimej inyenkuuyokoneuan on israelitas niman nochimej inyenkuuyokoneuan iminyolkauan. Ijkuak onikinmiktij nochimej on inyenkuuyokoneuan on Egipcios, nochimej iminyenkuuyokoneuan on israelitas onikinxeloy para noyaxkauan yeskej. ¹⁸Ijkon tej, onikimpatlak inyenkuuyokoneuan on israelitas inka on levitas. ¹⁹Nejua onikintlapejpenij on levitas intech on oksekimej israelitas, niman onikinmakak Aarón niman itelpochuan para yejuamej tekitiskej impampa on israelitas ipan

on tabernáculo* kampa nejua ninemi. Yejuamej kichiuaskej para nikintlajopoluilis intlajtlakoluan on israelitas. Ijkon, tla on israelitas kinisiuiskej on tabernáculo, xitlaj* impan nochiuas tlen xkuajli.”

²⁰Moisés, Aarón niman nochimej on israelitas okichijkej iuan on levitas nochi ken toTEKO okinauatij Moisés. ²¹On levitas onochipajkej niman okipakkej intlakeuan. Kemaj Aarón okinmaktij toTEKO no ijki ken on uentli yejuan tlaoolinjili, niman no okimakak sen uentli para okinkixtilij intlajtlakoluan on levitas, niman ijkon onokajkej chipajkej ixpan toTEKO. ²²Sakin, ijkuak yotlan nochia nochi in tlajtlamach*, on levitas opejkej kalakij ipan on tabernáculo* kampa Dios nemi para kichiuayaj intekiu. Otekitkej ika intlanauatil Aarón niman itelpochuan. Niman nochi okichijkej ijki ken toTEKO okinauatij Moisés ma kichia iminuan on levitas.

On keski xipan tekitis sen levita

²³ToTEKO okinots Moisés, niman okijlij: ²⁴“On levitas ijkuak kipiwaskej 25 xipan, ijkuakon kipeualtiskej intekiu ipan on tabernáculo* kampa ninemi. ²⁵Niman kajkauaskej ika tekitiskej ijkuak kajxitiskej 50 xipan. ²⁶Ijkuak yejuamej yokajxitijkej on 50 xipan, uelis kimpaleuiskej on yejuan iminuan tekitiyaj ipan on tekintl yejuan xmás chikauak, ipan on tabernáculo* kampa nejua ninemi. Pero on tekintl yejuan chikauak xok kichiuaskej. Ijkon tikintekimakas on levitas.”

Kenijki kichiuaskej on iluitl Pascua

9 ¹Ome xipan sakin*, ijkuak on israelitas okiskej Egipto, ipan on achtoj metstli de on xipan, toTEKO okinots Moisés ipan on xalpatlajkan Sinaí, niman okijlij: ²“On israelitas noneki kichiuaskej on iluitl itoka Pascua ipan on tonajli yejuan onemechnauatij. ³Nenkichiuaskej ijkuak tlapoyajkan ipan on 14 tonajli de in metstli. Nenkitokaskej on tlanauatijli ken tlajkuilolnestikaj, ijkon ken onemechnauatijtikaj ijki nenkichiuaskej.”

⁴Kemaj Moisés okinnauatij on israelitas ma kichiuakan on iluitl Pascua. ⁵Ompa ipan on xalpatlajkan Sinaí ijkuak tlapoyajkan ipan on majtlaktli uan naui tonajli de on achtoj metstli, yejuamej okichijkej on iluitl ijki ken toTEKO okinauatij Moisés.

⁶Pero nemiyaj sekimej tlakamej yejuan xchipajkej katkaj ixpan toTEKO, pampa okimatokakej sen mikatsintl, niman ijkon xouelkej okichijkej on iluitl Pascua ipan on tonajli. Yejua ika, yejuamej oyajkej para okitatoj Moisés niman Aarón ipan sano yejua on tonajli, ⁷niman okijlijkej Moisés:

—Tejuamej otikmatokakej sen mikatsintli, niman yejua ika xtchipajkej tinemij ixpan toTEKO. ¿Tla ijkon, xuelis tiktemakaskej sen uentli ixpan toTEKO ipan on tonajli ijkuak nochimej on israelitas kichiuaj on iluitl Pascua?

⁸Moisés okinnankilij:

—Xchakan hasta toTEKO ma nechijli tlinon uelis nenkichiuaskej nemejuamej.

⁹ToTEKO okinots Moisés niman okijlij: ¹⁰“Ijkin xkinmijli on israelitas: Nemochimej nemejuamej niman nemouejkakoneuan noneki nenkichiuaskej on iluitl Pascua para nejua notlakaitalis. On yejuan xchipajkej nemij nixpan pampa okimatokajkej sen mikatsintli, noso on yejuan nemij uejka ipan ojtli ijkuak nochiuja on iluitl, yejuamej uelis sakin* kichiuaskej on iluitl. ¹¹Kichiuaskej ijkuak tlapoyajkan ipan on 14 tonajli ipan on ika ome metstli. Noneki kikuaskej on borreguito iuan xojtli yejuan chichik, niman pan yejuan xkipiya tlaxokolilistli*. ¹²Niman xitlaj* nokauas para uajmostla, niman xkipostekiliskej nion se iomiyo on borreguito. Xchiuakan on Pascua ken onemechnauatij nenkichiuaskej. ¹³Pero tla yakaj, yejuan chipauak nixpan noso xkanaj yau ipan ojtli, san xkinekis kichiuas on iluitl Pascua, noneki nenkixtiskej ipan nemokalpan. Ijkon nenkichiuiliskej, pampa xonechmakak on uentli ipan on tonajli ijkuak nejua nemoTEKO onemechnauatij. Tla ijkon, kiselis on castigo ipampa itlajtlakol.

¹⁴“Tla on yejuan xchanejkej yejuan nemij nemouan kinekij kichiuaskej on Pascua, yejuamej ika onkaj kitlakamatiskej on tlanauatijli yejuan yonemechnauatij. Onkaj san se tlanauatijli para on israelitas, niman para on yejuan xchanejkej.”

On moxtli yejuan onotlalij ikuapan itabernáculo toTEKO

(Ex 40.34-38)

¹⁵Ipan on tonajli ijkuak otlankej kisasalouaj on tabernáculo* kampa onkaj on pacto*, on moxtli okitlapachoj. Niman ijkuak peuya tlapoyauj, nonextiaya ken sen tlimilinajli ikuapan on tabernáculo, niman tlikuitikatka hasta ijkuak tlanesiya. ¹⁶Ijki nochiuaya nochipa: Ipan tonajli on moxtli kitlapachouaya on tabernáculo, niman tlayoua nesiya ken sen ueyi tlimilinajli. ¹⁷Ijkuak on moxtli nejkuanaiaya ikuapan on tabernáculo, on israelitas kisayaj niman kitokatiayaj. Niman kampa noteltiaya on moxtli, on israelitas no noteltiayaj, niman ompa kitelketsayaj iminkajkal. ¹⁸Ijkon on israelitas nejkuanaiayaj niman noteltiayaj ijkuak toTEKO kinnauatiaya, niman nokauayaj nochi on tonaltin ijkuak on moxtli nokauaya ikuapan on tabernáculo. ¹⁹Tla on moxtli nokauaya ikuapan on tabernáculo* miyek tonaltin, on israelitas kitlakamatiyaj itlanauatil toTEKO niman noteltiayaj. ²⁰Niman tla

on moxtli nokauaya ikuapan on tabernáculo* san keski tonajli, ika itlanauatil toTEKO noteltiyaj. Niman oksejpa ika itlanauatil toTEKO nejnemiyaj. ²¹Kamantika on moxtli noteltiya san se yeuajli, niman kualkan peuya yau, niman yejuamej kitokayaj. Sa no ijki ipan tonajli noso ipan yeuajli, ijkuak nejkuaniaaya on moxtli, yejuamej no kisayaj para yayaj. ²²Niman tla on moxtli noteltiya ikuapan on tabernáculo* ome tonajli, se metstli, noso se xipan, on israelitas nochachantiyaj ompa niman xok nejnemiyaj. Pero ijkuak on moxtli nokuiteuaya niman yaya, yejuamej no yayaj. ²³Ika itlanauatil toTEKO yejuamej nochachantiyaj, niman oksejpa ika itlanauatil toTEKO nejnemiyaj. Chika ijkon nochiuaya, yejuamej kichiuayaj niman kitlakamatiyaj nochi on tlen toTEKO kinauatiaya Moisés para ma kichiuakan.

On tlapitsaltin de plata

10 ¹ToTEKO okinots Moisés niman okijlij: ²“Xchijchiua ome tlapitsajli de plata yejuan tlatetsotsontli ikan martillo. Ika on tlapitsaltin tikinnotsas on israelitas para ma nosentlalikan, niman no para ma kimatikan ijkuak notekpanaskej para kisaskej. ³Ijkuak kimpitsaskej on ome tlapitsaltin, nochimej on israelitas kimatiskej ika nosentlaliskej mixpan, itech ikalakiyan on tabernáculo* kampa nejua ninemi. ⁴Pero ijkuak kipitsaskej san se tlapitsajli, san nosentlaliskej yejuan tlayekanaj ipan cada tribu*. ⁵Ijkuak chikauak kimpitsaskej niman tsajtsiskej, kistiaskej on yejuan onochachantijkej kampaka ikisayan tonaltsintli de on tabernáculo. ⁶Niman ijkuak kipitsaskej ika okpa, notekpanaskej para kistiaskej on yejuan onochachantijkej kampaka sur de on tabernáculo. Ijkuak tlapitsaskej chikauak niman tsajtsiskej, kijtosneki ika ye kisaskej. ⁷Pero ijkuak kinyemankapitsaskej on tlapitsaltin, on yes para ma nosentlalikan, on israelitas. ⁸San on tiopixkej, yejuan itelpochuan Aarón, ueliskej kimpitsaskej on tlapitsaltin. In yes para nemejuamej sen ley para nochipa.

⁹Ijkuak nemotlaeliknivan mechuijsokiskej kampa nenchantij ne ipan nemoueyitalpan, niman nemejuamej nonekis nenkinmixnamikiskej, xkimpitsakan chikauak on tlapitsaltin niman chikauak xtsajtsikan. Ijkon nejua nemoTEKO Dios nemechelnamikis, niman nemechmanauis intech nemotlaeliknivan. ¹⁰No ijki, xkimpitsakan on tlapitsaltin ijkuak onyas pakilistli, ken ijkuak onyas iluutl, noso ijkuak nesi yenkuik metstli, ijkuak nenkitemakaj uentli yejuan tlatla, noso uentli de yoltlalilistli nouan. Ijkon nejua yejuan nemoTEKO Dios nemechelnamikis.”

On israelitas okiskej Sinaí

¹¹Ipan on sempoajli tonajli de on ika ome metstli ijkuak ye kipiayaj ome xipan ika on israelitas okiskej Egipto, on moxtli

onokuiteu de ikuapan on tabernáculo* kampa onkaj on pacto*.
¹²On israelitas okiskej ipan on xalpatlajkan itoka Sinaí. Kemaj on moxtli onoteltij ipan on xalpatlajkan itoka Parán. ¹³Nochi onochiu ken toTEKO okinauatij Moisés.

¹⁴On yeyimej tribus yejuan kitokayaj ibandera Judá, yejua achtoj grupo yejuan kisaya. Niman tlapeuultiaya itribu* Judá, itlayekankau katka Naasón, itelpoch Aminadab. ¹⁵Kemaj tetokaya itribu* Isacar. Itlayekankau katka Natanael, itelpoch Zuar. ¹⁶Sa ika nochi yaya itribu* Zabulón, niman itlayekankau katka Eliab, itelpoch Helón.

¹⁷Kemaj okixoxotonijkej on tabernáculo, niman ikoneuan Gersón iuan ikoneuan Merari yejuan kipiayaj on tekittl para kiktiskej on tlajtlamach*, opejkej nejnemij.

¹⁸Kemaj kintokayaj on yeyi tribus yejuan kiktijaj ibandera Rubén. Itlayekankau itribu* Rubén katka Elisur, itelpoch Sedeur. ¹⁹Kemaj tetokaya itribu* Simeón. Itlayekankau itribu* Simeon katka Selumiel, itelpoch Zurisadai. ²⁰Sa ika nochi yaya itribu* Gad. Itlayekankau itribu* Gad katka Eliasaf, itelpoch Ruel.

²¹Kemaj ompa tetokayaj ikoneuan Coat yejuan kiktijaj on tlajtlamach* tlatiochijtli.

Ijkuak yejuamej ajsiyaj kampa noteltiyaj, kinextijtatajsiyaj yotlan kitelketsaj on tabernáculo. ²²Kemaj kintokayaj on yeyi tribus yejuan kiktijaj ibandera Efraín. Itlayekankau itribu* Efraín katka Elisama, itelpoch Amiud. ²³Kemaj tetokaya itribu* Manasés. Itlayekankau itribu* Manasés katka Gamaliel, itelpoch Pedasur. ²⁴Sa ika nochi yaya itribu* Benjamín. Itlayekankau itribu* Benjamín katka Abidán, itelpoch Gedeoni.

²⁵Sa ika nochi, tetokayaj on yeyi tribus yejuan kiktijaj ibandera Dan. Yejuamej kincuidarojtayaj nochi on oksekimej tribus. Itlayekankau itribu* Dan katka Ahiezer, itelpoch Amisadai.

²⁶Kemaj yaya itribu* Aser. Itlayekankau itribu* Aser katka Pagiél, itelpoch Ocrán. ²⁷Sa ika nochi yaya itribu* Neftalí. Itlayekankau itribu* Neftalí katka Ahira, itelpoch Enán. ²⁸Ijkin notokatiayaj itribus on israelitas ijkuak kisayaj para yayaj oksekan.

Moisés okinots icuñado para iminuan ma uiya

²⁹Se tonajli Moisés okijlij Hobab icuñado, yejuan itelpoch Reuel niman yejuan ualeua Madián:

—Tejuamej tiauij ipan on tlajli yejuan toTEKO yokijtoj techmakas. Xuajla touan, niman kuajli titouikaskej mouan, pampa toTEKO yotechprometerouilij kipiayas kuajli iyojlo touan tejuamej tiisraelitas.

³⁰Pero Hobab okinankilij:

—Ka, nejua xnias. Yej ninokuepas ipan notlal kampa nemij nofamilias.

³¹ Pero Moisés oksejpa okijlij:

—Maka xtechkajteua. Tejua kuajli tikixmati nochi in ojtli ipan in xalpatlajkan, niman tikmati kanon kuajli titokauaskej. Xuajla touan niman xtechyekana. ³² Tla tiuajlas touan, nochi on tlen kuajli yejuan toTEKO techmakas, tejuamej no timitsmakaskej.

³³ Ijkon tej, okiskej Sinaí, itech itepeu toTEKO niman onejnenkej yeyi tonajli. On yekcaja yejuan ijtik yaya ipacto* toTEKO, kinyekantiaya niman kintejtemouilijtiaya kanon noseuiskej.

³⁴ Ipan tonajli ijkuak nejnemiyaj, on moxtli yejuan toTEKO okinmakak yaya inkuapan. ³⁵ Ijkuak kuiteuaj on yekcaja para yayaj, Moisés kijtouaya:

“¡Xmokuiteua toTEKO!

¡Xchiua para ma nochojchoyauakan motlauelikniuan!

¡Xchiua para ma cholojteuakan ijkuak mitsitaskej on yejuan mitstlauelitaj!”

³⁶ Pero ijkuak kiteltiyaj on yekcaja, Moisés kijtouaya:

“¡ToTEKO, xuajla totech tejuamej mokoneuan

yejuan sanoyej timiyekej hasta xakaj uelis techpouas!

¡Nikan xmokaua touan!”

ToTEKO kimijlia on israelitas ika kinmakas nakatl

11 ¹ Se tonajli on israelitas opejkej tlamach kijtouiiaj toTEKO pampa tlamach impan nochiuaya. Ijkuak toTEKO okinkak, sanoyej okualan, niman okichiu para ma tlikiaui ipan on kajkaltin iyeualkan on campamento de on israelitas. ² Kemaj nochimej on israelitas okitsajtsilitoj Moisés para ma kimpaleui. Niman Moisés okiknotlajtlanilij toTEKO impampa yejuamej, kemaj on tlitl oseu. ³ Yejua ika, ompa okitokayotijkej Tabera pampa ompa on tlitl de toTEKO okauan iminpan yejuamej.

⁴ Intech on israelitas yononelojkaj xchanejkej tlakamej yejuan tlajtlaluis ualeuayaj, niman xkuajli nouikayaj. Yejuamej xompayejeuamej katkaj. San kinejnemilijtikatkaj kikuaskej nakatl. Niman ika on israelitas ijkon okakkej no opejkej chokaj niman kijtouayaj: “¡Melauak, kuajli yeskia tla tikuaskiaj nakatl! ⁵ Tikelnamikij on michimej yejuan tikinkuayaj ne Egipto, niman xtikintlaxtlauayaj. Niman no tikuayaj pepinos, melones, puerros, xonakatl niman ajo. ⁶ Pero aman nikan tikajkamateuaktokej, niman xitlaj* okse tikpiyaj, yej san in maná yejuan nochipa tikuajtokej.”

⁷ On maná xiniya ken iteyo cilantro, niman nesiya kostik ken ikopajlo itlaj okotl. ⁸ Niman machistiya ken memelatsitsimej de

harina yejuan tlanelojli iuan aceite. Nochimej konsentlaliayaj, niman kemaj kuechouayaj noso san kitetsotsonayaj, niman kixitiayaj noso ika kichijchiuayaj ken itlaj pan. ⁹Tlayoua, ijkuak xiniya ajuichtli ipan on campamento, no xiniya on maná.

¹⁰Moisés okak ika on israelitas iuan infamilias chokayaj inkiauatempan. ToTEKO sanoyej okualan, niman Moisés no xokuelitak, ¹¹niman Moisés okijlij toTEKO:

—¿Tline* tinechchiuilia in tlen xkuajli, nejua yejuan nimotekitkau? ¿Tlinon xkuajli tikneki tinechchiuilis ika tinechinmamaltia nochimej in tlakamej? ¹²¿Tlen nejua nitajtli noso nejua ninantli inka yejuamej ika tinechijlia ma nikinnapalojtiu ken kokonej yejuan chichij, hasta nikinmajxitis ipan on tlajli yejuan otikinmijlij inuejkatajuan ika tikinmakas? ¹³¿Kanon uelis nikuis nakatl para kikuaskej nochimej in israelitas? Nochimej notech uajchokatiuij niman nechijlijaj: “Xtechmaka nakatl para tikuaskej.” ¹⁴Nejua noselti xniuelis nikkinnomamaltis in israelitas. In sen ueyi tlamamajli yejuan sanoyej yetik para nejua. ¹⁵Tla ijkon tinechchiuilis, más kuajli para xnehmikti tla melauak tinechtlajsojtla. Ijkon xok nikpiyas tlinon nechpajsolos.

¹⁶Kemaj toTEKO okinankilij:

—Xnechinsentlalili 70 uejueyixtokej tlayekankej yejuan tikmatis ika kuajli tlayekanaj intech on israelitas, niman xkinuika ipan on tabernáculo* kampa ninemi, niman ompa ma nechchakan mouan. ¹⁷Nejua nitemos niman ompa nimitsnotsas. Niman nikuis seki moespíritu yejuan tikpiya niman nikinmakas yejuamej. Kemaj yejuamej ueliskej mitspaleuiskej ipan on tekittl de on israelitas. Niman ijkon xok titekittis moselti. ¹⁸Aman xkinnauati on israelitas: “Ma nochipauakan nixpan, pampa mostla kikuaskej nakatl. Nejua nemoTEKO yonemechkak ika nenchokaj niman nenkijtouaj: ‘¡Más kuajli ijkuak tinemiyaj Egipto!’” Yejua ika, aman nejua nemechkakas nakatl para nenkuaskej. ¹⁹Niman xnenkuaskej san se tonajli, nion ome tonajli, nion makuijli tonajli, nion majtlaktli tonajli, nion sempoajli tonajli. Ka. ²⁰Nenkuaskej nakatl nochi se metstli hasta uajkijkisas nemoyakak niman nenkitlajyelitaskej. Ijkon nochiuas pampa onennechixnamikkej nejua nemoTEKO yejuan ninemi nemonuan, niman onenchokakej nixpan, niman onenkijtojkej: “¿Hasta tline otikiskej Egipto?”

²¹Kemaj Moisés okinankilij:

—San on tlakamej yejuan uajlauij nouan tlapoualtin 600 mil niman, ¿tikijtoua titechmakas nakatl para tikuaskej nochi se metstli?

²²¿Kanon nemij sanoyej miyekej borregos niman uakaxtin yejuan uelis kinmiktiskej niman kimajxilil nochimej? Maski

tikinmakaskia nochi on michimej yejuan nemij ipan mar, xkimajxiliskia.

²³ Pero toTEKO okinankilij:

—¿Tlen tikuitia semi xnikpiya nopoder? Aman tikitas tla nochiuas noso xnochiuas on tlen yonikijtoj.

On 70 uejueyitlayekankej opejkej tlajtouaj ken tiotlajtojkej

²⁴ Moisés okis niman okinmijlij on israelitas on tlen toTEKO Dios okijlij. Kemaj okinsentlalij 70 uejueyitlayekankej de on israelitas niman okintetelkets iyeualkan on tabernáculo. ²⁵ Kemaj toTEKO ouajtemok ipan on moxtli niman otlajtoj iuan Moisés. Niman seki okikuik on espíritu yejuan kipiyaya Moisés niman okinmakak on 70 uejueyitlayekankej. Niman ijkuak on espíritu impan ouajlaj on uejueyitlayakankej, opejkej tlajtouaj ken tiotlajtojkej. Pero in xokaman oksejpa ijki onoxhiu.

²⁶ On omemej tlakamej, Eldad niman Medad yejuan uejueyixtokej tlakamej katkaj intech on 70 yejuan toTEKO no okintlapejpenij, xokinekej oyajkej ipan on tabernáculo, yej onokajkej ipan on campamento. Pero on espíritu no ouajlaj impan, niman opejkej tlajtouaj ken tiotlajtojkej ne kampa nemiyaj ipan on campamento. ²⁷ Kemaj sen telpochtli onotlaloj okijlito Moisés:

—¡Eldad niman Medad tlajtlajtouaj ken tiotlajtojkej ne nepa ipan on campamento!

²⁸ Kemaj Josué, itelpoch Nun yejuan desde konetl kipaleuiyaya Moisés, okijlij:

—NoTEKO Moisés, maka xkinkauili ma tiotlajtokan.

²⁹ Pero Moisés okinankilij:

—¿Tlen tichauati noka nejua? Yej, sanoyej kuajli yeskia tla toTEKO kinmakaskia iespíritu nochimej on israelitas niman nochimej tiotlajtoskijaj.

³⁰ Kemaj Moisés niman on uejueyitlayekankej de Israel, oyajkej ipan on campamento.

ToTEKO okuajtítlan sanoyej miyek tektototl

³¹ ToTEKO okichiu para ma uajla sen ajakatl sanoyej chikauak yejuan oualeu itechika on mar, niman okinualantikis sanoyej miyek tektotomej niman okinuikak ipan on campamento niman nochuiuyan iyeualkan. Niman on tektotomej sa tlaltech patlantinemiyaj ken kanaj se metro ika tlakpak. On tektotomej nemiyaj nochuiuyan niman uejka ajsitoyaj, ken kanaj se tonajli kuikaskia tla yakaj kiyeualoskia on campamento.

³² Nochi on tonajli, on yeuajli niman uajmostla nochi se tonajli, on israelitas okinsentlalijkej on tektotomej. Yejuan xmás

okisentlalij, okisentlalij kanaj ome tonelada de tektotomej. Niman opejkej kinuatsaj iyeualkan on campamento.

³³Pero ijkuak on israelitas kemach peuaya kikuaj innakayo on tektotomej, toTEKO sanoyej okualan iminuan niman okinuajtitlanilij sen temojtij kokolistli niman okichiu para ma mikikan miyekej. ³⁴Yejua ika, ompa okitokayotijkej Kibrot-hataava^c, pampa ompa okintokakej miyekej yejuan sanoyej kuasnekiyaj nakatl.

³⁵Niman on israelitas onejkuanijkej de Kibrot-hataava niman oyajkej hasta Hazerot niman ompa onokajkej.

María niman Aarón tlamach okijtouilijkej Moisés

12 ¹María niman Aarón opejkej tlamach kijtouiliaj Moisés, pampa Moisés ononamiktij iuan sen siuatl yejuan ualeua ipan on país Etiopía. ²Niman no okijtojkej: “ToTEKO xsan iuan Moisés ueli tlajtoua. Jej touan tejuamej no ueli tlajtoua.” Niman toTEKO okak tlinon kijtouiliaj Moisés.

³(Sa ye melak Moisés sen tlakatl yejuan sanoyej yolyemanki* katka xken yakaj okse ipan in tlaltikpaktli.) ⁴Yejua ika, toTEKO okijlij Moisés, Aarón niman María: “Xkisakan ipan on campamento niman xuiyan nemejuamej yeyimej ipan on tabernáculo* kampa ninemi.”

Niman on yeyimej oyajkej ipan on tabernáculo. ⁵Kemaj toTEKO ouajtemok ipan sen tilauak moxtli niman onotelkets kampa ikalakiyan on tabernáculo. Kemaj okominnots Aarón niman María, niman ijkuak yejuamej ononisiuijkej, ⁶toTEKO okinmijlij: “Xkakikan in tlen nemechijlis: Ijkuak nemechtitlanilia sen tiotlajtojketl para nemis nemouan, nejua nemoTEKO, ninonextia itech yejua ipan sen temiktli, noso niknotsa ipan sen tetlatlachalistli ken itemikpan. ⁷Pero iuan notekitkau Moisés xijki nikchiua. Yejua kemaj melauak kuajli iuan nikipiyalia noyojlo, niman yejua más kuajli notekitkau de nochimej on notekitkauan. ⁸Niman iuan yejua ninokaki niman iuan ninota ijkuak iuan nitlajtlajtoua. Niman tla ijkon, yejua iuan kuajli ninota, ¿tline xnemokamaijmatij para tlamach nenkijtouilia?”

⁹ToTEKO sanoyej okualan iminuan niman oyaj. ¹⁰Ijkuak san ouajnejkuanij on moxtli ipan on tabernáculo, María nimantsin ipan ouajlaj on kokolistli itoka lepra, niman itlalnakayo onokau istak ken itlaj nieve. Ijkuak Aarón ouajnomalakachoj para okontak María, okitak ika yokajsik on temojtij kokolistli itoka lepra. ¹¹Niman okijlij Moisés: “Xtechikneli noteko. Maka

c 11.34 Kibrot-hataava kijtosneki: “Kampa okintokakej yejuan sanoyej kuasnekiyaj nakatl.”

xtechcastigaro ipampa in totlajtlakol. Melauak xotitonemilijkej, ijkuak tlamach otikijtojkej. ¹²Maka xkauili María ma nokaua ken se konetsintli yejuan san uetsi, yejuan ijkuak uajkisa ijtik inanaj ikan itlalnakayo, pijpilichtik.”

¹³Kemaj Moisés ijkin okitlajtlanilij toTEKO: “¡Ay noTEKO Dios, nimitsiknotlajtlanilia xkikneli, niman xpajti!”

¹⁴Niman toTEKO okinankilij: “Tla itataj kichijchaskia ixko, María ikan ipinauis niyanaskia chikome tonajli. Tla ijkon, xkixtikan uejka de in campamento chikome tonajli. Niman ijkuak tlamis on chikome tonajli, oksejpa uelis nokuepas.”

¹⁵Niman María okixtijkej uejka ipan on campamento chikome tonajli. Chika María nemiya uejka, on israelitas xonejkuanijkej de ompa hasta kaman María onokuep. ¹⁶Ijkuak María onosentlalij iminuan, on israelitas onejkuanijkej ne Hazerot niman onoteltijkej ipan on xalpatlajkan itoka Parán.

On tlakamej yejuan oichtakatlajtlachatoj Canaán

(Dt 1.19-25)

13 ¹ToTEKO okinots Moisés niman okijlij: ²“Xkintitlani tlakamej para ma ichtakatlajtlachatij kenijki tlaonkaj ipan on país Canaán yejuan nejua nemechmakas. Xtitlani se tlakatl yejuan tlayekanki de cada tribu*.”

³Moisés okintitlan on tlakamej desde on xalpatlajkan Parán ijki ken toTEKO okinauatij. Nochimej on tlakamej tlayekankej katkaj intech on israelitas. ⁴⁻¹⁵Ijkin imintoka katka on tlayekankej de cada tribu* yejuan oyajkej:

Tribu

Rubén
Simeón
Judá
Isacar
Efraín
Benjamín
Zabulón
Manasés,
Dan,
Aser
Neftalí
Gad

Tlayekanki

Samúa, itelpoch Zacur
Safat, itelpoch Horí
Caleb, itelpoch Jefone
Igal, itelpoch José
Oseas, itelpoch Nun
Palti, itelpoch Rafú
Gadiel, itelpoch Sodi
Gadi, itelpoch Susi
Amiel, itelpoch Gemali
Setur, itelpoch Micael
Nahabí, itelpoch Vapsi
Geuel, itelpoch Maqui.

¹⁶In yejua intoka on tlakamej yejuan Moisés okintitlan ma ichtakatlajtlachatij ipan on tlajli. (Moisés okitokayopatlak Oseas itelpoch Nun, niman okitokayotij Josué.)

¹⁷Ijkuak Moisés okintitlan ma ichtakatlajtlachatij ipan on tlajli de Canaán, okinmijlij:

—Xuiyan ipan on xalpatlajkan Néguev niman kemaj xuiyan impan on tepeyoj. ¹⁸Xkitakan kenijki onkaj on tlajli niman xkitakan tla on tlakamej ompa chanejkej nesij kojtikey, niman tla sanoyej miyekej. ¹⁹Xkitakan kenijki onkaj on tlajli, tla kuajli tlatlaki, noso ka. Xkitakan tla on uejueyikalpanmej yeualtsakutokej ikan tepantli. ²⁰Xkitakan tla kuajli on tlajli niman miyek tlajtlamach* noskaltia ompa, noso ka. Xkitakan tla onkaj miyek kojtin, noso ka. Maka xmomojtikan. Xkuajjikan achijtsin on tlen tlaki ompa ne.”

Yejua in, onochiu ijkuak kitekij uvas yejuan achtoj tlaki.

²¹Ijkon tej, on majtlaktli uan ome tlakamej oyajkej niman oichtakatlajtlachatoj nochiuiyan ipan on tlajli desde ipan on xalpatlajkan Zin, kampa Sur, hasta kampa itoka Rehob norte ika, nisiu kampa itoka Hamat. ²²Okalakej ipan on xalpatlajkan itoka Néguev niman oajsikej hasta on kalpan Hebrón. Ompa ye chantiyaj Ahimán, Sesai niman Talmai. Nochimej yejuamej katkaj iuejyakoneuan Anac. (On kalpan Hebrón opeu kichantij chikome xipan achtoj xken on kalpan Zoán yejuan onkaj ipan on país Egipto.) ²³Niman oasisikej hasta ipan on ixtlauatl itoka Escol itechika on ayajtok. Niman ompa okitekej sen ueyi imatlakyo uvas, yejuan sanoyej ueyi katka, hasta okipilojkej ipan sen kojtl* niman omemej tlakamej okechpanojtiajkej. Niman no okisentlalijkej granadas niman higos yejuan ompa tlakiya. ²⁴On israelitas okitokayotijkej on ixtlauatl Escol^d, pampa ompa okitekej sen ueyi imatlakyo uvas.

²⁵Sakin, ijkuak otlankej kitaj on tlajli, ipan 40 tonajli onokuepkej ²⁶ne Cades ipan on xalpatlajkan Parán kampa nemiyaj Moisés, Aarón niman nochimej on israelitas. Kemaj yejuamej okintlajtlajtouilijkej nochi on tlen okitakej, niman okintitijkej on tlakyo^tl yejuan onkaj ipan on tlajli. ²⁷Niman ijin okijlijkej Moisés:

—Otiyajkej ipan on tlajli kampa otitechtitlan. Melauak ipan on tlajli sanoyej tlatlaki niman xitlaj* poliui. Niman in yejua seki itlakyo yejuan kitlakitia on tlajli. ²⁸Pero on tlakamej yejuan ompa chantij nesij sanoyej kojtikey, niman on uejueyikalpanmej sanoyej uejueyimej, niman kuajli yeualtsakutokej ikan tepantli. Niman no ompa otikintakej iuejyakoneuan Anac yejuan sanoyej uejueyi tlakamej. ²⁹Ipan iueyitalpan Néguev, chantij on amalecitas, niman ipan on región kampa tepeyoj chantij on heteos, jebuseos niman on amorreos. Niman itenko on mar Mediterráneo niman itenko on río Jordán chantij on cananeos.

d 13.24 Escol kijtosneki “ueyi imatlakyo”.

³⁰Kemaj Caleb okichiu para maka sa ma nauatikan on israelitas yejuan nemiyaj ixpan Moisés, niman okinmijlij:

—¡Tiauij! ¡Ma tiktoyaxkatitij on tlajli! ¡Tejuamej tiueliskej tiktoyaxkatiskej!

³¹Pero on oksekimej yejuan oyajakaj iuan, okijtojkej:

—Ka, tejuamej xtiueliskej tikinuijsokiskej on tlakamej, pampa yejuamej nesi sanoyej kojtikey xken tejuamej.

³²Niman yejuamej kimijliayaj on israelitas ika on tlajli kampa otlajtlachatoj sanoyej xkuajli. Ijkin okijtojkej:

—On tlajli yejuan otikichtakaitatoj xkuajli tlatlakitia. Yejua ika, mikij on tlakamej yejuan ompa chantij. No ijki, nochimej on tlakamej yejuan otikintakej sanoyej uejueyi tlakamej. ³³No ijki, otikintakej ompa iuejkakoneuan Anac yejuan sanoyej uejueyi tlakamej niman kojtikey. Imixpan titomatiyaj ken tichapolimej, niman yejuamej no ijki techitayaj.

On israelitas xipan kitaj toTEKO

(Dt 1.26-33)

14 ¹Kemaj nochimej on israelitas opejkej ajmankachokaj, niman nochi yeuajli ochokakej. ²Niman kemaj opejkej tlamach kijtouiliaj Moisés iuan Aarón. Ijkin kijtouayaj: “¡Más kuajli tla timikiskiaj Egipto, noso tla timikiskiaj nikan ipan in xalpatlajkan! ³¿Tline otechajuikak toTEKO ipan in tlajli para timikiskej ipan guerra, niman tosiuauan iuan tokoneuan esclavos yeskej intech totlauelikniuan? Más kuajli yeskia oksejpa titokuepaskiaj Egipto.”

⁴Niman opejkej kinojliaj: “¡Ma tiktlalikan akinon techyekanás niman techuikas para titokuepaskej Egipto!”

⁵Kemaj Moisés iuan Aarón onotlakuantelketskej imixpan nochimej on israelitas niman onopachojkej hasta ipan tlajli.

⁶Niman Josué ikoneu Nun, iuan Caleb ikoneu Jefone, on yejuan no teuan okitatoj on tlajli, onotlakentetsayankej para okiteititijkej ika sanoyej najmanaj, ⁷niman okinmijlijkej nochimej on israelitas:

—¡On tlajli yejuan otikitatoj melauak sanoyej kuajli! ⁸Tla toTEKO techiknelia, yejua techpaleuis para tikalakiskej ipan on tlajli niman techmakas. On sen tlajli kampa sanoyej tlatlaki niman xitlaj* poliui. ⁹Pero maka ixko xejeuakan toTEKO, nion maka xkinmakajsikan on tlakamej de on tlajli, pampa tejuamej nimantsin tikintlaniskej. Yejuamej xkipiyaj akinon kinmanauis, niman tejuamej kemaj touan nemi toTEKO. ¡Maka xmomojtikan!

¹⁰Niman maski ijkon okinmijlijkej nochimej, on israelitas kinekiyaj kintemojmotlaskej. Kemaj iueyilis toTEKO ouajnonextij imixpan nochimej on israelitas ipan on tabernáculo* kampa nemi Dios. ¹¹Niman toTEKO okijlij Moisés:

—¿Hasta kamanon xipan nechitaskej in israelitas? ¿Hasta kamanon ometlamatiskej de nejua, maski yonikchiu sanoyej miyek milagros* imixpan? ¹²Nejua nikintitlanilis sen temojtij kokolistli yejuan kinmiktis niman nikimpopolos. Pero motech Moisés, nikixtis sen nación yejuan más ueyi niman más kojtik xken yejuamej.

¹³Pero Moisés okinankilij toTEKO niman okijlij: p —Tejua ika nochi moueyi poder, otikinkixtij in mokoneuan ne Egipto. Ijkuak on egipcios kimatiskej ika otikinmiktij, ¹⁴yejuamej kintlajtlajtouiliskej on cananeos. Maski melauak on cananeos no ye kimatstokej ika tejua toTEKO tinemi touan, niman ika tikmokuailia ma tikitakan moxayakatsin ijkuak titechnotsa. Yejuamej no yokakkej ika on moxtli yejuan moyaxka* topan onkaj, niman kenijki titechyekana ika on moxtli ipan tonajli niman ika sen tlimilinajli ipan yeuajli. ¹⁵Tla tikinmiktis nochimej in israelitas san se tipan, on naciones yejuan yokakkej de moueyilis kijtoskej: ¹⁶“IminTEKO on israelitas xouel okinkalaktij ipan on tlajli yejuan onotlajtolmakaka ika kiminmakas. Yejua ika, okinmiktij ipan on xalpatlajkan.” ¹⁷Aman tej, noTEKO xteititi moueyi poder, ken yotikijtoj tikchiuas. Tejua tikijtoua ika ¹⁸xnimantsin tikualani, niman sanoyej ueyi motetlajsojtlalis. Tejua tiktlapojpoluiya tlajtlakojli niman on xompayejyeualistli, maski yotikijtoj ika cada tlajtlakojli ika onkaj notlaxtlauas. Ijkuak sen tajtli tlajtlakoua, ticastigaroua ipan ikoneuan, ipan ixuiuan, ipan ika okpa ixuiuan, niman ipan ika yexpa ixuiuan. ¹⁹Yejua ika tej, pampa motetlajsojtlalis* sanoyej ueyi, nimitstlajtlanilia, xtlapojpolui intlajtlakoluan in mokoneuan isralitas ijkon ken miyekpa otikpix ijyouilistli iminuan, desde ijkuak otikinkixtij ipan on país Egipto hasta aman.

ToTEKO kincastigaroua on israelitas

(Dt 1.34-40)

²⁰ToTEKO okijtoj:

—Kuajli tla ijkon, nejua nikintlapojpoluiya ken tinechtlajtlanilia.

²¹Pero ijkon ken melauak nejua ninemi, niman noueyilis kitemiltia nochi in tlaltikpaktli, ijkin ninotlajtolmaka: ²²Nion semej on yejuan okitakej noueyilis, niman on uejueyi milagros* yejuan onikchiu ipan on país Egipto, niman ipan on xalpatlajkan, niman yonechtlatlatakej majtlaktlipa ipan on xalpatlajkan, niman xkinekij kitlakamatiskej notlanauatiluan, ²³nion semej yejuamej xkitaskej on kuajli tlajli yejuan onikimijlij inuejkatajuan ika nikinmakas. Nion semej yejuan onechchichijkej kitas on tlajli. ²⁴Pero notekitkau Caleb, kemaj, pampa yejua kipiya oksekneka iyojlo niman yejua onechtlakamat niman onechneltokak. Yejua kemaj nikauilis ma kalaki ipan on

tlajli yejuan okixmatito, niman iuejkakoneuan ompa nochantiskej.
²⁵ Maka xuiyan kampaka nemij on amalecitas niman cananeos ipan on ixtlauatl. Yej mostla xmokuepakan para ipan on xalpatlajkan, ipan on ojtli yejuan yau kampaka nokaua on mar Rojo.

²⁶ ToTEKO okijlij Moisés iuan Aarón:

²⁷ p —¿Hasta kamanon xok tlamach nechteneuiliskej in tlakamej xompayejeuamej? Yonikak nochi on tlen xkuajli nechijtouiliaj.

²⁸ Xkimijliti ika ijkin nikijtoua: “Sano nejua, nemoTEKO ninotlajtolmaka ipampa nonemilis, ika nemechchiuilis on tlen onikak nenkijtouaj. ²⁹ Nochimej on yejuan kipiayaj sempoajli xipan para tlakpak, yejuan okinmijkuilojkaj ipan on achtoj tlapoualistli, niman tlamach yonechijtouilijkej, mikiskej, niman iminmikatlalnakayo xintoskej ipan in xalpatlajkan. ³⁰ Nion nensemej xnenkalakiskej ipan on tlajli yejuan onikijtoj ika nochi noyojlo nemechmakas. San uelis kalakis Caleb, itelpoch Jefone, niman Josué, itelpoch Nun. ³¹ Pero nemokoneuan yejuan onenkijtojkej uetsiskej inmak nemotlauelikniuan, nikuinikas ipan on tlajli yejuan nemejuamej onenkichichijkej, para yejuamej kiseliskej on kuajli tlajli. ³² Nemomikatlalnakayo xintoskej nanika ipan in xalpatlajkan ³³ kampa nemokoneuan nejnentinemiskej 40 xipan ikan tlajyouilistli ken tlajpikkej. Ijkon yejuamej kitlaxtlauaskej nochi nemotlajtlakoluan hasta kaman nenmikij nemochimej* nemejuamej ipan in xalpatlajkan. ³⁴ Nemejuamej onenkipixkej 40 tonajli para onentlajtlachatoj ipan on tlajli. Aman no nennemiskej 40 xipan para nenkitlaxtlauaskej nemotlajtlakoluan, se xipan por cada tonajli. Ijkon nenkimatiskej ken machisti ika onemochijkej notlauelikniuan.”
³⁵ Nejua nemoTEKO ijkin nikijtoua: Ijkin nikinchiuilis nochimej in tlakamej xompayejeuamej yejuan san sekan onechixnamikkej. Ipan in xalpatlajkan tlamis nochimej mikiskej.

Omikkej on majtlaktlimej ichtakatlachixkej yejuan otlakajkayajkej

³⁶ On tlakamej yejuan Moisés okintitlanka para ma kiichtakaitatij on tlajli Canaán, ouajnokuepatoj niman okiteijlijkej ika sanoyej temojtij ken okitakej. Niman on israelitas, ijkuak ijkon okakkej, no tlamach okijtojkej. ³⁷ Yejua ika, toTEKO okititlan impan on tlakamej yejuan oichtakatlajtlachatoj sen temojtij kokolistli niman yejuamej omikkej. ³⁸ De nochimej on yejuan oichtakatlajtlachatoj, Josué niman Caleb san yejuamej xomikej.

On israelitas okintlankej ne Horma

(Dt 1.41-46)

³⁹ Ijkuak Moisés okinmijlij on israelitas nochi on tlen toTEKO okijtoj, nochimej sanoyej onajmankej. ⁴⁰ Niman uajmostla

saniman kualkan, otlejkokej ipan on tepemej de on región, niman okijtojkej:

—Melauak otitlajtlakojkej, pero aman ye nikan tinemij. Tiauij ipan on tlajli yejuan toTEKO otechijlij techmakas.

⁴¹ Pero Moisés okinmijlij: p —¿Tline xipan nenkitaj on tlen kijtousa toTEKO? ¡On tlen nenkinekij nenkichiuaskej xkuajli kisas! ⁴² Maka xuiyan, pampa toTEKO xnemouan nemi, niman mechtlaniskej nemotlauelikniuan. ⁴³ On amalecitas niman on cananeos ompa mechchixtokej para mechuijsokiskej, niman mechmiktiskej. Niman pampa nemejuamej yonenkitlalkauijkej toTEKO, yejua xok nemouan nemi.

⁴⁴ Pero yejuamej xokinekej okakkej niman otlejkokej ipan on tepetl, pero nion Moisés, nion on yekcaja yejuan kipiya on pacto* xonejkuanijkej de on campamento. ⁴⁵ Kemaj on amalecitas niman on cananeos yejuan chantiyaj ipan on región, okintlankej on israelitas niman okinuajtojtokakej hasta Horma.

Tlanauatiltin para uentli

15 ¹ ToTEKO okinots Moisés niman okijlij:
² “Xkinnotsa on israelitas niman ijkin xkinmijli: Ijkuak nenkalakiskej ipan on tlajli yejuan nemechmakas para ompa nenchantiskej, nennechmakaskej uentin ken nejua nemechnauatis. ³ Noneki nennechmakaskej nejua nemoTEKO, sen borrego, sen chivo, noso sen okichuakax ken se uentli yejuan nochi tlatla para nennechtlakaitaskej, niman on iajuiyalis nechyolpaktis. Ijkon nennechmakaskej tla onennechprometerouilijkej, noso san nenkixtiaj ipan nemoyojlo, noso ijkuak onkaj sen iluitl. ⁴ Yejuan nechmakas on uentli, noneki iuan nechmakas ome kilo harina yejuan más kuajli niman kinelos iuan se litro aceite. ⁵ No ijki, nechmakaskej se litro vino ken uentli para cada borreguito yejuan notoyauas ipan on tlaixpan*. ⁶ Iuan cada borrego, nechmakaskej nauí kilo harina yejuan más kuajli niman kineloskej iuan se litro uan tlajko aceite. ⁷ Niman no iuan nechmakaskej se litro uan tlajko vino yejuan kitoyauaskej ipan on tlaixpan*. In yes sen uentli yejuan tlatla yejuan auiyak para nejua nemoTEKO. ⁸ Niman tla nechmakaskej sen becerro para sen uentli yejuan tlatla, noso sen uentli de yoltlalilistli, noso tla itlaj onechprometerouilijkaj nejua nemoTEKO, ⁹ iuan on becerro nechmakaskej sen uentli de chikuasen kilo harina yejuan más kuajli niman kineloskej iuan ome litro aceite. ¹⁰ Niman no nechmakaskej ome litro vino yejuan notoyauas ipan on tlaixpan*. In yes sen uentli yejuan tlatlas niman yejuan ajuiyak yes para nejua. ¹¹ Ijkin noneki nenkichiuaskej para cada okichuakax, cada borrego, cada borreguito, noso cada chivo yejuan nechmakaskej.

¹²Itech cada se yolki yejuan kuentlaliskej, iuan nechmakaskej on tlajtlamach* ken kinamiki cada yolki. ¹³Nochimej on israelitas ika onkaj kichiuaskej in tlanauatijli ijkuak nechmakaskej sen uentli yejuan tlatlas niman yejuan ijnekuistis ajuiyak nixpan nejua nemoTEKO.

¹⁴Tla yakaj yejuan xchanej, nemouan nemis san keski tonajli, noso tla chanti nochipa nemouan, kinekis nechmakas sen uentli yejuan tlatlas niman yejuan ijnekuistis ajuiyak, ika onkaj kichiuas ken nemejuamej nenkichiuaj. ¹⁵On israelitas niman on xchanejkej yejuan nemij nemouan san se ley kipyaskej. In sen ley yejuan nochipa onyas para nochimej on tatajtin niman inuejkakoneuan. ¹⁶Sano yejua ley niman sa no yejua tlanauatijli yes para nemejuamej niman para on xchanejkej.”

¹⁷ToTEKO okinots Moisés niman okijlij: ¹⁸“Ijkin xkinmijli on israelitas: Ijkuak yonenkalakej ipan on tlajli kampa nejua nemechuikas, ¹⁹niman peuas nenkuaskej on tlakuajli yejuan tlaki ipan on tlajli, noneki nenkixeloskej seki para nennechmakaskej ken sen uentli. ²⁰Ijkon ken nennechmakaj on trigo yejuan kemach kiteiniaj, no ijki nennechmakaskej ken sen uentli on achtoj pan yejuan nenkichijchiuaskej ika on achtoj trigo yejuan kemach kiteiniaj. ²¹In uentli, nemejuamej niman nemouekakoneuan noneki nenkichiuaskej nochipa.

²²⁻²³”Tla saman nenkixkauaj seki on tlanauatiltin yejuan onikmakak Moisés para nenkichiuaskej nemejuamej niman nemouekakoneuan, ijkin nenkichiuaskej:

²⁴”Tla yejuamej xkimatiyaj ika okichijkej on tlen xkuajli, yejuamej nechuentlaliliskej sen becerro yejuan nochi tlatla para sen ajuiyalistli yejuan nechyolpaktis. Niman iuan nechmakaskej on uentli de trigo noso cebada, niman uentli de vino ken nejua nemoDios nitlanauatia. No ijki, nechmakaskej sen chivo para uentli ipampa on tlajtlakojli yejuan okichijkej. ²⁵Kemaj on tiopixki nechmakas on uentli para nikinkixtilis intlajtlakoluan nochimej on israelitas. Niman ijkon nejua nikintlajlapojpoluis, pampa yejuamej nechmakaj on uentli yejuan nochi tlatla, niman sen uentli ipampa on tlajtlakojli yejuan okichijkej maski xkimatiyaj. ²⁶Nejua nikintlajlapojpoluis nochimej on israelitas niman nochimej on xchanejkej yejuan chantij nemouan, pampa on tlen okichijkej xkimatiyaj ika xkuajli.

²⁷”Pero tla sen tlakatl tlajtlakoua, niman xkimatiya ika otlajtlakoj, ijkuak kimatis on tlen okichiu, kiuentlalis ipampa on tlajtlakojli sen chivita yejuan se xijkayotl. ²⁸On tiopixki kichiuas on tlauentlalilistli nixpan para nikixtilis itlajtlakol on tlakatl yejuan xkimatiya ika okichiu sen tlajtlakojli, niman nejua niktlajlapojpoluis. ²⁹Sano yejua tlanauatijli onyas para on israelitas

niman on yejuan xchanejkej yejuan chantij nemouan ijkuak tlajtlakoskej maski xkimatijaj.

³⁰’Pero tla sen tlakatl san kineki tlajtlakoua, maski israelita noso yejuan xchanej, niman yejua nechtlaueitia nejua nemoTEKO, ika onkaj nenkixtiskej nemotech. ³¹Xchiuakan ijkon pampa xokitlakaitak notlajtoltsin niman xokitlakamat notlanauatil. Yejuan ika xkixtikan kampa nenchantij, niman nochi itlajtlakol ipan uetsis.”

Castigo para on yejuan tekitis ipan on tonajli Sábado

³²Chika on isaelitas nemiyaj ipan on xalpatlajkan, okinextijkej sen tlakatl yejuan kisentlaliaya kojtlí* ipan on tonajli Sábado.

³³On yejuan okinextijkej on tlakatl okuikakej ixpan Moisés, Aaron, niman nochimej on israelitas. ³⁴Yejuamej san okitsakukej pampa xkimatijaj tlinon kichiuiliskej. ³⁵Kemaj toTEKO okijlij Moisés: “On tlakatl ika onkaj mikis. Nochimej on israelitas ma kixtikan uejka de on campamento niman ompa ma kitemojmotlakan.”

³⁶Yejua ika, on israelitas okixtijkej on tlakatl de on campamento. Niman okitemojmotlakej hasta kaman okimiktijkej, ijkon ken toTEKO okinauatij Moisés.

Intenchayajyo^e intlakeuan on israelitas

³⁷ToTEKO okinots Moisés, niman okijlij: ³⁸“Xkinnotsa on israelitas, niman ijin xkinmijli: Nemejuamej niman nochimej nemouejkakoneuan nochipa xmochijchiuilikan tenchayajyotl para nenkisaloskej ipan itenkuelpachyo nemotlakeuan. On tenchayajyotl nenkichijchiaskej ikan ikpatl yejuan morado.

³⁹Ijkuak nenkitaskej on tenchayajyotl, mechelnamiktis nochi notlanauatiluan yejuan nejua nemoTEKO yonemechmakak para maka nenkelkauaskej nenkintlakamatiskej. Ijkon xnennechkauasnekiskej para nenkichiaskej san tlen nenkinekiskej noso on tlen keleuiya nemotlalnakayo.

⁴⁰Ijkon nenkelnamikiskej niman nenkintlamatiskej nochi notlanauatiluan, niman nennoyaxkauan* yeskej san para nejua, nemoDios. ⁴¹Nejua ninemoTEKO Dios, yejuan onemechkixtij ipan on país Egipto para ninochiuas nemoDios. Nejua nemoTEKO Dios nikijtoua.”

Ixpanteitalis Coré niman icastigo

16 ¹Sen Levita itoka Coré, ikoneu Izhar yejuan teuejkekoneu itech Coat, niman okse yeyimej tlakamej teuejkekoneuan

e 15.36 Itenchayajyo noso itenkuachyo kijtosneki: “su fleco”.

itech Rubén, yejuan intoka katka Datán, niman Abiram ikoneuan Eliab, niman ikoneu Pelet yejuan itoka katka On, ²xipan okitakej Moisés. Iminuan yejuamej onosentlalijkej okse 250 israelitas. Yejuamej kipiayaj tekiuajyotl itech on israelitas niman tlayekankej katkaj. Yejua ika, nochimej on israelitas kintlakaitayaj. ³Nochimej yejuamej onosentlalijkej para okixnamikej Moisés niman Aarón niman ijkin okinmijlijkej:

—Tejuamej hasta xok temechijyouiyaj. Nikan tinochimej tiyaxkauan toTEKO, niman yejua nemi touan tinochimej. Tla ijkon, ¿tline nemejuamej sanoyej nemoueyiliaj niman nemochiuaj ken sanoyej nenuiejueyixtokej itech in israelitas yejuan ikoneuan toTEKO?

⁴Ijkuak Moisés ijkon okak, onotlakuantelkets niman onopachoj hasta ipan tlajli. ⁵Kemaj okijlij Coré iminuan on yejuan iuan yayaj:

—Mostla kualkan temachistis toTEKO akinomej iyaxkauan. Temachistis akinon tlatiochijtlitli yejuan yejua okitlapejpenij para uelis tlauentlalis. ⁶In yejua nenkichiuaskej mostla para tikmatiskej: Tejua Coré, niman nochimej on yejuan nemij mouan, mostla nenkuajkiskej nemopopochkontsitsiuan, niman ⁷xkintlalilikan tlixochtlitli. Kemaj xkintemilikan kopajli niman xkintlalilikan ixpan toTEKO. On akin toTEKO kitlapejpenis, yejua tikselskej ken teyaxka* itech toTEKO. Levitas, yej nemejuamej sanoyej yonemoueyimatkej niman sa nentlayakapanauiyaj.

⁸Kemaj Moisés okijlij Coré:

—¡Xnechkakikan, levitas! ⁹Para nemejuamej, ¿xueyi kijtosneki ika iminDios on israelitas omechtlapejpenij nemejuamej de itech on oksekimej israelitas, niman mechkauilia nennemij nisiu itech yejua para nenkichiuaj on tekittl ipan itabernáculo toTEKO, impampa on israelitas? ¹⁰ToTEKO omitstlapejpenij tejua, Coré, niman nochimej mokniuuan yejuan levitas para nennemiskej itech, ¿niman aman yej no nenkinekij nemochiuaskej tiopixkej? ¹¹¿Tline nenkixnamikij Aarón? Nemejuamej xnenkixnamikij Aarón, yej nenkixnamikij toTEKO.

¹²Kemaj Moisés otlanauatij ma kinotsatij Datán niman Abiram itelpochuan Eliab, pero yejuamej ijkin otlanankilijkej:

—¡Ka, tejuamej xtiaskej! ¹³¿Tejua tiknemilia xueyi kijtosneki ika otitechkixtij ipan on tlajli Egipto kampa sanoyej tlatlaki niman xitlaj* poliui, para aman titechmiktis nikan ipan in xalpatlajkan? ¿Niman no tiknemilia xueyi kijtosneki ika tikneki timochiuas titoueyitekiuaj? ¹⁴Tejua xotitechuikak ipan sen tlajli kampa sanoyej tlatlaki niman xitla poliui. Nion xotitechmakak tlajli kampa tomijlaj yes, nion kampa touvasyo yes. ¿Tikneki titechkajkayajtias tinochimej kenon yejuan xtlachaj? Ka, ¡xtiaskej timitsontaskej!

¹⁵Kemaj Moisés sanoyej okualan, niman okijlij toTEKO:

—¡Maka xkinselili iminuen! Nejua xitlaj* onikinkuilij yejuamej, nion se poloko, niman no xonikinchiuilij itlaj xkuajli nion se de yejuamej.

¹⁶Kemaj Moisés okijlij Coré:

—Mostla xuiyan, tejua niman motlajsotlaiknuiyan, ixpan toTEKO itech on tabernáculo. Aarón no ompa nemis. ¹⁷Cada se de nemejuamej xkiktikan nemopopochkon, niman xkintlalilikan kopajli, niman nenkintlaliskej ixpan toTEKO. Tejua Coré niman Aarón no nenkiktiskej nemopopochkon, niman nenkitlaliskej imintech on 250 popochkontin. ¹⁸Kemaj uajmostla, cada se okikuik ipopochkon, okitlalilij tlixochtli niman okitemilij kopajli niman onotelkets iuan Moisés niman Aarón ixpan on tabernáculo* kampa nemi toTEKO. ¹⁹Coré yokinsentlalijka nochimej on israelitas para kixnamikiskiaj Moisés iuan Aarón ompa ixpan on tabernáculo* kampa nemi Dios. Kemaj ouajnonextij iueyilis toTEKO imixpan nochimej on israelitas.

²⁰Niman toTEKO okijlij Moisés niman Aarón:

²¹—Xmejkuanikan imintech in xkuajkualtin tlakamej, pampa amantsin nikinmiktis.

²²Pero Moisés iuan Aarón onotlakuantelketskej ixpan toTEKO niman onopachojkej hasta ipan tlajli, niman okijtojkej:

—¡Ay toTEKO Dios! Tejua akin tikmaka nemilistli nochi tlakatl, ¿tikualanis iminuan nochimej on israelitas ipampa itlajtlakol san se tlakatl?

²³Niman toTEKO okinankilij Moisés:

²⁴—Xkimijli nochimej on israelitas ma nejkuanian intech iminkajkalan Coré, Datán niman Abiram.

²⁵Kemaj Moisés oyaj kampa nemi, Datán niman Abiram, niman iuan oyajkej on oksejkimej uejueyi tlayekankej israelitas. ²⁶Kemaj Moisés okinmijlij on israelitas:

—Xmejkuanikan itech iminkaj kal on tlakamej yejuan xkuajkualtin, niman maka xkitskikan itlaj yejuan inyaxka para maka nenmikiskej ipampa imintlajtlakol.

²⁷On israelitas onejkuanijkej itech iminkajkal Coré, Datán niman Abiram. Datán niman Abiram majmaniyaj kampa ikalakiyan iminkajkal niman ompa iminuan nemiyaj nochimej infamilias. ²⁸Kemaj Moisés okijtoj:

—Aman nenkimatiskej ika toTEKO nechajtitlani para ma nikchiua nochi in tlajtlamach*, niman ika xnikchiua san pampa nejua nikneki. ²⁹Tla in tlakamej mikij ikan mikilistli ken nochi tlakatl miki ijkuak yoajsik para mikis, tla ijkon, kijtosneki xtoTEKO onechajtitlan. ³⁰Pero tla toTEKO kichiuas itlaj yejuan xkaman nenkitayaj, niman in tlajli tlapouis niman

kintolos yejuamej iuan nochi on tlen kipiayaj, niman nochimej tlalpachiuiskej ijkuak sanken* yoltokej, tla ijkon, nenkimatiskej ika on tlakamej yejuamej okualanijkej toTEKO.

³¹Ijkuak Moisés otlan tlajtoua, on tlajli kampa yejuamej nemiyaj ouajtetsayan, ³²niman okintoloy nochimej on tlakamej yejuan ompa nemiyaj iuan Coré, niman nochi infamilias iuan nochi tlen kipiayaj. ³³Nochimej yejuamej oxinitoj yoltokej ijtik on tlajli iuan nochi on tlen inyaxka katka, niman sakin*, on tlajli oksejpa onotsaku. Ijkon opolijkej yejuamej intech on israelitas. ³⁴Ijkuak on israelitas yejuan ompa nemiyaj okkakej ken omojkatsajtsikej on yejuan ouetsitoy, oontlatlaksakej niman kijtouayaj: “tiauij de nikan, maka yej no techtolos in tlajli.” ³⁵No ijki, toTEKO okuajtitlan tlitl niman okintlatij nochimej on 250 tlakamej yejuan kitlatiayaj kopajli.

³⁶Niman toTEKO okijlij Moisés: ³⁷“Xnauati Eleazar itelpoch Aarón para ma kinkixti nochimej on popochkontsitsimej yejuan onkatkaj ne kampa otlatlakej on tlakamej, niman uejka ma kixiniti on tlixochtli yejuan sanken* onkaj ipan on popochkontsitsimej pampa on popochkontsitsimej tlatiochijtin. ³⁸On popochkontsitsimej de on tlakamej yejuan omikkej ipampa intlajtlakol, tlatiochijtin onokajkej pampa okintekitiltijkej para kitlatiayaj kopajli nixpan. Xkinkuikan niman xkinchijchiuakan láminitas para xpepechokan ipan on tlaixpan*. Ijkuak on israelitas kitaskej, kelnamikiskej on tlen temojtij onochiu.”

³⁹On tiopixki Eleazar okisentlalij nochi on popochkontsitsimej de bronze yejuan okitekitiltijkej on tlakamej yejuan omikkej ipan on tlitl, niman otlanauatij ma kinchijchiuakan laminitas para kipepechouuiliskej on tlaixpan*.

⁴⁰In laminitas yejuan pepechijtokej ipan on tlaixpan*, nochiua ken sen tlaixkuitijli* para nochimej on israelitas kimatiskej ika yajuan xtekoneuan itech on tiopixki Aarón, xuelis kitlatiskej kopajli ixpan toTEKO ipan on tlaixpan*. Pampa tla kichiuaskej no tlatlaskej ken ipan onochiu Coré niman itlajsokaikniuan. Niman nochi onochiu ken toTEKO okinauatij Eleazar itechkopa Moisés.

⁴¹Niman uajmostla, nochimej on israelitas opejkej kixnamikij Moisés iuan Aarón. Niman ijkin okinmijlijkej:

—¡Nemejuamej ye nenkinmiktijtokej ikoneuan toTEKO!

⁴²Ijkuak nochimej on israelitas okinteyequalotoj Mosisés iuan Aarón para kinmixnamikiskej, yejuamej ontlachixkej itech on tabernáculo* kampa Dios nemi. Ompa on moxtli amanaman okitlapachoy on tabernáculo, niman iueyilis toTEKO ouajnonextij.

⁴³Kemaj Moisés iuan Aarón oyajkej ixpan on tabernáculo* kampa nemi Dios. ⁴⁴Niman toTEKO okijlij Moisés:

⁴⁵—Xmejkuanikan intech on tlakamej, pampa amantsin nikinmiktis.

Niman Moisés iuan Aarón onotlakuantelketskej niman onopachojkej hasta ipan tlajli ixpan toTEKO. ⁴⁶Kemaj Moisés okisijkajlij Aarón:

—Xkuajkitetsi mopopochkontsin. Xtlalili tlixochtli yejuan onkaj ipan on tlaixpan*, niman xtlalili kopajli. Niman amanaman xuiya kampa nemij on israelitas, niman xtlajtlanili Dios ma kintlapojpoluili intlajtlakoluan, pampa toTEKO sanoyej yokualan niman yokitlalij sen temojtij kokolistli yejuan yopeu kinmiktia.

⁴⁷Aarón okichiu on tlen Moisés okinauatij, niman onotlaloj kampa nemiyaj on israelitas. On temojtij kokolistli yejuan Dios okuajtitlan yopejka kinmiktia on israelitas. Kemaj Aarón okitlatij on kopajli niman okitlajtlanilij Dios ma kitlapojpolui intlajtlakol on israelitas. ⁴⁸Kemaj Aarón onotelkets kampa tlantiaya on kokolistli intech on yejuan yomikkej niman on yejuan yoltokej. Niman on temojtij kokolistli onoteltij. ⁴⁹Pero ijkuakon, yomikkaj 14 mil 700 tlakamej aparte de on yejuan omikkej iuan Coré. ⁵⁰Ijkuak onoteltij on temojtij kokolistli, Aarón onokuep kampa nemiya Moisés ipan ikalakiyan on tabernáculo* kampa nemi Dios.

Ibastón Aarón oitsmolín

17 ¹ToTEKO okinots Moisés niman okijlij: ²“Xkinnauati on israelitas para cada tlayekanki itech cada tribu* ma kuajki sen bastón. Nochi uajnochuias majtlaktli uan ome. Niman ipan cada bastón tejua tikijkuilos itoka on tlayekanki yejuan iyaxka* on bastón. ³Niman tikijkuilos itoka Aarón ipan on bastón yejuan iyaxka* itribu* Leví. Niman ijkon onyas sen bastón para cada tlayekanki ipan cada tribu. ⁴On bastones tikintlalis ijtik on tabernáculo* kampa nejua ninemi, ixpan on yekcaja yejuan kipiya on pacto* kampa nejua ninonamiki nemouan. ⁵Nejua nikchuias para itsmolínis ibastón on akin nejua niktlapejpenis ken ueyi tlayekanki tiopixki. Ijkon on israelitas yok mechteneuiliskej on tlen xkuajli nixpan nejua nemoTEKO.”

⁶Ijki tej, okinmijlij Moisés on israelitas, niman cada tlayekanki de on tribus okuajkik ibastón. Nochi, onosentlajli majtlaktli uan ome bastones. Niman no teuan ompa onkakta ibastón Aarón. ⁷Kemaj Moisés okintlalij on bastones ixpan toTEKO ipan on tabernáculo* kampa onkaj on yekcaja.

⁸Niman uajmostla ijkuak Moisés oyaj ipan on tabernáculo, okitak itsmolínki ibastón Aarón yejuan kisa itech itribu* Leví. On ibastón Aarón kipiyya iitsmolínajlo, ixochiyo, niman hasta kipiyya itlakyo yejuan itoka almendra. ⁹Kemaj Moisés okinkixtij nochi on bastones yejuan onkatkaj ixpan toTEKO niman okintitij nochimej on israelitas. Niman sakín*, ijkuak on israelitas tlayekankej okitakej on tlen onochiu, cada se okikuik ibastón.

¹⁰Kemaj toTEKO okijlij Moisés: “Oksejpa xtlali ibastón Aarón ixpan on yekcaja niman ompa nokauas para tlaixkuitijli* inka on xipanteitanij israelitas. Niman ijkon xok nechixnamiktinemiskej niman xmikiskej.”

¹¹Moisés okichiu nochi ken toTEKO okinauatij. ¹²Pero on israelitas okijlijkej Moisés: “¡Tejuamej tixpolijtoke! ¡Nesi tinochimej timikiskej! ¹³Nochimej yejuan kinisiuiyaj itabernáculo toTEKO, mikij. Tla ijkon, ¿tinochimej timikiskej?”

Intekiu on tiopixkej niman levitas

18 ¹ToTEKO okijlij Aarón: “Ijkuak on israelitas kichiuaskej itlaj tlajtlakojli itechika on tabernáculo, tejuua niman mokoneuan niman nochimej on levitas, nenkipiyaskej on tekitl para nentlajtlaniskej ma kintlapojpoluikan. Pero ijkuak tejuua niman mokoneuan itlaj xkuajli nenkichiuaskej ipan nemotekiu ken tiopixkej, xakaj uelis nemopampa tlajtlanis. Jej sano nemejuamej nemopampa nentlajtlaniskej tetlajpojpoluulistli.

²Xchiua para on levitas yejuan itech tiualejtikaj, ma mitspaleuikan tejuua niman motelpochuan ijkuak nenkichiuaj nemotekiu ipan on tabernáculo* kampa onkaj nopacto*.

³Yejuamej mechpaleuiskej ipan on tlajtlamach* tekitl ipan on tabernáculo. Pero xuelis nonisiuiskej itech on tlajtlamach*

yejuan ompa notekitiltia noso itech on tlaixpan*, pampa tla ijkon kichiuaskej, yejuamej mikiskej, niman nemejuamej no nenmikiskej. ⁴Yejuamej nemouan kichiuaskej nochi on tekitl yejuan nonekis ipan on tabernáculo* kampa ninemi, pero nion se tlakatl yejuan xlevita uelis nonisiuis nemotech kampa nentekitij.

⁵San tejuua niman motelpochuan uelis nentekitiskej ipan on tabernáculo* niman itech on tlaixpan*. Ijkon xok nikualanis iminuan on israelitas. ⁶Nejua yonikinxejoj on nemoknivan levitas de itech nochimej on oksekimej israelitas para nemechinmakas nemejuamej. Yejuamej noteyaxkauan niman mechpaleuiskej ipan on tekitl yejuan noneki ipan on tabernáculo* kampa ninemi.

⁷Pero on tekitl yejuan nochiua kampa tlaixpan* niman yejuan nochiua kalijtik kampa más Tlayekkan ikuitlapan on yekcortina, san tejuua Aarón niman motelpochuan uelis nenkichiuaskej pampa nejua onemechtlalij tiopixkej. Pero tla yakaj yejuan xtiopixki kichiuas on tekitl ken sen tiopixki, ika onkaj mikis.”

On tiopixkej niman on levitas kiseliskej tlen kikuaskej

⁸ToTEKO okijlij Aarón:

“Nejua nimitsmaka nochi on uentli yejuan nechuentlaliliaj on israelitas. Nochi uentli tlatiochijtl yejuan xtlatla, nemechaxkatia tejuua niman motelpochuan. In nokauas sen tlanauatijli para

nochipa. ⁹Nochi uentli tlatiochijtlí yejuan kixelouaj para xkitlatiaj, tejava motech nokauas. On uentli de harina, on uentli ipampa tlajtlakojli, noso on uentli ipampa tlajtlakojli de culpa, nemoyaxka* yes. Nochi in uentin tlatiochijtin yejuan nechmakaj on israelitas para tejava yes niman para motelpochuan. ¹⁰Nochimej mokoneuan yejuan tlakamej uelis kikuaskej in uentli yejuan tlatiochijtlí, pero san uelis kikuaskej kampa tlayekkan, pampa in uentli tlatiochijtlí.

¹¹'On uentli yejuan kuiteuaj niman kooliniaj, no nimitsmaka nochi, tejava iuan nochimej mokoneuan tlakamej niman siamej yejuan sanken* motech nemij. In yes sen ley para nochipa. San akinon yejuan mofamilia, tla chipauak iyojlo nixpan, uelis kikuas on uentli. ¹²No timitsmaka nochi on achtoj tlakoyotl yejuan on israelitas nechajkuiliaj cada xipan: on aceite yejuan más kuajli, nochi vino yejuan más kuajli niman nochi trigo yejuan más kuajli. ¹³On tlen achtoj kipixkaskej on israelitas de nochi tlen kitokaj yejuan nechmakaskej, nochi para tejava yes. San akinon yejuan mofamilia uelis kikuas tla chipauak iyojlo nixpan. ¹⁴Nochi uentli yejuan on israelitas nechmaktiliskej nejua nemoTEKO, moyaxka* yes. ¹⁵Nochi iminyenkuiyokoneuan on israelitas niman iminyenkuiyokoneuan iminyolkauan yejuan nechinmakaskej nochiuaskej para tejava. Pero de on iminyenkuiyokoneuan on israelitas niman iminyenkuiyokoneuan iminyolkauan yejuan xchipajkej, nonekis nechinkouiliskej. ¹⁶Ijkuak iminyenkuiyokoneuan iminyolkauan kipiwaskej se metstli, nechinkouiliskej ika makuijli tomin de plata yejuan cada se kipiya majtlaktli uan se gramos ika yetik ijkon kech ika kitlajtlanij ipan on tabernáculo.

¹⁷'Pero maka kitlaxtlauaskej para nechkouiliskej iyenkuiyou sen vaca, noso sen borrega noso sen chiva pampa on yolkej tlatiochijtin niman tlakauiltin san para nejua. Noneki tikinmiktis, niman iminyesyo ika tikajuichis on tlaixpan*. Niman ichajka tiktlatis ken sen uentli yejuan tlatla niman yejuan ajuiyak para nejua nemoTEKO. ¹⁸Tejava motech nokauas on nakatl, no ijki kenon iyelpannakayo yejuan uentli tlaoolinijli niman iyekmametskojyo on yolki. ¹⁹Nochi tlen on israelitas kixelouaj para kiuentlaliaj nixpan, nimitsmaka tejava niman motelpochuan niman mochpochuan yejuan sanken* chantij mouan. In sen ley yejuan onyas para nochipa, sen pacto* yejuan xkaman nopatlas nion xkaman tlamis. In sen pacto* yejuan nejua mouan nikchiua niman iuan mouejkakoneuan."

²⁰ToTEKO okijlij Aarón: "Tejava xtikpiyas tlaltin nion tlajtlamach* ipan on país de Israel ken on oksekimej israelitas. Nejua ninochiuas nimoyaxka niman nimoherencia intsajlan on israelitas.

²¹ 'On levitas nikinmakas ken herencia nochi on diezmos* yejuan nechmakaj on israelitas. In yejua ika nikintlaxtlauilis on intekiu yejuan kichiuaj ipan on tabernáculo* kampa ninemi. ²² On oksekimej israelitas xok ueliskej kinisiuiskej on tabernáculo* kampa nejua ninemi, pampa tla kinisiuiskej, tlajtlakoskej niman mikiskej. ²³ On levitas san yejuamej kipiymaskej on tekittl ipan on tabernáculo* kampa ninemi. Niman yejuamej kipiymaskej tlajtlakojli tla itlaj xkuajli kichiuaj ompa. In sen ley yejuan nochipa onyas para nochimej on tatajtin niman inuejkkoneuan. On levitas xuelis kiseliskej herencia de itlaj tlajli iminuan on oksekimej israelitas. ²⁴ Pero yejuamej nikinmaka nochi on diezmos* yejuan on israelitas nechmakaj nejua nemoTEKO. Yejua ika, ijkin yonikimijlij: Nemejuamej Levitas xnenkiseliskej tlajli ijkuak on israelitas kiseliskej imintlal."

²⁵ ToTEKO okinots Moisés niman okijlij: ²⁶ "Xkinmijli on levitas ika ijkuak kiseliskej on diezmos* yejuan on israelitas kiminmakaskej, yejuan nejua yonikinmakak on levitas ken herencia, yejuamej kixtiskej imindiezmo* itech on diezmos yejuan kiseliskej, para nechmakaskej nejua, nemoTEKO. ²⁷ On yejua yes imindiezmo* yejuan nechamakaskej ken tlaxtlauijli nejua nemoTEKO no sa no ijki ken nechmakaj on israelitas de on tlen kitokaj ijkuak nechmakaj imintrigo noso iminvino. ²⁸ Ijkon tej, on levitas kixtiskej imindiezmo* itech on diezmos* yejuan kiselias itech on israelitas. Niman on uentli yejuan nechmakaskej nejua nemoTEKO, kimakaskej on tiopixki Aarón. ²⁹ Itech on diezmos yejuan on levitas kiseliskej, yejuamej noneki onkuaj kitlaliskej yejuan más kuajli para nechmakaskej. In yejuan más kuajli kiselis Aarón.

³⁰ 'No xkimijli on levitas ika nejua, nemoTEKO, niksellis imindiezmo* on levitas ken yejuamej kiselias imindiezmo* itech on yejuan tlatokaj ijkuak nechmakaj imintrigo noso iminvino. ³¹ On levitas niman iminfamilias uelis kikuaskej san kanon, pampa on yejua imintlaxtlauil ika on imintekiu ipan on tabernáculo* kampa ninemi. ³² Ijkuak yonechmakakej nochi on tlen más kuajli, uelis kikuaskej nochi on tlen onokau, niman xtlajtlakoskej, pampa yonechmakakej on tlen más kuajli. Niman ijkon xkijtlakoskej on uentli tlatiochijtl de on israelitas niman xmikiskej."

Kenijki techipualo ixpan Dios

19 ¹ ToTEKO okijlij Moisés niman Aarón: ² "Nejua nemoTEKO, nemechmaka in okse tlanauatijli: Xkimijli on israelitas ma mitsajuikilikan sen becerra yejuan kipiya itsojmiyo chilatik yejuan xkanaj tlakokojli* ipan itlakayo, niman yejuan xe kaman

kitekiltitijaj para tlaxoponia*. ³Nemejuamej nenkimakaskej on tiopixki Eleazar, niman yejua kixtis uejka de on campamento niman tlanauatis ixpan ma kimiktikan. ⁴Kemaj on tiopixki Eleazar kikuis achijtsin iyeyso on becerra ika imajpil, niman ika tlajuichis chikomempa imelajkan ika on yektioipan kampa ninemi. ⁵Kemaj ixpan on tiopixki Eleazar, kitlatiskej ikuetlaxyo*, innakayo, iyeyso niman ixixalis. ⁶On tiopixki kikuis seki kojtlit* de cedro, se imakojyotsin on xojtli itoka hisopo, niman tela yejuan chichiltik, niman nochi kontlalis ipan on tlitl kampa tlatlatikaj on becerra.

⁷Kemaj on tiopixki kipakas itlaken, niman naltis. Kemaj uelis kalakis ipan on campamento, pero yejua sanken* xchipauak yes hasta tlapoyajkan. ⁸Niman on tlakatl yejuan okitlatij on becerra, no kipakas itlaken niman naltis. Pero yejua sanken* xchipauak yes hasta tlapoyajkan. ⁹Kemaj okse tlakatl, yejuan chipauak nixpan, kisentlalis on tlikonextli de on becerra niman konkauas kampa tlachopajkan ikiauak on campamento. On tlikonextli kitekiltitisekej on israelitas para ika kuektlaliskej on atl yejuan para chipaualistli. Nochi in yes sen uentli ipampa tlajtlakojli. ¹⁰On yejuan okisentlalij on tlikonextli, kipakas itlaken. Pero yejua sanken* xchipauak yes hasta tlapoyajkan. In yejua sen ley yejuan para nochipa onyas para nemejuamej yejuan nenisraelitas, niman para on xchanejkej yejuan chantij nemouan.

¹¹Yejuan kimatocas yakaj mikatsintli, xok chipauak yes nixpan chikome tonajli. ¹²Ipan on ika yeji tonajli, niman ipan on ika chikome tonajli noneki nochipauas ika on atl ikatlakajtli techipaua, niman nokauas chipauak. Pero tla xnochipaua ipan on ika yeji tonajli niman ipan on ika chikome tonajli, xchipauak yes nixpan. ¹³Tla yakaj kimatoka sen mikantsintli niman xnochipaua, kijtlakos notabernáculo, nejua nemoTEKO. Noneki nenkixtisekej intech on israelitas pampa xokajuichijkej ika on atl ikatlakajtli techipaua, niman yejua nokauas xchipauak nixpan.

¹⁴In yejua tlanauatijli yes para ijkuak yakaj mikis ikalijtik. Nochimej yejuan nemisekej ijtik on kajli niman nochimej yejuan kalakisekej ompa, nokauaskej xchipajkej nixpan chikome tonajli. ¹⁵Nochi kontsitsimej yejuan onokej ipan on kajli niman xkuajli tsakutokej no xok chipajkej yeskej nixpan.

¹⁶Tla yakaj nemi mijlaj niman kimatoka sen mikatsintli yejuan okimiktijkej ipan guerra, noso yejuan san ompa omik, noso tla kimatocas iomiyouan yakaj, noso sen tlalkontli, xok chipauak yes nixpan chikome tonajli.

¹⁷Niman para yakaj nochipauas, noneki xkuikan achijtsin itlikonexyo on becerra yejuan okitlatijkej ipampa on tlajtlakojli, niman xtlalikan ipan sen tlaltekomatl niman xtekilikan atl de

amejli. ¹⁸Kemaj sen tlakatl yejuan chipauak nixpan, kikuis sen imakojoyo on xojtli itoka hisopo, kipolaktis ipan on atl niman ika kajuichis on kajli, niman nochi on kontsitsimej, niman no kimajuichis on tlakamej yejuan ompa nemij. Niman no kajuichis on yejuan okimatokak on mikaomimej noso on mikatsintli yejuan okimiktijkej, noso san omik, noso tla okimatokak sen tlalkontli. ¹⁹On tlakatl yejuan chipauak nixpan, noneki kajuichis on yejuan xchipauak nixpan, ipan ika yeyi tonajli niman kampa ika chikome tonajli. Ijkuak ajsis ika chikome tonajli ye kipiayas chipauak. Kemaj on tlakatl yejuan xchipauak, naltis niman kipakas itlaken, pero sanken* xchipauak yes hasta tlapoyajkan.

²⁰‘Pero tla yakaj yejuan xchipauak nixpan xnochipaua, ika onkaj nenkixtiskej ipan on campamento, pampa kijtlakoua notabernáculo, nejua nemoTEKO, pampa tla xokajuichijkej ika on atl ikatlakajtli techipaua, xnemi chipauak nixpan. ²¹In yes sen ley para nochipa. On yejuan teajuichia ika on atl ikatlakajtli techipaua, ika onkaj kipakas itlaken. Niman on yejuan kimatokas on atl ikatlakajtli techipaua, xok chipauak yes nixpan hasta tlapoyajkan. ²²Nochi tlen kimatokas yakaj yejuan xchipauak nixpan, nokauas xchipauak. Niman tla yakaj kimatokas sen tlakatl yejuan xchipauak nixpan, yejua no xok chipauak yes nixpan hasta tlapoyajkan.”

Okis atl ipan on ueyi tetl

(Ex 17.1-7)

20 ¹Ipan on achtoj metstli de on xipan yejuan uetsi ipan abril de intonalamau on hebreos*, on israelitas oajsikej ipan on xalpatlajkan itoka Zin niman onokajkej ne kampa itoka Cades. Ompa omik María niman ompa okitokakej.

²Pampa xonkatka atl para koniskej on israelitas, onosentlalijkej nochimej para onajkomankej niman okualankej itechkopa Moisés iuan Aarón, ³niman ijkin okijlijkej Moisés:

—Más kuajli yeskia tla timikiskiaj iuan on oksekimej israelitas yejuan okinmiktij toTEKO. ⁴¿Tline onentechajuikakej tejuamej tiikoneuan toTEKO ipan in xalpatlajkan? ¿Tline nenkinekij ma timikikan nikan iuan toyolkauan? ⁵¿Tline onentechkixtijkej ipan on país Egipto niman onentechajuikakej nikan kampa sanoyej xkuajli? Nikan xueli itlaj tiktokaj. Xonkaj higos, nion uvas nion granadas. Nion xitlaj* atl para tikoniskej.

⁶Moisés iuan Aarón okinkajtejkej on israelitas, niman oyajkej ne ikalakiyan on tabernáculo* kampa nemi Dios, niman ompa onotlakuantelketskej niman onopachojkej hasta ipan tlajli. Kemaj iueyilis toTEKO ouajnonextij inmixpan. ⁷Niman toTEKO okijlij Moisés:

⁸—Xkonkui on bastón yejuan onkaj ixpan on yekcaja, niman ika itlapaleuil mokniu Aarón, xkinsentlali nochimej on israelitas. Kemaj imixpan nochimej, xnotsa on ueyi tetl niman xkijli ma mechmaka atl. Niman tikitás ika ipan on ueyi tetl kisas atl para atliskej nochimej yejuamej niman iminyolkauan.

⁹Moisés okikuik on bastón yejuan onkatka ixpan toTEKO ijkon ken yejua okinauatij. ¹⁰Kemaj Moisés iuan Aarón okinsentlalijkej on israelitas ixpan on ueyi tetl, niman Moisés okinmijlij:

—Xkakikan xipanteitanij, ¿manin uelis temechkixtiliskej atl ipan in ueyi tetl para nematliskej?

¹¹Niman ijkuak Moisés ijkon okijtoj, onomatelkets niman okimailij okpa on ueyi tetl ikan on bastón. Kemaj ouajkuepon sanoyej miyek atl. Ijkon, on israelitas niman iminyolkauan oatlikej.

¹²Pero toTEKO okijlij Moisés niman Aarón:

—Pampa xonnennechneltokakej niman xonnennechueyitenejkej imixpan on israelitas, nemejuamej xnenkalakiskej iminuan ipan on tlajli yejuan yonikimprometerouilij ika nikinmakas.

¹³In yejua on amejli yejuan okitokayotijkej Meribaʼ pampa ompa on israelitas okixnamikej toTEKO, niman yejua okintitij iyekchipaualis.

On rey ne Edom xokinkauilij ma panokan on israelitas

¹⁴Chika on israelitas nemiyaj ne Cades, Moisés okititlan keski itlajtojkau itech on rey ne Edom para ijkin ma kijlitij: “Tejuamej titeuejkekoneuan itech mokniu Israel. Tejua kuajli tikmati nochi on tlajyouilistli yejuan yotikpanokej. ¹⁵Toachtotajuan oyajkej ipan on país Egipto niman ompa sanoyej ouejkajkej nemij.

Pero on egipcios sanoyej otechtlajyouiltijkej tejuamej niman toachtotajuan. ¹⁶Kemaj otitoueyikatsajsilijkej itech toTEKO, niman yejua otechkak. Yejua ika, otechajtitanilij se iángel, yejuan otechkixtij ipan on país Egipto. Niman aman nikan tinemij ipan in ueyikalpan Cades, nису kampa tlami mopaís.

¹⁷Yejua ika, timitstlajtlaniliaj, xtechkauili ma tipanokan ipan moueyitlalpan. Tejuamej xtikalakiskej kampa onkaj tlatoktli noso kampa uvasyoj. Nion xtikoniskej atl de nemoatlaltekonuan. San tipanoskej ipan on ueyi ojtli niman xtiktalalkausiskej on ojtli hasta kaman tikisaj ipan moueyitlalpan.”

¹⁸Pero on rey de Edom okinnankilij:

—Maka xpanokan ipan notlal, pampa tla nenpanoskej, nejua iminuan nosoldados temechniisokiskej.

¹⁹On israelitas oksejpa okijlijkej:

f 20.13 Meriba kijtosneki “kampa okixnamikej”.

—San tiaskej ipan on ueyi ojtli kampa nochi tlakatl nojuitia, niman tla tejuamej noso toyolkauan konij atl ipan moatlaltekonuan timitstlaxtlauiliskej. San xtechkauili ma tipanokan ipan moueyitlalpan.

²⁰ Pero on rey de Edom okiminankilij:

—¡Ka, xnempanoskej!

Niman okis iuan miyekej isoldados para okintsakuilitoj on israelitas ²¹ para xokinkauilij ma panokan ipan iueyitlalpan. Kemaj on israelitas okitejtemojkej okse ojtli.

Omik Aarón

²² Nochimej on israelitas okiskej ne Cades, niman oajsikej hasta ipan on tepetl Hor. ²³ Ompa ipan on tepetl Hor nisiu kampa tlami on ueyitlalpan Edom, toTEKO okijlij Moisés iuan Aarón: ²⁴ “Aarón ye mikis. Niman xkalakis ipan on tlajli yejuan yonikinyaxkatij on israelitas, pampa nepa itech on amejli Meriba xonenkitlakamatkej on tlen nejua onemechnauatij. ²⁵ Tejua, Moisés, xkuika Aarón iuan Eleazar, on itelpoch ikuapan on tepetl Hor. ²⁶ Ompa tikixtilis Aarón itiopixkatlaken, niman tiktlaliltis Eleazar, ikoneu. Niman Aarón ompa mikis.”

²⁷ Moisés okichiu nochi tlen toTEKO okinauatij. Niman nochimej on israelitas okitakej ken yejuamej otlejkokej ipan on tepetl Hor. ²⁸ Niman ompa Moisés okixtilij Aarón itiopixkatlaken niman okitlaliltij Eleazar. Niman ompa ikuapan on tepetl omik Aarón, kemaj Moisés niman Eleazar ouajtemojkej de ipan on tepetl. ²⁹ Ijkuak on israelitas okimatkej ika Aarón yomik, okichokilijkej 30 tonajli.

On israelitas okintlankej on cananeos

21 ¹ Nemiya sen rey cananeo yejuan tekiuaj katka ipan on ueyikalpan Arad, ipan on iueyitlalpan Néguev. Ijkuak okak ika on israelitas uajlayaj ipan on ojtli itoka Atarim, okinuijsokito niman sekimej israelitas okintsaku. ² Kemaj on israelitas okichijkej sen tlajtolmakalistli ixpan Dios, niman ijkín okijlijkej: “Tla titechpaleuis para tikintlaniskej on cananeos, tejuamej tikinxoxotoniskej nochi iminuejueyikalpanuan.” ³ ToTEKO okinkak on israelitas niman okimpaleuij para okintlankej on cananeos, ijkón ken yejuamej okitlajtlanilijkej. Yejuamej otlán kiminmiktiaj on cananeos niman okinxoxotonijkej nochimej on uejueyi kalpanmej. Yejua ika, ompa okitokayotijkej Hormas.

On kouatl de bronce

⁴ On israelitas okiskej de on tepetl Hor, niman oyajkej ipan on ojtli yejuan yau Mar Rojo. Okiyeualojkej on país Edom para

g 21.3 Horma kijtosneki “tlaxoxotonijli”.

xokalakkej ompa. Niman ipan ojtli opeu tlauelmikij. ⁵Kemaj opejkej tlamach kijtouiiaj toTEKO Dios niman Moisés. Ijkin kijtouiayaj:

—¿Tline onentechkixtijkej Egipto para ma timikikan ipan in xalpatlajkan? ¡Xitlaj tlen tikuaskej, nion atl para tikoniskej! ¡Niman ika in maná nion xtixuij! ¡Sanoyej yotiyolajsikej ika in xkuajli tlakuajli!

⁶Yejua ika, toTEKO okinuajtitanilij kouamej* yejuan sanoyej pajyojkej^h para ma kinkuajkuakan, niman miyekej israelitas omikkej. ⁷Kemaj on israelitas oyajkej kampa nemiya Moisés niman okijlijkej:

—Otitlajtlakojkej pampa otikijtojkej tlen xkuajli itech toTEKO niman motech tejua. ¡Xtlajtlanili toTEKO ma kimejkuani totech in kouamej!

Kemaj Moisés okitlajtlanilij toTEKO ma kintlapojpolui on israelitas. ⁸Niman toTEKO okijlij Moisés:

—Xchijchiua sen teposkouatl yejuan tlajtlachas ken on kouamej, niman xpilo tlakpak ikuapan sen kojtlí. Niman ijkuak sen kouatl kikuas yakaj tlakatl, ma kiajkoitati on kouatl yejuan ajkopilkak, niman ijkon pajtis.

⁹Yejua ika, Moisés okichijchiu sen kouatl de bronce niman okajkopiloj ipan sen kojtlí, niman ijkuak yakaj kikuaya kouatl, san konajkoitaya on kouatl de bronce niman xmikiya.

On ojtli kampa onejnenkej on israelitas

¹⁰On israelitas oyajkej niman onochachantitoj kampa itoka Obot. ¹¹De Obot okiskej, okitokakej inojui niman onochachantitoj Ijé-abarim ipan on xalpatlajkan, kampaka ikisayan tonaltsintli de iueyitlalpan Moab. ¹²De Ijé-abarim okiskej niman onochachantijkej ipan on ixtlauatl de Zered. ¹³Kemaj oyajkej niman onochachantijkej iokse lado on río Arnón. On río Arnón onkatka ipan on ueyi xalpatlajkan yejuan peua ipan iminueyitlalpan on amorreos. Niman no yejua tlatektoya kampa nonamikiyaj iminueyitlalpan on moabitas niman on amorreos. ¹⁴In yejua kiteneua on Amamoxtli de Itlauijsokilisuan toTEKO, niman ijkin kijtoui:

“Otiujapanokej itech Vaheb, ipan iueyitlalpan Sufá,
ipán on atlautsitsimej niman ipan on río Arnón,

¹⁵niman intenken on atlautsitsimej yejuan ajsij hasta ipan
iueyitlalpan Ar,

niman ajsi hasta kampa notlalnamiki iuan on país Moab.”

h 21.6 Sanoyej pajyojkej kijtosneki: “Kipiyaj miyek veneno”.

¹⁶De on río Arnón oyajkej hasta Beerⁱ. Ompa onkaj on atlaltekontli* kampa toTEKO okijlij Moisés: “Xkinsentlali nochimej on israelitas niman nejua nikinmakas atl.”

¹⁷Yejua ika, ipan on tonajli on israelitas ijkin onokuikatijkej:

“¡Ma kueponi atl ipan in atlaltekontli*!

¡Xkuikatlalikan in atlaltekontli*!

¹⁸¡On tlayekankej okichkuakej ika intekiuajbastón,

On uejueyitlayekankej chanejkej ipan on kalpan okichkuakej ika inbastón!

Kemaj on israelitas oyajkej de on xalpatlajkan hasta oajsikej Matana, ¹⁹de Matana oyajkej Nahaliel, de Nahaliel oyajkej Bamot, ²⁰niman de Bamot oyajkej ipan on ixtlauatl yejuan onkaj ipan on iueyitlalpan Moab, hasta ikuapan on ueyi tepetl Pisga. De ikuapan on tepetl, ueliya ontlachayaj hasta ipan on xalpatlajkan.

On israelitas okitlankej on rey Sehón

(Dt 2.26-37)

²¹On israelitas okintitlankej keskimej intlajtojkaupan para okitatoj on rey Sehón yejuan rey de on amorreos, para ijkin ma kijlikan:

²²—Xtechkauili ma tipanokan ipan moueyitlalpan. Xtikalakiskej ipan nemotlatok, noso kampa onkaj nemouvasyoj. Nion xtikoniskej atl ipan nemoatlaltekonuan. San tipanoskej ipan on ueyi ojtli niman xtiktalalkauiskej hasta kaman tikisaj ipan moueyitlalpan.

²³Pero on rey Sehón xokinkauilij ma panokan on israelitas ipan iueyitlalpan. Yej okinsentlalij nochimej isoldados niman oyajkej, okintsakuilitoj on israelitas ipan on xalpatlajkan. Niman ijkuak oajsikej Jahaza, ompa okinuijsokkej. ²⁴Pero on israelitas oteixnamikkej niman otetlankej. Niman okinoyaxkatijkej iueyitlalpan Sehón yejuan peua itech on río Arnón hasta on río Jaboc. Kijtosneki okinoyaxkatijkej iueyitlalpan Sehón desde kampa peua iminueyitlalpan on amonitas yejuan kuajli tepanyeualtsakutikatkej.

²⁵Ijkin tej, on israelitas okinoyaxkatijkej nochi on inueyikalpanuan on amorreos. No ijki, okinoyaxkatijkej on ueyikalpan Hesbón niman ikalpanuan yejuan itech nomandarouaj niman yejuamej ompa ochantikej. ²⁶Hesbón yejua capital katka, kampa chantiya on rey Sehón yejuan kinmandarouaya on amorreos. Yejua okichijka guerra iuan on yejuan achtoj opanok

i 21.16 Beer kijtosneki: “atlaltekontli*”.

rey de Moab, niman okuilijka nochi on tlajli hasta on río Arnón.
²⁷Yejua ika, on xochikuikatenejkej ijkin okijtojkej:

“¡Xuajlakan ipan in ueyikalpan Hesbón,
 iueyikalpan on rey Sehón!

¡Oksejpa xchijchiuakan niman xtepanyeualtsakuakan!

²⁸Desde Hesbón, on iueyikalpan on rey Sehón,
 okiskej isoldados ken sen tlitl yejuan nochi kitlatia,
 niman okixoxotonij on kalpan Ar, ipan on país Moab.
 Niman isoldados okinxoxotonijkej on tepemej
 yejuan kiyeualojtokej on kalpan Arnón.

²⁹¡Lástima, tejua país de Moab!

¡Tixpolijtikaj tejua yejuan tikmauistilia on dios Quemós!
 Modios okinkauilij motelpochuan ma chojcholokan ipan
 okseki países,

niman mochpochuan yokinmichtek on rey Sehón.

³⁰Pero yotikinxoxotonijkej on uejueyikalpanmej desde Hesbón
 hasta Dibón

niman Nofa hasta on ueyikalpan Medeba.”

On israelitas okitlankej on rey de Basán itoka Og

(Dt 3.1-11)

³¹Ijkon tej on israelitas okinoyaxkatijkej iminueyitlalpan on amorreos. ³²No ijki, Moisés okintitlan keskimej tlakamej ma ichtakatlajtlachatij ipan on ueyikalpan Jazer. Niman on israelitas okinoyaxkatijkej Jazer iuan nochi on kalpanmej yejuan nijnisui onkatkaj, niman okinkixtijkej nochimej on amorreos yejuan ompa chantiyaj. ³³Sakin, oyajkej para Basán, pero Og, on rey de on ueyitlalpan Basán, okinsentlalij nochimej isoldados niman ouajlaj okinuijsokiko on israelitas ipan on ueyikalpan Edrei.

³⁴Kemaj toTEKO okijlij Moisés: “Maka xmakajsi, pampa nejua niktllalis momak nochimej isoldados iuan nochi ipaís. Niman tikchiuilis sa no ijki ken otikchiuilij Sehón, iminrey on amorreos yejuan chantiya ipan on ueyikalpan Hesbón.”

³⁵Niman ijki on israelitas okimiktijkej on rey Og, niman ikoneuan niman nochimej isoldados. Nion se xokajkej yoltikaj niman okinoyaxkatijkej nochi iminueyitlalpan.

Balac otlatitlan ma kinotsatij Balaam

22 ¹On israelitas oyajkej niman onochachantijkej ipan on ixtlauatl de Moab, kampaka ikisayan tonaltsintli de on río Jordán, imelajkan Jericó. ²On rey Balac, ikoneu Zipor, okitak nochi on tlen on israelitas okinchiuilijkej on amorreos niman onomojtij. ³On moabitas no sanoyej onomojtijkej ijkuak

okimatkej ika on israelitas sanoyej miyekej katkaj. ⁴On moabitas okinnotskej on uejueyixtokej tlayekankej de Madián niman okinmijlikej: “In tojlanmej israelitas kitlamiskej on tlen onkaj ipan total, ken sen uakax kitlamiya sakatl ipan mijlaj.”

Ipan on tonaltin Balac rey katka ipan on país Moab, ⁵niman okitekuitlan Balaam, ikoneu Beor. Balaam chantiya ipan on ueyikalpan Petor, nisiu itech on río Éufrates, ipan on País de Amav. Balac okinnauatij itlajtojkaúan ijkin ma kijlikan Balaam: “Youajlaj sen ueyi nación yejuan oualeu ipan on país Egipto. Yejuamej kuajtlapachojtiuij nochi on ueyitlalpan, niman aman yonochachantikoj nikan ixpan nopaís. ⁶Xuajla amanaman, niman xkintlaueliki in tlakamej por nejua, pampa yejuamej más kojtikey xken tejuamej. Ijkon niktas tla uelis niktlanis niman nikinkixtis ipan nopaís. Nejua kuajli nikmati ika ijkuak tejua tiktiochiua yakaj, sanoyej kiselia tlatiochialistli, niman ijkuak tiklauelia yakaj, kiselia tlauelijli.”

⁷On uejueyitlayekankej de Moab niman de Madián, oyajkej okiktikej tomin para kitlaxtlauaskej on tlauelijli. Niman ijkuak oasikej itech Balaam, okijlikej nochi on tlen Balac okinmijlij ma kijlikan. ⁸Niman Balaam okinmijlij:

—Xmokauakan nikan in tlayoua, niman mostla nemechijlis on tlen noTEKO nechijlis ma nikchiua.

Yejua ika, on uejueyixtokej tlayekankej moabitas onokajkej on tlayoua iuan Balaam. ⁹Dios okinotitij Balaam, niman ijkin okitlajoltij:

—¿Akinomej on tlakamej yejuan nemij mouan?

¹⁰Balaam okinankilij:

—Balac, ikoneu Zipor yejuan rey ipan on país Moab, okinuajtítlan para ma nechijlikij ¹¹ika sanoyej miyek tlakatl oualeu Egipto, niman yokitemiltijkej iueyitlalpan. Balac kineki ma niuiya amanaman ma niktintlaueliti on tlakamej para kitas tla ijki uelis kintlanis niman kinkixtis ipan iueyitlalpan.

¹²Kemaj Dios okijlij Balaam:

—Maka xuiya iminuan, nion maka xkintlaueliti on tlakamej, pampa nejua yonikintiochiu.

¹³Uajmostla kualkan Balaam onokuiteu niman okinmijlij on uejueyitlayekankej yejuan Balac okintítlan:

—Xmokuupakan ipan nemotlal, toTEKO xnechkauilia ma niuiya nemouan.

¹⁴On uejueyitlayekankej de Moab onokuepkej kampa nemi Balac, niman okijlikej:

—Balaam xokinek ouajlaj touan.

¹⁵Kemaj Balac oksejpa okintítlan oksekimej tlayekankej más miyekej, niman yejuan más kipiayaj tetlakaitalistli xken on

yejuan achtoj oyajkaj. ¹⁶Yejuamej oyajkej okitatorj Balaam niman okijlijkej:

—Balac, ikoneu Zipor ijkin mitsijlia:

“Nimitsyemankatlajtlanilia, maka xmoneneki tiuajlas. ¹⁷Nejua nimitsmakas ueyi tetlakaitalistli niman nimitsmakas nochi tlen tinechtlajtlanilis. Nimitsyemankatlajtlanilia, xuajla niman xkintlaueliki in tlakamej.”

¹⁸Pero Balaam okinnankilij:

—Maski Balac nechmakaskia nochi on oro niman plata yejuan ika tentikaj ipalacio, nejua xuelis nikchiusas itlaj yejuan ueyi, nion yejuan pitentsin, yejuan noTEKO Dios xnechkaulia ma nikchiua.

¹⁹Pero nemejuamej no xmokauakan nikan in tlayoua ken on oksekimej okichijkej, niman niktas tlinon nechijlis noTEKO.

²⁰Ipan on tlayoua Dios okinotitij Balaam niman okijlij:

—Tla on tlakamej oualajkej para mitsuikaskej, xuiya iminuan. Pero san tikchiusas on tlen nejua nimitsijlis.

Iángel toTEKO niman ipoloko* Balaam

²¹Uajmostla kualkan Balaam onokuiteu, okisillajtij ipoloko* niman oyaj iminuan on tlayekankej moabitas.

²²Pero Dios okualan itechkopa Balaam pampa oyaj iminuan on tlakamej. Balaam yetiaya ipan ipoloko* niman iuan yayaj omemej itlapaleuijkauan. Niman iángel toTEKO, onotelkets ipan iojui para okitsakuilij. ²³Ijkuak on poloko* okitak ika iángel toTEKO nemiya ipan tlajko ojtli ika sen espada ipan ima, okitlalkauij on ojtli niman oksekan okonmelau. Yejua ika, Balaam okimajmailij para onokuep ipan iojui. ²⁴Kemaj iángel toTEKO onotelkets ipan sen ojtli kampa tlapitsko, inajnakastlan on ojtli uvasyoj katka, niman tlatsakutoya ikan tecorral. ²⁵Ijkuak on poloko* okitak iángel toTEKO, onomojtij niman onokaltechoj ipan sen tepantli niman okimetskojyotepitskuaj Balaam. Kemaj Balaam oksejpa okimailij. ²⁶Pero iángel toTEKO okinyakapanauij niman onotelcito kampa más tlapitsko, kampa xakaj ueli tlamalakachoua. ²⁷Ijkuak on poloko* okitak iángel toTEKO, onotekak ipan tlajli. Kemaj Balaam sanoyej okualan, niman oksejpa okimajmailij ika sen tlakotl. ²⁸Ijkuakon toTEKO okichiu para on poloko* ma tlajto, niman okijlij Balaam:

—¿Tlinon onimitschiuilij ika aman ye ika yexpa tinechmailia?

²⁹Niman Balaam okinankilij:

—Tejua tinechajpijpinaujtiu. Tla ipan noma nikpiyaskia sen cuchillo, amantsin timitsmiktiskia.

³⁰Pero on poloko* okijlij:

—Nejua nipoloko* yejuan tejua nochipa ipan tiyetinemi. Niman kuajli tikmatstikaj ika xkaman ijkon nimitschiulia.

Niman Balaam okilij:

—Melauak.

³¹Kemaj toTEKO okichiu para Balaam ueli ma kita on iángel yejuan ijyaya itlajkotian ojtli ika sen espada ipan ima. Balaam onotlakuantelkets, niman onopachoj hasta ipan tlajli. ³²Pero iángel toTEKO okijlij:

—¿Tline otikmailij yexpa mopoloko? Nejua oniuajlaj para onimitstsakuiliko pampa xnikuelita kampa tiau. ³³In poloko* onechitak yexpa, niman ijkuak nechitaya nejkuaniaya. Tla yejua xkitlalkauiskia on ojtli, nejua nimitsmiktiskia, niman yejua nikauiliskia ma nemi.

³⁴Niman Balaam okinankilij iángel toTEKO:

—Yonitlajtlakoj, pampa nejua xnikmatiya ika tejua ompa tinemiya tiktsakutikatka noojui. Tla tikita xkuajli ika niau, ninokuepas.

³⁵Pero iángel toTEKO okinankilij:

—Uelis tias iminuan on tlakamej, pero san tikijos on tlen nejua nimitsijlis.

Niman Balaam oyaj iminuan on tlayekankej yejuan Balac okinuajtatlanka.

Balac kiselía Balaam

³⁶Ijkuak on rey Balac okimat ika Balaam ye uajlaya, oyaj okiselito ipan sen ueyikalpan de on país Moab yejuan onkaj nisiu de on río Arnón, kampa tlami on país. ³⁷Niman on rey Balac okijlij Balaam:

—Nejua onimitstekuitlan para xuajla nimantsin. ¿Tline xtiknekiya tiuajlas? ¿Tline tiknemilia xniuelis itlaj nimitsmakas para nimitsueyitlajsojkamachilis?

³⁸Niman Balaam okinankilij:

—Aman nikan ninemi. Yonimitsitako. Pero xuelis nikijos san tlinon. Nejua san uelis nikijos on tlajtojli yejuan Dios nechijlis.

³⁹Kemaj Balaam oyaj iuan on rey Balac hasta Quiriat-huzot.

⁴⁰Niman ompa on rey Balac otlanauatij ma kinmiktikan uakaxtin niman borregos para on nakatl okinmakakej Balaam niman on tlayekankej yejuan iuan ouajlajkej.

⁴¹Uajmostla kualkan, on Rey Balac okuikak Balaam hasta ikuapan on tepetl Ramot-baal niman desde ompa ouel onkontak se parte de incampamento on israelitas.

23 ¹Kemaj Balaam okijlij on rey Balac:

—Xnechchijchiuili nikan chikome tlaixpan*, niman xnechinuajuikili chikome becerros niman chikome borregos.

²On rey Balac okichiu on tlen Balaam okinauatij. Niman san sekan yejuamej okiuentlalijkej sen becerro niman sen borrego ipan cada tlaixpan*.

³Kemaj Balaam okijlij Balac:

—Xmokaua nikan itech in uentli yejuan tlatla, niman nejua nias nikitás tla toTEKO nechajnamikis. Kemaj nimitsijlis on tlen yejua nechijlis.

Balaam okintiochiu on israelitas

Niman Balaam oyaj ikuapan sen tepetsintli kampa xkojyoy,
⁴niman ompa Dios ononextij itech, niman Balaam okijlij:

—Nejua yoniktalij chikome tlaixpan*, niman ipan cada tlaixpan* onimitsuentlalilij sen becerro niman sen borrego.

⁵Kemaj toTEKO okijlij Balaam on tlajtojli yejuan kinekiya ma kijli on rey Balac. Niman kemaj okijlij:

—Xmokuépa ne kampa nemi on rey Balac, niman xkijli on tlen nejua yonimitsijlij.

⁶Balaam onokuep, niman okinextijtajsik on rey Balac ijkaya nisiu itech on uentli yejuan okitlalij. Nemiya iminuan nochimej on tlayekankej de on país Moab. ⁷Kemaj Balaam okijtoj in tiotlajtojli:

“Oniualeu desde on tepemej ipan on país Aram kampaká ikisayan tonaltsintli.

On rey Balac onechchiualtij ma niuajla nikan ipan in país Moab. Onechijlij: ‘Xuajla, xkintlaueliki on israelitas.’

Xkinnekili impan ma uajla nochi tlen xkuajli’

⁸Pero, ¿kenijki niktlauelis yejuan Dios xkintlauelia?

¿Kenijki nejua nikinnekilis tlen xkuajli tla noTEKO xkichiaua?

⁹Desde nikan ikuapan in uejueyitepemej ueli nikita.

Desde nikan ikuapan in tlamimijli nikinta.

Nesi ika on sen nación yejuan xteuan noneloua.

Niman nesi ika on nación oksekneka.

¹⁰Yejuamej sanoyej miyekej ken itlaj tlalteutli.

¿Akinon uelis kimpouas?

¿Akinon uelis kimatis keskimej nemij?

Niknekiskia nimikiskia ken on yejuan yolmelajkej, niman nitlamiskia ken yejuamej.”

¹¹Kemaj on rey Balac okitlauelijlij Balaam:

—¿Tlinon yotinechchiuilij? ¡Nejua onimitsajuikak para xkintlaueliki notlaueliknivan, niman tejua yej tikintiochijtikaj!

¹²Niman Balaam okinankilij:

—Yotitokajkaj ika san nikijtos on tlen noTEKO nechijlis.

¹³Pero on rey Balac oksejpa okijlij Balaam:

—Xuajla nouan, niman ma tiuiyan oksekan kampa uelis tikitas maski san se parte incampamento on israelitas, niman ompa uelis tikintlauelis.

¹⁴Niman on rey Balac okuikak Balaam ne mijlaj kampa itoka Zofim ne ikuapan on tepetl Pisga. Niman ompa okichijchihu chikome tlaixpan* niman okiuentlalij sen becerro niman sen borrego ipan cada tlaixpan*. ¹⁵Ompa Balaam okijlij on rey Balac:
—Xmokaua nikan itech in uentli yejuan tlatla chika nejua ninonamikis iuan Dios.

¹⁶ToTEKO okinamikiko Balaam niman okijlij on tlajtojli yejuan kinekiya ma kijli on rey Balac. Niman kemaj okijlij:
—Xmokuropa ne kampa nemi on rey Balac niman xkijli on tlen nejua yonimitsijlij.

¹⁷Balaam onokuep niman okinextijtasik Balac ijikaya itech on uentli yejuan tlatla, iminuan on tlayekankej moabitas. Niman on rey Balac okitlajoltij:

—¿Tlinon omitsijlij moTEKO?

¹⁸Kemaj Balaam okijtoj in tiotlajtojli:

“¡Rey Balac, itelpoch Zipor,
kuajli xnechkaki!

¹⁹Dios xsen tlaltikpaktlakatl para istlakatis.
Nion xnotlajtolkuekuepa kenon tlaltikpaktlakamej.
Ijkuak kijtous itlaj kichiuas, kichiu.
Ijkuak itlaj kiprometeroua, melauak kitemaka.

²⁰Onechnauatij ma nikintiochiua on israelitas.
Tla Dios kintiochiua,
nejua xuelis nikijlis maka ma kintiochiua.

²¹NoTEKO xkinextia tlakajkayaualistli,
nion tlajtlakojli intech on israelitas yejuan iuejkekoneuan
Jacob.

NoTEKO yejuan iminDios, nemi iminuan yejuamej,
niman yejuamej kiteneuaj iminrey.

²²Dios, akin okinkixtij on israelitas ipan on país Egipto,
yejua nochiua iminpoder kenon ueyi yolki itoka búfalo.

²³Xakaj uelis kintlauelis in iuejkekoneuan Jacob.
In israelitas xitlaj* uelis kinchiuilis sen nauajli.
Ijkin nijtous:

‘¡Xkitakan ken miyek tlajtlamach* tlen kualtsin Dios yokichiu nemouan!’

²⁴On israelitas najkomanaj para tetlaniskej
ken sen tepeyolki tekuani yejuan xnoteltia
hasta kaman kikua on tlen kineki kikuas,
niman konilia iyesyo on tlen yokimiktij.”

²⁵Kemaj on rey Balac okijlij Balaam:

—Tla xuelis tikintlauelis, no maka xkintiochiua.

²⁶Pero Balaam okinankilij:

¿Tlen xonimitsijlij ika nejua san uelis nikchiuas on tlen noTEKO nechijlis?

²⁷Kemaj on rey Balac okijlij:

—Xuajla nouan niman nimitsuikas oksekan. Manin, Dios mitskauilis desde ompa xkintlaueli on israelitas.

²⁸Niman Balac okuikak Balaam hasta ikuapan on ueyi tepetl itoka Peor kampa kuajli nesiya nochi on xalpatlajkan. ²⁹Ompa Balaam okijlij on rey Balac:

—Xnechchijchiuili nikan chikome tlaixpan*, niman xnechinuajuikili chikome becerros niman chikome borregos.

³⁰On rey Balac okichiu nochi ken okinauatij Balaam. Niman ipan cada tlaixpan* okiuentlalij sen becerro niman sen borrego.

24 ¹Ijkuak Balaam okajsikamat ika toTEKO kuelitaya ika yejua kintiochiua on israelitas, xok oyaj okichiuato tetlatejtemoualistli ken achtoj yokichijka. Yej, san ontlachix melajki ipan on xalpatlajkan kampa nemiyaj on israelitas.

²Niman ijkuak Balaam ontlachix niman okomintak on israelitas ika chantij xexelijtokej por tribus*, iespíritu Dios ouajlaj ipan Balaam. ³Kemaj Balaam okijtoj in tiotlajtojli:

“Nejua Balaam, itelpoch Beor, nimitsijlia yejua in tiotlajtojli. Nejua nisentlakatl yejuan ueli nikita kuajli on tlen impan nochiuas on israelitas.

⁴Nejua nikaki itlajtoltzin Dios.

In Dios kipiya nochi poder,

niman nechititia tlatlachalistli ken temikpan.

Niman ijkuak ninotlakuantelketsa ixpan, yejua nechintlapouilia nixtololjuan.

⁵¡Jacob, sanoyej kualtsitsimej nemokaluan!

¡Israel, sanoyej kualtsin mocampamento!

⁶Nikinta ken palmeras sesemantokej nochiiuyan ipan on ueyi ixtlauatl.

Nesi ken sen ueyi xochitlan itech sen río.

Nesi ken aloeskojtin yejuan toTEKO okintôkak.

Nesi ken miyek cedros yejuan tlatoktin atempan.

⁷On israelitas kipiwaskej miyek atl,

para koniskej niman para katekiskej intlatok.

Iminrey más ueyixtias xken on rey Agag.

Niman ireino sanoyej ueyi yes.

⁸Dios okinkixtij ipan on país Egipto.

Niman Israel kojtik ken on yolki itoka búfalo.

On israelitas kintlaniskej nochimej intlaueliknluan,

kinomiyotepojpostekiskej, niman kinmiktiskej ika tlaminaltin.

⁹ Ijkuak notekaj para noseuiyaj, nesij ken itlaj león
 yejuan xakaj kineki kitlachaltis.
 ¡ToTEKO kintiochius yejuan mechtiochiuskej,
 niman kintlauelis nochimej yejuan mechtlaueliskej!”

¹⁰ Ijkuak on rey Balac okak on tlajtojli yejuan Balaam okijtoj,
 sanoyej okualan itechkopa. Kemaj onomatetlatsinijtiaj, niman
 okijlij:

—Nejua onimitstekuitlan para xkintlaueliki notlaueliknluan,
 niman tejua yej hasta yexpa yotikintiochiu. ¹¹ ¡Más kuajli
 tla nimantsin tias mochan! Nejua niknekiya nimitsmakas
 tlajtlamach* yejuan patioj, pero moTEKO xonechkauilij ma
 nimitsmaka.

¹² Kemaj Balaam okinankilij on rey Balac:

—Nejua onikinmijlij on motlakeualuan yejuan otikintitlan ¹³ ika
 maski tinechmakaskia nochi oro niman plata yejuan ika tenticaj
 mopalacio, nejua ika onkaj niktakamatiskia noTEKO. Xniuelis
 nikchius san tlen nejua niknekis tla kuajli noso xkuajli. Niman
 ika nikijtos san on tlen noTEKO nech nauatis ma nikijto. ¹⁴ Kuajli
 tla ijkon, aman ninokuepas nochan, pero achtoj nimitsijlis on tlen
 on israelitas kichiuiliskej mopaís más sakin*.

On sa ika nochi tiotlajtoltin de Balaam

¹⁵ Kemaj Balaam okijtoj in tiotlajtojli:

“Nejua Balaam, itelpoch Beor, nimitsijlia yejua in tiotlajtojli.
 Nejua nisen tlakatl yejuan kuajli nikita on tlen impan
 nochius on israelitas.

¹⁶ Nejua nikaki itlajtoltsin Dios,
 niman nikpiya tlamatkilistli yejuan kisa itech on yejuan Más
 Ueyixtika.

Nikita sen tlatlachalistli ken temikpan yejuan kisa itech on
 yejuan kipiya nochi poder.

Niman ijkuak ninotlakuantelketsa ixpan, yejua
 nechintlapouilia nixtololojuan.

¹⁷ Nikita yakaj yejuan uajlas,
 pero xamantsin, yej sankin.
 Yejua yes ken sen sitlalin yejuan kisas itech Jacob.
 Yejua yes sen ueyi rey yejuan kisas itech on israelitas niman
 kinyekanas.

Kinkuatepaxos on itlayekankauan Moab,
 niman kinmiktis nochimej uejkekoneuan Set.

¹⁸ Yejua kinoyaxkatis* on país Edom
 niman no kinoyaxkatis* Seir yejuan itlauelikniu.

On israelitas kichiuaskej sanoyej miyek tetlanilistin.

¹⁹ Sen rey kisas itech Jacob,
niman kinmiktis nochimej yejuan nokauaj ipan on ikalpanuan
Edom.”

²⁰ Kemaj ipan itlatlachalis ken temikpan Balaam, okitak on
nación de Amalec, niman okijtoj in tiotlajtojli:

“Amalec sen nación yejuan ueyixtikaj,
pero nochi xoxotonis.”

²¹ No, ipan itlatlachalis ken temikpan, okintak on quenitas,
niman okijtoj in tiotlajtojli:

“Nemejuamej nennemij kampa xakaj mechpajsoloua
ken on totomej nemij ipan imintepajsol tlakpak ipan se
teostotl.

²² Pero nemotepajsol mechxoxotoniliskej on soldados de Asiria,
niman mechuikaskej nensalijtiaskej.”

²³ Kemaj Balaam okijtoj in tiotlajtojli:

“¡Ay! ¿Akinon sanken* nemis ijkuak Dios kichiuas in
tlajtlamach*?”

²⁴ Uajlauj uejueyimej barcos yejuan ualeuaskej iatempan Chipre.
Yejuamej kitlaniskej Asiria niman Heber.
Pero sakin*, Chipre no xoxotonis.”

²⁵ Kemaj Balaam okis niman oyaj ichan. Niman on rey Balac no
oyaj ichan.

On israelitas okimauistilijkej Baal-peor

25 ¹ Ijkuak on israelitas chantiyaj Sitim, sekimej tlakamej
opejkej auilnemij iminuan on moabitas siuamej.

² On moabitas siuamej kinnotsayaj ma uian inuan kampa
kintlautlililiyay imindioses. Niman on tlakamej israelitas
opejkej tlakuaj iminuan niman opeu kinueyiteneuaj imindioses
on moabitas. ³ Ijkon okinokauilijkej ma kinuikakan ixpan on
dios Baal-peor. Kemaj toTEKO sanoyej okualanijkej on israelitas.

⁴ Niman toTEKO okijlij Moisés:

—Xkinsentlali nochimej intlayekankauan on israelitas niman
xkinmaajkopilo nixpan nejua ijkuak tlajokaj para nochimej ma
kintakan. Ijkon seuis notlauel iminuan on israelitas.

⁵ Kemaj Moisés okinnautij on jueces israelitas, niman okinmijlij:

—Cada se de nemejuamej xkinmiktikan on tlajkamej de nemotribu* yejuan okimauistilijkej on ídolo Baal-peor.

⁶Chika Moisés niman nochimej on israelitas chokayaj ixpan toTEKO ne ikalakiyan on tabernáculo* kampa nemi Dios, okitakej ika sen tlakatl yejuan xtetlakaitani okalaktito ichan sen suatlad madianita. ⁷Ijkuak Finees, itelpoch Eleazar, ixuiu on tiopixki Aarón, ijkon okitak, okintlalkauij on israelitas yejuan chokayaj. Okikuik sen espada, ⁸niman okitokak on tlakatl israelita hasta ipan ikajkal kampa okuikak on suatlad. Niman ompa okijitsopiniy on tlakatl iuan on suatlad. Ijkon otlán on temojtij mikilistli itech on israelitas. ⁹Pero on mikilistli yokinmiktika 24 mil israelitas.

¹⁰Kemaj toTEKO okijlij Moisés:

¹¹—Finees, itelpoch Eleazar, ixuiu on tiopixki Aarón, okichiu para ma seui notlauei itech on israelitas, pampa yejua okitlajsojkaitak notetlakaitalis, no ken nejua nikintlajsojkaita on israelitas. Yejua ika tej, san ipampa yejua, xonikinmiktij nochimej on israelitas ken nikchuiasnekiya. ¹²Yejua ika, xkijli Finees ika aman nejua nikchuias sen pacto* iuan yejua, para nochipa nikpiyas yoltlalilistli iuan. ¹³Niman no nikintlalis nochimej itelpochuan ken tiopixkej para nochipa, pampa ikan itlauei okixtlajsojkaitak notetlakaitalis. Niman ijkon okichiu para onikintlajsojpoluij on israelitas.

¹⁴On tlakatl israelita yejuan okitlajkotsopiniykej iuan on suatlad madianita, itoka katka Zimri, itelpoch katka Salu. Salu tlayekanketl katka de sen familia ipan itribu* Simeón. ¹⁵Niman on suatlad madianita itoka katka Cozbi yejuan ichpoch katka Zur, sen tlayekanketl ipan sen tribu* ipan on país Madián.

¹⁶ToTEKO okijlij Moisés:

¹⁷—Xkinuijsokikan on madianitas niman tlami xkinmiktikan, ¹⁸pampa yejuamej omechitakej ken intlauei kniuan ijkuak ika miyek tlajtlamach* omechkajkayajkej para xmauistilikan on imindios Baal-peor. Niman no mechkajkayauasnekiyay ijkuak ouajlaj Cozbi, ichpoch on tlayekanketl de Madián, yejuan okimiktijkej ika sen espada ijkuak nejua onikinuajtlanilij on temojtij mikilistli pampa okimauistilijkej on dios Baal-peor.

Oksejpa okimpojkej on israelitas

26 ¹Ijkuak yonochijka on temojtij mikilistli, toTEKO okinots Moisés niman Eleazar itelpoch on tiopixki Aarón, niman okinmijlij: ²“Oksejpa xchiuakan poualistli ipan cada familia de nochimej on israelitas yejuan kipiay 20 xipan para tlakpak, yejuan ueliskej yaskej ipan guerra. Xkijkuilokan itoka imintataj cada se, para tikmatis keskimej nemij.”

³Ipan on tonajli on israelitas nemiyaj ipan on ueyi ixtlauatl de on país Moab nisiu itech on ueyi río Jordán ixpan on ueyikalpan

Jericó. Moisés niman Eleazar, okinnauatijkej on israelitas ⁴ma kimijkuilokan nochimej on tlakamej yejuan ye kipiayaj sempoajli xipan para tlakpak ken toTEKO okinauatij Moisés.

In yejuamej katkaj on israelitas yejuan okiskej Egipto.

Clanes ipan itribu* Rubén

⁵Itelpochuan Rubén, iyenkuuyokoneu Israel yejuan otlayekankej ipan on clanes, katkaj: Enoc inuejkataj on Enoquitas, Falú inuejkataj on Faluitas, ⁶Hezron inuejkataj on hezronitas, niman Carmi inuejkataj on carmitas. ⁷Ipan on poualistli yejuan okichijkej, kijtousa ika iuejkanoneuan Rubén katkaj 43 mil 730 yejuan tlakamej.

⁸Falú okipix itelpoch yejuan itoka katka Eliab. ⁹Niman itelpochuan Eliab katkaj Nemuel, Datán niman Abiram. Datán niman Abiram tlayekankej katkaj imintech on israelitas. Niman yejuamej onosentlalijkej iuan Coré niman xipan okitakej toTEKO, niman no xipan okitakej Moisés iuan Aarón.

¹⁰Yejua ika, on tlajli otsayan niman okintoloj on omemej tlakamej iuan Coré. No ijki, san ipan se tonajli toTEKO okinmiktij ikan tlitl 250 tlakamej yejuan kitokayaj Coré niman kitlatiayaj xkuajli kopajli. Nochi in onochiu para tlaixkuitijli* de on israelitas yejuan xomikkej. ¹¹Pero ipan on tonajli, itelpochuan Coré xompa nemiyaj niman xteuan omikkej.

Clanes ipan itribu* Simeón

¹²Itelpochuan Simeón yejuan otlayekankej ipan on clanes katkaj: Nemuel, inuejkatataj on nemuelitas; Jamín, inuejkatataj on jaminitas; Jaquín, inuejkatataj on jaquinitas;

¹³Zera, inuejkataj on zeraitas, niman Saúl, inuejkatataj on saulitas. ¹⁴Ipan on poualistli yejuan okichijkej kijtousa, ika iuejkekoneuan Simeón kajtkaj 22 mil 200 yejuan tlakamej.

Clanes ipan itribu* Gad

¹⁵Itelpochuan Gad yejuan otlayekankej ipan on clanes katkaj: Zefón, inuejkatataj on zefonitas; Haguí, inuejkatataj on haguítas; Suní, inuejkatataj on sunítas; ¹⁶Ozni, inuejkatataj on oznítas; Eri, inuejkatataj on erítas; ¹⁷Arod, inuejkatataj on aroditas; niman Arelí, inuejkataj on arelitas.

¹⁸Ipan on poualistli yejuan okichijkej kijtousa ika iuejkekoneuan Gad, katkaj 40 mil 500 yejuan tlakamej.

Clanes ipan itribu* Judá

¹⁹Judá okipix ome itelpoch yejuan imintoka katka Er niman Onán. Yejuamej omikkej ipan on tlajli de Canaán. ²⁰Itelpochuan

Judá yejuan otlayekankej ipan on clanes katkaj: Sela, inuejkatataj on selaitas; Fares, inuejkatataj on faresitas; niman Zera, inuejkatataj on zeraitas. ²¹Itelpochuan Fares yejuan otlayekankej ipan on clanes katkaj: Hezrón inuejkatataj on hezronitas, niman Hamul inuejkatataj on hamulitas.

²²Ipan on poualistli yejuan okichijkej, kijtous ika iuejyakoneuan Judá, katkaj 76 mil 500 yejuan tlakamej.

Clanes ipan itribu* Isacar

²³Itelpochuan Isacar yejuan otlayekankej ipan on clanes katkaj: Tola, inuejkatataj on tolaitas; Fúa, inuejkatataj on fuaítas; ²⁴Jasub, inuejkatataj on jasubitas; niman Simrón, inuejkatataj on simronitas. ²⁵Ipan on poualistli yejuan okichijkej kijtous ika iuejyakoneuan Isacar, katkaj 64 mil 300 yejuan tlakamej.

Clanes ipan itribu* Zabulón

²⁶Itelpochuan Zabulón yejuan otlayekankej ipan on clanes katkaj: Sered, inuejkatataj on sereditas; Elón, inuejkatataj on elonitas; niman Jahleel, inuejkatataj on jahleelitas.

²⁷Ipan on poualistli yejuan okichijkej, kijtous ika iuejyakoneuan Zabulón katkaj 60 mil 500 yejuan tlakamej.

Clanes ipan itribu* Manasés

²⁸Itelpochuan José yejuan otlayekankej ipan on clanes katkaj: Manasés niman Efraín. ²⁹Itelpoch Manasés yejuan tlayekanki ipan on clan* katka: Maquir, inuejkatataj on maquiritas. Niman itech Maquir okis okse clan* kampa tlayekanki katka Galaad, inuejkatataj on galaditas. ³⁰Itelpochuan Galaad yejuan otlayekankej ipan on clanes katkaj: Jezer, inuejkatataj on jezeritas; Helec, inuejkatataj on helequitas; ³¹Asriel, inuejkatataj on asrielitas; Siquem, inuejkatataj on siquemitas; ³²Semida, inuejkatataj on semidaitas; niman Hefer, inuejkatataj on heferitas. ³³Hefer okipix se itelpoch yejuan itoka katka Zelofead, pero yejua xokimpix itelpochuan, yej okimpix ichpochuan. Ijkin imintoka katka: Maala, Noa, Hogla, Milca niman Tirsá. ³⁴Ipan on poualistli yejuan okichijkej, kijtous ika iuejyakoneuan Manasés, katkaj 52 mil 700 yejuan tlakamej.

Clanes ipan itribu* Efraín

³⁵Itelpochuan Efraín yejuan otlayekankej ipan on clanes katkaj: Sutela, inuejkatataj on sutelaitas; Bequer, inuejkatataj on bequeritas; niman Tahán, inuejkatataj on tahanitas. ³⁶Niman itech Sutela, okis sen clan* kampa tlayekanki katka: Erán, inuejkatataj on eranitas. ³⁷Ipan on poualistli yejuan okichijkej,

kijtoua ika iuejkakoneuan Efraín, katkaj 32 mil 500 yejuan tlakamej.

In yejuamej iuejkakoneuan katkaj José, yejuan tlayekankej katkaj ipan on clanes.

Clanes ipan itribu* Benjamín

³⁸Itelpochuan Benjamín yejuan otlayekankej ipan on clanes katkaj: Bela, inuejkatataj on belaítas; Asbel, inuejkatataj on asbelitas; Ahiram, inuejkatataj on ahiramitas; ³⁹Sufam, inuejkatataj on sufamitas niman Hufam, inuejkatataj on hufamitas. ⁴⁰Niman itech Bela okiskej omemej clanes kampa tlayekankej katkaj: Ard, inuejkatataj on arditas; niman Naamán, inuejkatataj on naamitas. ⁴¹Ipan on poualistli yejuan okichijkej, kijtousa ika iuejkakoneuan Benjamín, katkaj 45 mil 600 yejuan tlakamej.

Clanes ipan itribu* Dan

⁴²Itelpoch Dan yejuan tlayekanki ipan on clan* katka: Súham, inuejkatataj on suhamitas. ⁴³Ipan on poualistli yejuan okichijkej, kijtousa ika iuejkakoneuan Dan, katkaj 64 mil 400 tlakamej.

Clanes ipan itribu* Aser

⁴⁴Itelpochuan Aser yejuan tlayekankej katkaj ipan on clanes: Imna, inuejkatataj on imnitas; Isúi, inuejkatataj on isuitas; niman Bería, inuejkatataj on beriaítas. ⁴⁵Niman itech Bería okiskej omemej clanes kampa tlayekankej katkaj: Heber, inuejkatataj on heberitas; niman Malquiel, inuejkatataj on malquielitas. ⁴⁶Aser okipix sen ichpochtli yejuan itoka katka Sera.

⁴⁷Ipan on poualistli yejuan okichijkej, kijtousa ika iuejkakoneuan Aser katkaj 53 mil 400 yejuan tlakamej.

Clanes ipan itribu* Neftalí

⁴⁸Itelpochuan Neftalí yejuan otlayekankej ipan on clanes katkaj: Jahzeel, inuejkatataj on jahzeelitas; Guni, inuejkatataj on gunitas; ⁴⁹Jezer, inuejkatataj on jezeritas; niman Silem inuejkatataj on silemitas.

⁵⁰Ipan on poualistli yejuan okichijkej, kijtousa ika iuejkakoneuan Neftalí, katkaj 45 mil 400 yejuan tlakamej.

⁵¹Ijkuak otlán kimpouaj nochimej on israelitas, nochimej katkaj 601 mil 730 yejuan tlakamej.

⁵²Kemaj toTEKO okijlij Moisés: ⁵³“Yesua in tlakamej tikinxelouillis on tlajli san kech ika kimaxilia yejuan ye tlapoualtin. ⁵⁴On tribus* yejuan más miyek tlakatl kimpia, tikinmakas más ueyi tlajli. Niman on tribus yejuan xmiyek

tlakatl kipiya, tikinmakas achijtsin tlajli. ⁵⁵Pero para tikmatis kenijki tikmakas cada tribu, noneki tikchuias suertes. Ijkon uelis tikmatis kanon kiselis itlal cada tribu. ⁵⁶Niman on tlajli yejuan tikinmakas, tinxelouilis ken nesis ipan on suerte. Nochimej on tribus yejuan más uejueyimej niman yejuan más pipitikej kiseliskej imintlal.”

Poualistli de on Levitas

⁵⁷Itelpochuan Leví yejuan otlayekankej ipan on clanes katkaj: Gersón, inuejkatataj on gersonitas; Coat, inuejkatataj on coatitas; niman Merari, inuejkatataj on meraritas. ⁵⁸Niman no oksejkimej iuejkakoneuan Leví katkaj: on libnitas, on hebronitas, on mahlitas, on musitas, niman on coreitas.

Coat itelpoch Leví, okipix se itelpoch yejuan itoka katka Amram. ⁵⁹Amram okinosiatij Jocabed, ichpoch Leví yejuan no otlakat ijkuak yejuamej nemiyaj ipan on país Egipto. Amram niman Jocabed okimpixkej inkoneuan yejuan imintoka katka Aarón, Moisés niman María. ⁶⁰Aarón okipix nauí itelpoch yejuan imintoka katka Nadab, Abiú, Eleazar niman Itamar. ⁶¹Pero Nadab niman Abiú omikkej ixpan toTEKO ijkuak okitekiltitijkej sen tlitl yejuan Dios xokinnauatij ma kikuikan.

⁶²Nochimej on tlakakokonej yejuan yokajxitijkej se metstli para tlakpak de iuejkakoneuan Leví katkaj, 23 mil. Yejuamej xokimpojkej iminuan on sekimej israelitas pampa yejuamej xokiselijkej imintlal.

⁶³Moisés niman on tiopixki Eleazar okichikej on poualistli ipan on ixtlauatl de on país Moab nisiu on río Jordán ixpan on ueyikalpan Jericó. ⁶⁴Ipan on poualistli xonenkej nion semej tlakamej yejuan Moisés iuan Aarón okimpojkej ipan on achtoj poualistli ipan on xalpatlajkan Sinaí. ⁶⁵Ijkon okichikej pampa toTEKO okijtojka ika on tlakamej mikiskiaj ipan on xalpatlajkan niman ijki onochiu. Xakaj onokau yoltikaj, yej san onokajkej Caleb, ikoneu Jefone, niman Josué, ikoneu Nun.

Herencia de on ichpochuan Zelofehad

27 ¹Ipan itribu* Manasés nemiyaj makuiltimej ichpokamej iknijtin yejuan imintoka katka Maala, Noa, Hogla, Milca niman Tirsa. Yejuamej ichpochuan katkaj Zelofehad, itelpoch Hefer. (Hefer itelpoch katka Galaad, niman Galaad itelpoch katka Maquir, Maquir itelpoch katka Manasés, niman Manasés itelpoch katka José.) ²In makuiltimej ichpokamej iknijtin oyajkej ikalakiyan on tabernáculo* kampa nemi Dios. Ompa okinotsatoj Moisés, on tiopixki Eleazar, niman intlayekankauan on israelitas yejuan ompa nemiyaj. Niman ijkín okinmijlijkej: ³“Totataj

omik ipan on xalpatlajkan, pero yejua xnosentlaliaya iuan Coré yejuan okichiu on tlen xkuajli ixpan toTEKO. Totataj yej omik san ipampa yejua itlajtlakol. Niman xokipix nion sen itelpoch. ⁴¿Tline tikauilis ma poliui itoka totataj, san pampa xokimpix itelpochuan? Xtechkauili no ma tikselikan se parte on tlajli kampa kiseliskej on yejuan ken kinta totataj.”

⁵Yejua ika, Moisés okijlij toTEKO on tlen kixpantiliayaj on siamej niman on tlen kinekiyaj. ⁶Niman toTEKO ijkin okinankilij: ⁷“Ichpochuan Zelofehad kuajli tlen kijtouaj. Xkinmaka on tlen kiseliskia imintataj ipan on tlajli nisiu kampa kiseliskej imintiojuan. Niman iherencia imintataj yeuajmej ma kiselikan. ⁸Xkinmijli nochimej on israelitas, tla yakaj tlakatl miki niman xkipiya nion sen itelpoch, on tlajli yejuan kipiya panos intech ichpochuan. ⁹Niman tla no xkipiya nion se ichpoch, tla ijkon, on tlajli kiminmakas ikniuan yejuan tlakamej. ¹⁰Niman tla xkipiya nion se ikniu yejuan tlakatl, tla ijkon, kinkauilijteuas itiojuan. ¹¹Niman tla xkimpia itiojuan, tla ijkon, on tlajli kiseliskej ifamilias yejuan más nisiu ken kiminta. In yes sen ley para nochimej on israelitas. On israelitas ma kichiuakan nochi ken yotimitsnauatij.”

Josué kiselial itekiu Moisés

(Dt 31.1-8)

¹²ToTEKO okijlij Moisés: p —Xtlejko ipan on tepetl itoka Abarim niman xkonta on tlajli yejuan nikinmakas on israelitas. ¹³Sakin, ijkuak yotikontak, timikis ken mokniu Aarón. ¹⁴Ijkon mopan nochias pampa nemejuamej nenomemej xonenkitlakamatkej notlanauatil ipan on xalpatlajkan Zin, ijkuak on israelitas onechixnamikkej. Nemejuamej xonenkiteititijkej noueyipoder imixpan on israelitas ijkuak otlajtlankej atl.

Yejua in onochiu itech on amejli Meriba yejuan onkaj nisiu Cades ipan on xalpatlajkan Zin.

¹⁵Niman Moisés okijlij toTEKO:

¹⁶—NoTEKO Dios, tejuja yejuan tikmaka nemilistli nochi tlakatl, xtlapejpeni sen tlakatl yejuan kinyekanas in israelitas. ¹⁷Xtlapejpeni sen tlakatl yejuan kinyekanas nochiuiyan para xkistinemiskej ken borregos yejuan xkipiayaj intlajpixkau.

¹⁸ToTEKO okinankilij Moisés:

—Xnotsa Josué, ikoneu Nun. Yejua sen tlakatl yejuan kipiya noEspíritu yejuan okimakak tlamatkilistli para tlayekanas. Niman xkintlali momauan ipan itsontekon para kalakis ken ueyi tlayekanketl. ¹⁹Niman ma uajla ixpan on tiopixki Eleazar niman inmixpan nochimej on israelitas. Niman ompa inmixpan on tlakamej, xmaktili on tekittl de tlayakanalistli. ²⁰Xmaka seki on

tekiuajyotl yejuan tejua tikpiya para ijki nochimej on israelitas kitlakaitaskej niman kitlakamatiskej. ²¹Pero Josué noneki yas ixpan on tiopixki Eleazar para itech kiselis notlanauatil, yejuan nejua nemoTEKO nikmakas itechkopa on Urim. Kemaj Josué kinmijlis on israelitas nochi tlinon uelis kichiuaskej noso xkichuaskej.

²²Moisés okichiu nochi ken toTEKO okinauatij. Okuikak Josué ixpan on tiopixki Eleazar niman inmixpan nochimej on israelitas. ²³Kemaj Moisés okintlalij imauan ipan itsontekon Josué, niman okimakak tekiuajyotl ken toTEKO okinauatij.

Uentli yejuan noneki mojmostla

(Ex 29.38-46)

28 ¹Kemaj toTEKO okijlij Moisés: ²“Xkinnauati on israelitas ma kuajkikan nochipa uentli ipan on tonajli ken nejua yonitlanauatij. Noneki kuajkiskej uentli yejuan tlatlas niman no on uentli de pan. In uentli ajuiyak niman nechyolpaktia. ³No xkinmijli: On uentli yejuan nochi tlatla yejuan mojmostla nenkiuentlaliskej para nejua nemoTEKO, yes ome borreguito yejuan se xijkayomej niman xkanaj tlakokoltin ipan intlakayouan. ⁴Noneki se nenkiuentlaliskej kualkan, niman okse tlapoyajkan. ⁵Iuan cada borreguito nenkiuentlaliskej ome kilo harina yejuan más kuajli, niman tlanelojli yes iuan se litro aceite de oliva. ⁶In uentli yejuan nochi tlatlas, nenkiuentlaliskej momostla, ijkon ken nejua nemoTEKO otlanauatij ne ipan on tepetl Sinaí. In uentli yes ajuiyak yejuan kipaktis nejua nemoTEKO. ⁷Iuan cada se borreguito nouentlalis uentli de se litro vino. Yejua in vino noneki nenkitotoyauaskej ijtik on tabernáculo* nixpan nekau nemoTEKO. ⁸Kemaj ijkuak tlapoyajkan, nouentlalis on okse borreguito iuan on uentli de harina niman vino, no ijki ken onouentlalij ijkuak kualkan. In sen uentli yejuan nochi tlatla niman yejuan ajuiyak para nejua nemoTEKO.

On uentli yejuan noneki cada semana

⁹Ipan cada chikueyi tonajli ijkuak sábado, nenkiuentlaliskej ome borreguito yejuan se xijkayomej niman xkanaj tlakokoltin ipan intlakayo. Niman no nouentlalis naui kilo de harina yejuan más kuajli, niman tlanelojli yes iuan aceite. Niman no, iuan nouentlalis on uentli de vino. ¹⁰In uentli yejuan tlatlas, nouentlalis cada sábado ijkuak noseuiskej. Niman iuan on uentli yejuan tlatlas, nouentlalis on uentli de vino aparte de on yejuan nenkimakaskej mojmostla.

Uentli yejuan noneki cada metstli

¹¹Ipan on achtoj tonajli de cada metstli nenkiuentlaliskej para nejua nemoTEKO sen uentli yejuan tlatlas, yejuan yes

ome becerro, sen borrego, niman chikome borreguito yejuan se xijkayomej niman xkanaj tlakokoltin ipan intlakayo. ¹²Niman iuan cada becerro nouentlalis chikuasen kilo harina yejuan más kuajli niman tlanelojli iuan aceite. Niman iuan on borrego nouentlalis nauí kilo harina yejuan más kuajli, niman tlanelojli iuan aceite. ¹³Niman iuan cada borreguito nouentlalis ome kilo harina yejuan más kuajli niman tlanelojli iuan aceite. Nochi in yes sen uentli yejuan nochi tlatlas, yejuan ajuiyak yes para nejua nemoTEKO. ¹⁴On uentli de vino yejuan iuan nouentlalia, yes ome litro para cada becerro, se litro uan tlajko para on borrego, niman se litro para cada borreguito. In yejua nochiuas on uentli yejuan tlatlas, yejuan nouentlalis cada metstli ipan nochi xipan. ¹⁵No ijki, ipan on tonajli, nenkiuentlaliskej sen chivo para sen uentli ipampa tlajtlakojli. Nouentlalis on chivo aparte de on uentli yejuan tlatlas yejuan nouentlalis mojmstla iuan on uentli de harina niman de vino.

Uentli para on iluitl Pascua

(Lv 23.5-8)

¹⁶Ipan on tonajli majtlaktli uan nauí de on achtoj metstli, noneki nenkichiuaskej on iluitl Pascua para nennechmauistiliskej, nejua nemoTEKO. ¹⁷Niman uajmostla, nempeuaskej okse iluitl de chikome tonajli, niman xnenkuaskej nion se pan yejuan kipiya tlaxokolilistli*. ¹⁸Ipan on achtoj tonajli de on chikome, nemosentlaliskej ikan miyek paktli para nennechmauistiliskej nejua nemoTEKO. Niman ipan on tonajli maka yakaj kichiuas itlaj tekítl. ¹⁹Niman para uentli yejuan tlatlas, nennechmakaskej nejua nemoTEKO, ome becerro, sen borrego, niman chikome borreguito yejuan se xijkayomej niman xkanaj tlakokoltin ipan intlakayo. ²⁰Niman iuan in uentli nennechmakaskej nemoTEKO, uentli de harina tlanelojli yes iuan aceite. Xmakakan chikuasen kilo harina para cada becerro, nauí kilo para on borrego, ²¹niman ome kilo para cada borreguito. ²²No ijki, nouentlalis sen chivo para sen uentli ipampa nemotlajtlakoluan. ²³Nochi in nenkiuentlaliliskej nejua nemoTEKO aparte de on uentli yejuan tlatlas yejuan nennechmakaskej mojmstla kualkan. ²⁴Ijkin nenkichiuaskej mojmstla ipan on chikome tonajli de on iluitl. In yejua yes uentli yejuan tlatlas para nennechtlakaitaskej nejua nemoTEKO niman ajuiyak yes nixpan, yejua toTEKO. Nochi in noneki nennechmakaskej aparte de on uentli tlatlak niman on uentli de vino yejuan nenkimakaj mojmstla. ²⁵Niman kampa ika chikome tonajli, no nemosentlaliskej ikan miyek paktli para nennechmauistiliskej nejua nemoTEKO. Ipan on tonajli xitlaj* tekítl nenkichiuaskej.

Uentli de on achtoj pixkalistli

(Lv 23.9-22)

²⁶Ipan on achtoj tonajli de on iluitl de Pixkalistli yejuan no itoka iluitl de Semanas, nenkuajkiskej achijtsin on trigo noso cebada yenkuik yejuan achtoj nenkipixkaskej de nemotlatok. Ipan on tonajli no nemosentlaliskej ikan miyek paktli para nennechmauistiliskej nejua nemoTEKO, niman xitlaj* tekintl nenkichiuaskej. ²⁷Niman nennechmakaskej nejua nemoTEKO, uentli yejuan tlatlas yejuan ajuiyak, niman on uentli yes: ome becerro, sen borrego, niman chikome borreguito yejuan se xijkayomej. ²⁸Niman iuan nennechmakaskej uentli de harina tlanelojli iuan aceite. Chikuasen kilo yes harina para cada becerro, niman nani kilo para on borrego, ²⁹niman ome kilo para cada borreguito. ³⁰No ijki, nennechmakaskej nejua nemoTEKO sen chivo para sen uentli ipampa nemotlajtlakoluan. ³¹Iuan in uentli yejuan tlatlas, nennechmakaskej nejua nemoTEKO on uentli de trigo noso cebada niman vino. Nochi in noneki nennechmakaskej, aparte de on uentli yejuan tlatlas yejuan nenkimakskej mojmotla. On yolkej yejuan nennechmakaskej, noneki xkanaj tlakokoltin yeskej ipan intlalnakayo.

On iluitl de tlapitsaltin

(Lv 23.23-25)

29 ¹“Cada xipan ipan on achtoj tonajli de on ika chikome metstli yejuan nochiua ipan in amatonal israelitas, nemosentlaliskej ikan miyek paktli para nennechmauistiliskej nejua nemoTEKO, niman xitlaj* tekintl nenkichiuaskej ipan on tonajli. On tonajli nenkimpitsaskej tlapitsaltin para temachistiskej ika iluitl. ²Niman ipan on tonajli nennechmakaskej nejua nemoTEKO uentli yejuan tlatlas, yejuan ajuiyak para yejua. Nennechmakaskej sen becerro, sen borrego, niman chikome borreguito yejuan se xijkayomej niman xkanaj tlakokoltin ipan intlakayo. ³Niman iuan on uentli de yolkej no nennechmakaskej uentli de harina tlanelojli iuan aceite. On harina yes chikuasen kilo para on becerro, nani kilo para on borrego, ⁴niman ome kilo para cada borreguito. ⁵No nennechmakaskej sen chivo para sen uentli ipampa nemotlajtlakoluan. ⁶Nochi in uentli nennechmakaskej nehua nemoTEKO, aparte de on uentli yejuan tlatlaskej, yejuan nennechmakaskej mojmotla niman cada metstli. San sekan nennechmakaskej iuan on uentli de trigo noso cebada niman on uentli de vino. In yejua yes uentli yejuan tlatlas para itlakaitalis niman ajuiyak yes para nejua nemoTEKO.

Uentli para on tonajli ijkuak kitlapojpoluiyaj tlajtlakojli

(Lv 23.26-32)

⁷Ipan majtlaktli tonajli sano ipan on chikome metstli, oksejpa nemosentlaliskej ikan miyek paktli para nenechmauistiliskej nejua nemoTEKO. Nemosauaskej niman xitlaj* tekintl nenkichiuaskej. ⁸Niman ipan on tonajli nennechmakaskej sen uentli yejuan tlatlas niman ajuiyak yes para nejua nemoTEKO. Nennechmakaskej sen becerro, sen borrego, niman chikome borreguito yejuan se xijkayomej, niman yejuan xkanaj tlakokoltin ipan intlakayo. ⁹Niman iuan on becerro, on borrego niman borreguitos, nennechmakaskej sen uentli de harina yejuan más kuajli niman tlanelojli iuan aceite. On harina chikuasen kilo yes para on becerro, naui kilo para on borrego, ¹⁰niman ome kilo para cada borreguito. ¹¹No ijki, nennechmakaskej sen chivo para on uentli ipampa tlajtlakojli, aparte de on uentli yejuan tlatlas yejuan nennechmakaskej ipan on Tonajli de Tlapojpoluilistli, para mechchipauas, niman aparte de on uentli yejuan tlatlas yejuan nennechmakaskej mojmstla iuan on uentli de trigo noso cebada niman on uentli de vino.

Uentli para on iluitl de kalmatsitsimej

(Lv 23.33-44)

¹²Ipan on tonajli 15 de on chikome metstli, oksejpa nemosentlaliskej ikan miyek paktli para nennechmauistiliskej nemoTEKO. On tonajli xitlaj* tekintl nenkichiuaskej. Chikome tonajli nenkichiuaskej iluitl para notlakaitalis nejua nemoTEKO. ¹³Ipan on achtoj tonajli, nennechmakaskej sen uentli yejuan tlatlas, yejuan ajuiyak yes para nejua nemoTEKO. On uentli yes majtlaktli uan yeyi becerro, ome borrego, niman majtlaktli uan naui borreguito yejuan se xijkayomej niman xkanaj tlakokoltin ipan intlalnakayo. ¹⁴Niman iuan on becerros, borregos niman borreguitos, nenkimakaskej on uentli de harina yejuan más kuajli niman tlanelojli iuan aceite. On harina chikuasen kilo yes para cada becerro, naui kilo para cada borrego, ¹⁵niman ome kilo para cada borreguito. ¹⁶No ijki, ipan on tonajli nennechmakaskej sen chivo para on uentli ipampa tlajtlakojli, aparte de on uentli yejuan tlatlas, yejuan nennechmakaskej mojmstla, san sekan iuan on uentli de trigo noso cebada niman on uentli de vino.

¹⁷Kampa ika ome tonajli de on iluitl, nennechmakaskej majtlaktli uan se becerro, ome borrego, niman majtlaktli uan naui borreguito yejuan se xijkayomej niman xkanaj tlakokoltin ipan intlakayo. ¹⁸Niman iuan on becerros, borregos niman borreguitos, nennechmakaskej uentli de trigo noso cebada, niman

uentli de vino. Nennechmakaskej ichkich kech noneki iuan on becerros, on borregos niman on borreguitos ken nejua nemoDios yomechnauatij. ¹⁹No ijki, ipan on tonajli nennechmakaskej sen chivo para on uentli ipampa tlajtlakojli, aparte de on uentli yejuan tlatlas, yejuan nennechmakaskej mojmstla, san sekan iuan on uentli de trigo noso cebada niman on uentli de vino.

²⁰'Kampa ika yeyi tonajli ipan on iluitl, nennechmakaskej majtlaktli uan se becerro, ome borrego, niman majtlaktli uan naui borreguito yejuan se xijkayomej niman xkanaj tlakokoltin ipan intlakayo. ²¹Niman iuan on becerros, borregos niman borreguitos, nennechmakaskej uentli de trigo noso cebada niman de vino. Nennechmakaskej ichkich kech noneki iuan on becerros, on borregos niman on borreguitos ken toDios yomechnauatij. ²²No ijki, ipan on tonajli nennechmakaskej sen chivo para on uentli ipampa tlajtlakojli aparte de on uentli yejuan tlatlas, yejuan nennechmakaskej mojmstla san sekan iuan on uentli de trigo noso cebada niman on uentli de vino.

²³'Kampa ika naui tonajli de on iluitl, nennechmakaskej majtlaktli becerros, ome borregos niman majtlaktli uan naui borreguitos yejuan se xijkayomej niman xkanaj tlakokoltin ipan intlakayo. ²⁴Niman iuan on becerros, borregos niman borreguitos, nennechmakaskej uentli de trigo noso cebada niman on uentli de vino. Nennechmakaskej ichkich kech noneki iuan on becerros, on borregos niman on borreguitos ken nejua nemoDios yonemechnauatij. ²⁵No ijki, ipan on tonajli, nennechmakaskej sen chivo para on uentli ipampa tlajtlakojli aparte de on uentli yejuan tlatlas, yejuan nennechmakaskej mojmstla san sekan iuan on uentli de trigo, noso cebada niman on uentli de vino.

²⁶'Kampa ika makuijli tonajli de on iluitl, nennechmakaskej chiknaui becerro, ome borrego, niman majtlaktli uan naui borreguito yejuan se xijkayomej niman xkanaj tlakokoltin ipan intlakayo. ²⁷Niman iuan on becerros, borregos niman borreguitos, nennechmakaskej on uentli de trigo noso cebada niman on uentli de vino, ken nejau nemoDios yonemechnauatij. ²⁸No ijki, ipan on tonajli nennechmakaskej sen chivo para on uentli ipampa tlajtlakojli, aparte de on uentli yejuan tlatlas, yejuan nennechmakaskej mojmstla san sekan iuan on uentli de trigo noso cebada niman on uentli de vino.

²⁹'Kampa ika chikuasen tonajli de on iluitl, nennechmakasej chikueyi becerro, ome borrego niman majtlaktli uan naui borreguito yejuan se xijkayomej niman xkanaj tlakokoltin ipan intlakayo. ³⁰Niman iuan on becerros, borregos niman borreguitos, nennechmakaskej uentli de trigo noso cebada niman on uentli de vino. Nennechmakaskej ichkich kech noneki

iuan on becerros, iuan borregos, niman on borreguitos ken nejua nemoDios yonemechnauatij. ³¹No ijki, ipan on tonajli, nennechmakaskej sen chivo para on uentli ipampa tlajtlakojli, aparte de on uentli yejuan tlatlas, yejuan nennechmakaskej mojmmostla san sekan iuan on uentli de trigo noso cebada niman on uentli de vino.

³²'Kampa ika chikome tonajli de on iluitl, nennechmakaskej chikome becerro, ome borrego niman majtlaktli uan naui borreguito yejuan se xijkayomej niman xkanaj tlakokoltin ipan intlakayo. ³³Niman iuan on becerros, borregos niman borreguitos, nennechmakaskej uentli de trigo noso cebada niman on uentli de vino. Nennechmakaskej ichkich kech noneki iuan on becerros, iuan borregos, niman on borreguitos ken nejua nemoDios yomechnauati. ³⁴No ijki, ipan on tonajli, nennechmakaskej sen chivo para on uentli ipampa tlajtlakojli, aparte de on uentli yejuan tlatlas, yejuan nennechmakaskej mojmmostla san sekan iuan on uentli de trigo noso cebada niman on uentli de vino.

³⁵'Kampa ika chikueyi tonajli de on iluitl, nemosentlaliskej ikan miyek paktli para nennechmauistiliskej, niman ipan on tonajli xitlaj* tekittl nenkichiuaskej. ³⁶Ipan on tonajli nennechmakaskej sen uentli yejuan tlatlas yejuan ajuiyak yes para nejua nemoTEKO. Niman on uentli yes sen becerro, sen borrego, niman chikome borreguito yejuan se xijkayomej niman xkanaj tlakokoltin ipan intlalnakayo. ³⁷Niman iuan on becerro, borrego niman borreguitos, nennechmakaskej on uentli de trigo noso cebada niman on uentli de vino. Nennechmakaskej ichkich kech noneki iuan on becerro, on borrego niman on borreguitos ken nejua nemoDios yonemechnauatij. ³⁸No ijki, ipan on tonajli, nennechmakaskej sen chivo para on uentli ipampa tlajtlakojli, aparte de on uentli yejuan tlatlas, yejuan nennechmakaskej mojmmostla san sekan iuan on uentli de trigo noso cebada niman on uentli de vino.

³⁹'In yejua uentli yejuan nenechmakaskej nejua nemoTEKO, ipan on tonaltin yejuan yoniktlalij. Nennechmakaskej in uentli aparte de okseki uentli yejuan onennechprometerouilijkej yejuan ikatlakajtli noso yejuan nenkitlaliaj ipan nemoyoilo para nennechmakaskej, tla on uentli yejuan tlatlas, noso uentli de trigo noso cebada niman de vino, noso uentli de yoltlalilistli."

⁴⁰Ijkon tej, Moisés okinmijlij on israelitas nochi in tlanauatiltin yejuan toTEKO okimakak.

Ijkin kichiuas yakaj yejuan kichiua sen promesa itech Dios

30 ¹Moisés okinnots nochimej on tlayekankej de cada tribu* intech on israelitas, niman ijkin okinmijlij: "ToTEKO ijkin

tlanauatia: ²Tla yakaj itlaj kiprometerouilia toTEKO, noso kichiu sen tlajtolmakalistli yejua itech ika kichiuas noso xkichiuas itlaj, ika onkaj kichiuas nochi ken yokijtoj.

³Ijkuak sen ichpochtli yejuan sanken* nemi itech itataj, itlaj kiprometerouilia toTEKO, noso nokalaktia itlaj kichiuas, ⁴niman tla itataj kimatis ika itlaj okiprometeroj, noso itlaj ika onokalaktij kichiuas niman itataj xkikaualtia, tla ijkon, on ichpochtli noneki kichiuas nochi on tlen yokijtoj. ⁵Pero tla ijkuak itataj kimatis, xkauilis ma kichiu on tlen yokijtoj, tla ijkon, maka kichiuas pampa itataj xkauilia. Niman toTEKO kitlapojpoluulis on tlen okijtoj pampa itataj xkauilia ma kichiu.

⁶Niman tla sen ichpochtli itlaj okiprometerouilij toTEKO, noso okichiu sen tlajtolmakalistli itech Dios, maski xachtoj kuajli kinemiliaya, niman kemaj xuejkajtika nonamiktia, ⁷niman iueuentsin* kimatis pero xitlaj* kijlis, tla ijkon, on ichpochtli ika onkaj kichiuas on tlen yokijtoj. ⁸Pero tla iueuentsin* kimatis niman xkualis ma kichiu, tla ijkon, maka kichiuas pampa iueuentsin* xkauilia kichiuas on tlen yokijtoj. Tla ijkon nochiuas, toTEKO kitlapojpoluulis on tlen yokijtojka.

⁹Pero tla sen suatl yejuan yokaualtik noso okikau iueuentsin* itlaj kiprometerouilia Dios, ika onkaj kichiuas ken yokijtoj.

¹⁰Ijkuak sen suatl yejuan yononamiktij, itlaj kiprometerouilia toTEKO, noso kichiuas sen tlajtolmakalilistli ika itokatsin Dios, ¹¹niman iueuentsin* kimatis on tlen isiuau okichiu, niman xkikaualtia, tla ijkon, ika onkaj kichiuas on tlen yokijtoj. ¹²Pero tla iueuentsin* kimatis niman xkauilis ma kichiu, tla ijkon, xkichiuas on tlen yokiprometerouilijka Dios, pampa iueuentsin* xkauilia. Niman toTEKO kitlapojpoluulis on tlen yokijtojka.

¹³Sen teueuentsin uelis kauilis, noso xkauilis isiuau ma kichiu on tlen okiprometerouilijka Dios, noso okichijka sen tlajtolmakalilistli ika itokatsin Dios ika nosauas. ¹⁴Tla panoua se tonajli noso ome, niman on teueuentsin xitlaj* kijlia, tla ijkon, kijtosneki ika kauilia ma kichiu nochi on tlen okiprometeroj, niman on suatl noneki kichiuas nochi on tlen okiprometerouilij Dios. ¹⁵Pero tla on tlakatl kipanoltis keski tonajli niman sakin* kijtos ika xkauilia ma kichiu, tla ijkon, yejua kipiayas tlajtlakojli tla on suatl xok okichiu on tlen okijtojka kichiuas.”

¹⁶In yejua tlanauatiltin yejuan toTEKO okimakak Moisés para kenijki nouikas sen tlakatl iuan isiuau, niman sen tajtli iuan ichpoch ijkuak on ichpoch sanken* nemi itech.

On israelitas kixoxotoniaj on país Madián

31 ¹ToTEKO okijlij Moisés: ²“Xkintlakuepilti on madianitas ika on tlen okinchiuilijkej on israelitas. Niman sakin*, tla yotikchiu, tejua timikis.”

³Kemaj Moisés okinmijlij on israelitas:

—Xkajsikan nemotepos sekimej nemejuamej para nenyaskej ipan guerra. Niman kemaj xkinuijsokitij on madianitas para xkintlakuepiltikan ikan itokatsin toTEKO. ⁴Cada tribu* kititlanis se mil tlakamej ipan on guerra.

⁵Ijkon tej, ipan cada tribu* okintlapejpenijkej se mil tlakamej. Nochimej san sekan ouajnohikej 12 mil ikan intepos para guerra. ⁶Moisés okintitlan para ontlauijsokiskej iuan Finees, itelpoch on tiopixki Eleazar yejuan kiktiya on tlajtlamach* yejuan kitekitiltiaj ipan on tabernáculo. Niman no kiktiya on tlapitsaltin yejuan kimpitsaskej ijkuak peuas on guerra.

⁷Niman okinuuijsokkej on madianitas niman okinmiktijkej nochimej ken toTEKO okinauatij Moisés. ⁸Okimiktijkej Evi, Requém, Zur, Hur niman Reba. In yejuamej on makuiltimej reyes katkaj intech on madianitas. Niman no okimiktijkej Balaam, ikoneu Beor. ⁹On israelitas okinmajsikej on siuamej madianitas iuan inkoneuan, niman okinuikakej. Niman no okinkuilijkej nochimej iminyolkauan, niman nochi on tlajtlamach* tlen kipiayaj yejuan patioj. ¹⁰No ijki, okintlatijkej nochi inuejueyikalpauan niman campamentos. ¹¹Niman nochi on tlen okinkuilijkej, on yolkej, niman on siuamej iuan inkoneuan, ¹²okiktijkej Moisés, on tiopixki Eleazar niman on israelitas yejuan xteuan okinuuijsokitoj on madianitas. Yejuamej nemiyaj kampa onochachantijkaj ipan on ixtlauatl de ipaís Moab, nisiu on río Jordán, ixpan on ueyikalpan Jericó.

¹³Kemaj Moisés, on tiopixki Eleazar, niman nochimej on tlayekankej de on israelitas, okiskej ipan on campamento niman oyajkej para okiminnamikitoj. ¹⁴Pero Moisés sanoyej okualan iminuan on tlayekankej yejuan kinyekanayaj se mil soldados niman yejuan kinyekanayaj 100 soldados, on yejuan oyajkaj ipan on guerra. ¹⁵Niman ijin okinmijlij:

—¿Tline xonenkinmiktijkej on siuamej? ¹⁶Nenkimatstokej ika yejuamej okijchijkej ken okijtoj Balaam, niman okinchiualtijkej ma tlajtlakokan on israelitas ixpan toTEKO pampa okimauistilijkej on Baal-peor. Yejua ika, impan ouets sen kokolistli on israelitas. ¹⁷Yejua ika tej, xkinmiktikan amantsin nochimej on tlakakokonej niman nochimej on siuamej yejuan yonotekakej iuan sen tlakatl. ¹⁸Pero on yejuan xe kaman notekaj iuan sen tlakatl maka nenkinmiktiskej, yej uelis ninkinmoyaxkatiskej. ¹⁹Niman nemochimej* yejuan onenkimiktijkej yakaj noso onenkimatokakej sen mikatsintli, noneki nennemiskej ikiauak on campamento chikome tonajli. Ipan yeyi tonajli niman ipan chikome tonajli, noneki nemochipauaskej ixpan Dios, nemejuamej niman on ichpokamej

yejuan yonenkinmoyaxkatijkej. ²⁰No ijki, nenkichipauaskej nochi on tlakentin, on tlajtlamach* yejuan tlachijchijtin ikan kuetlaxtli, noso itsojmiyo chivo, niman yejuan de kojtlí.

²¹Kemaj on tiopixki Eleazar okinmijlij nochimej on soldados yejuan oyajkaj ipan on guerra:

—In yejua ley yejuan toTEKO okimakak Moisés: ²²Nochi tlajtlamach* yejuan kixikoua tlítl, ken on oro, plata, bronce, hierro, estaño, noso plomo, ²³niman nochi okseki tlajtlamach* yejuan kixikoua tlítl, noneki nenkipanoltiskej ipan tlítl para nenkinchipauaskej. Niman kemaj no nenkimpajpakaskej ika on atl de chipaualistli. Niman nochi on tlajtlamach* yejuan xkixikoua tlítl, noneki san nenkimpajpakaskej ika on atl de chipaualistli. ²⁴Ipan on ika chikome tonajli, noneki nenkimpakaskej nemotlakeuan, niman kemaj nemokauaskej chipajkej ixpan toTEKO. Kemaj uelis nenkalakiskej ipan on campamento.

Okixelojkej on tlen okinkuilijkej on madianitas

²⁵ToTEKO okijlij Moisés:

²⁶“Xkimpoua on yolkej, niman nochimej on yejuan onenkinkuilijkej on madianitas. Ma mitspaleui on tiopixki Eleazar niman on tlayekankej de cada clan, niman xkijkuilokan keskimej nemij. ²⁷Kemaj nochi on kech onkaj, xtlajkoxelokan. Tlajkotipan xkinxexelouili yejuan oyajkaj ipan on nouijsokilistli, niman on okse tlajkotipan xkinxexelouili on oksekimej israelitas. ²⁸No ijki, xkuikan seki para nejua nemoTEKO: Itech cada 500 tikixtis sentetl para tinechmakas de nochi on yejuan tikinmakas on soldados. Tinechmakas on tlakamej yejuan onenkimajsikej, on uakaxtin, on polokomej*, niman on borregos. ²⁹Niman tikmakas on tiopixki Eleazar ken tlaxtlauijli para nejua, nemoTEKO. ³⁰Niman on okse tlajkotipan yejuan tikinmakas on oksekimej israelitas, itech cada 50 tikixtis sentetl itech nochi tlakatl yejuan onenkimajsikej, niman on uakaxtin, on polokomej* niman on borregos, para tikinmakas on levitas yejuan cuidarouaj notabernáculo.”

³¹Moisés niman Eleazar okichijkej nochi ken toTEKO okinauatij Moisés.

³²⁻³⁵Maski xteuan okipojkej on tlen okinotilanilijkej on soldados, nochi on tlen okinkuilijkej intlauelikniuan, katka: 675 mil borregos, 72 mil uakaxtin, 61 mil polokomej*, niman 32 mil ichpokamej yejuan xe kaman notekayaj iuan yakaj tlakatl.

³⁶⁻⁴⁰On tlajkotipan yejuan intech onokau on soldados katka: 337 mil 500 borregos, niman okimakakej toTEKO ken tlaxtlauijli 675 borregos, 36 mil uakaxtin, niman okimakakej toTEKO

ken tlaxtaluijli 62 uakaxtin, 30 mil 500 polokomej*, niman okimakakej ken tlaxtauijli toTEKO 61 polokomej*, niman 16 mil ichpokamej yejuan xe kaman notekayaj iuan yakaj tlakatl, niman okimakakej toTEKO ken tlaxtauijli 32 ichpokamej.

⁴¹ Moisés okimakak on tiopixki Eleazar, on tlen noneki kiselis toTEKO, ijkon ken toTEKO okinauatij Moisés.

⁴²⁻⁴⁶ On okse tlajkotipan yejuan kintokarouaya on oksekimej israelitas no ichkich katka ken Moisés okinmakak on soldados: 337 mil 500 borregos, 36 mil uakaxtin, 30 mil 500 polokomej*, niman 16 mil ichpokamej yejuan xe kaman notekayaj iuan yakaj tlakatl.

⁴⁷ Itech on tlajkotipan yejuan okiselikej on israelitas, Moisés okixtij itech cada 50, sen ichpochtli niman no okixtij sen yolki. Niman okinmakak on levitas yejuan tlajpiyaj ipan itabernáculo toTEKO, ijkon ken toTEKO okinauatij.

⁴⁸ Kemaj on tlayekankej yejuan okinyekankej se mil soldados niman yejuan okinyekankej 100 soldados okitatorj Moisés.

⁴⁹ Niman ijkin okijlijkej: “Tejuamej, motekitkauan yotikimpojkej on soldados yejuan otikinyekankej ipan nouijsokilistli, niman xakaj omik. ⁵⁰ Yejua ika, nikan tikuajkij in tlajtlamach* de oro yejuan cada se okinextij: makoskamej, pulseras, anillos, pipiloltin, koskamej, niman okseki tlajtlamach* tikmakaj toTEKO, ken sen uentli pampa otechmanauj.”

⁵¹ Moisés niman Eleazar okiselijkej nochi on tlajtlamach* de oro. ⁵² On tlayekankej de se mil soldados niman on tlayekankej de 100 soldados okitemakakej nochi on oro, niman yetik katka 184 kilos. ⁵³ Cada soldado okuajkik tlen okuilij itlauelikniu. ⁵⁴ Ijkon tej, Moisés niman Eleazar okiselijkej on oro yejuan kuajkiyaj on tlayekankej, niman okiktikej ipan on tabernáculo* kampa nemi Dios, para toTEKO ma kinnelnamiki on israelitas.

Itribu* Rubén niman itribu* Gad okiselijkej imintlal

(Dt 3.12-22)

32 ¹ Itribu* Rubén niman itribu* Gad kimpiyayaj sanoyej miyekej yolkej. Ijkuak okitakej ika on ueyitlalpanmej Jazer niman Galaad sanoyej kuajli katkaj para inyolkauan, ² oyajkej okitatorj Moisés, on tiopixki Eleazar, niman intlayekankauan on israelitas. Niman ijkin okinmijlijkej:

³ —Xkitakan: nochi in regiones de Atarot, Dibón, Jazer, Nimra, Hesbón, Eleale, Sebam, Nebo niman Beón ⁴ toTEKO okitekuilij para on israelitas. In tlaltin sanoyej kuajkualtin para yolkej, niman tejuamej timotekitkauan tikimpiyaj miyekej yolkej. ⁵ Tla tikita kuajli, xtechmaka tejuamej on ueyitlajli, niman maka xtechpanolti ipan on río Jordán.

⁶Pero Moisés okinnankilij:

—¿Nemejuamej nenkinekij nemokauaskej nikan chika nemokniuan israelitas yauij ipan guerra? ⁷¿Tline nenkinyolmajxalosnekij on israelitas para maka ma panokan ipan on ueyitlalpan yejuan toTEKO yokinmakak? ⁸Ijkon okichijkej nemotajuan ijkuak onikintitlan desde Cades-barnea para ma ichtakatlajtlachatij ipan on ueyitlalpan. ⁹Oajsikej hasta ipan on ixtlauatl, Escol niman kuajli okijitakej on tlajli. Niman sakin*, okinyolmajxalojkej on israelitas para maka ma kalakikan ipan on país yejuan toTEKO yokinmakak. ¹⁰Yejua ika, toTEKO sanoyej okualan ipan on tonajli, niman ijin onotlajtolmakak ika itokatsin: ¹¹“On tlakamej yejuan okiskej Egipto, yejuan kipiay sempoajli xipan para tlakpak, xkalakiskej ipan on tlajli yejuan onikprometerouilij Abraham, Isaac niman Jacob, pampa xonechneltokakej niman xonechtlamatkej* ika nochi iminyojlo. ¹²San uelis kalakis Caleb itelpoch Jefone on cenezeo, niman Josué itelpoch Nun, pampa yejuamej onechneltokakej niman onechtlakamatkej iminTEKO ika nochi iminyojlo.” ¹³ToTEKO sanoyej okualan iminuan on israelitas niman okinchiualtij ma nejnentinemikan ipan on xalpatlajkan 40 xipan, hasta kaman omikkej nochimej on yejuan sanoyej okualanijkej toTEKO ika iminxompayeyueualis. ¹⁴Niman aman nemejuamej, tekoneuan intech on tlajtlakolejkej tatajtin, no nenkinekij nenkichiuaskej on tlen xkuajli ken okichijkej nemotajuan. Niman aman ijkon oksejpa nenkualanisnekij toTEKO para kualanis iminuan on israelitas. ¹⁵Tla nemejuamej xnenkinekij nenkineltokaskej niman nenkitlakamatiskej toTEKO, yejua kichiuas para nochimej on israelitas más ma uejkauikan ipan in xalpatlajkan. Ijkon tej, nemejuamej nenkipiyaskej tlajtlakojli ipampa inmikilis.

¹⁶Kemaj okinisuijkej Moisés niman okijlijkej:

—In yejua on tlen tejuamej tiknekij tikchiuaskej: Achtoj tikchijchiuaskej incorral toyolkauan, niman kalpanmej para tofamilias. ¹⁷Kemaj tiktiskej totepos niman tikinyekanaskej on oksekimej israelitas hasta kaman kiselia itlal cada se. Pero chika tiauij, tofamilias nokauaskej nikan ipan in uejueyikalpanmej yejuan kuajli tsakutiaskej ikan tepantli para xitlaj* kinchiuiliskej on tlakamej yejuan chantij nanika nisiu. ¹⁸Tejuamej xtitokuepaskej tochan hasta ijkuak nochimej on israelitas yokiselijkej imintlal. ¹⁹Pero tejuamej xtikseliskej itlaj tlajli iminuan ne lado de on río Jordán, tla yotikselijkej nikan ipan in lado.

²⁰Niman Moisés okiminankilij:

—Tla melauak nenkichiuaskej on tlen nenkijtouaj, niman nemochimej* nenyaskej ikan nemotepos ipan on guerra ijkuak

toTEKO tlanauatis, ²¹niman nenkipanosej on río Jordán ken toTEKO tlanauatia, niman nemokauaj ompa hasta ijkuak toTEKO tlamis kinkixtis nochimej itlauliknivan, ²²tla ijkon, ijkuak toTEKO yokitekuij on tlajli, uelis nenmokeupaskej ipan nemotlal, pampa yonenkichijkej nochi on tlen onenkijtojkej ixpan toTEKO, niman inmixpan on israelitas. Niman in tlajli nemoyaxka* yes ixpan toTEKO. ²³Pero tla xnenkichiuaj nochi on tlen yonenkijtojkej, tlami xmatikan ika nenkipiyaskej tlajtlakojli itech toTEKO, niman ika se tonajli mechajsis sen castigo ipampa on tlajtlakojli. ²⁴Xkinchijchiuakan tej, uejueyikalpanmej para nemofamilias, niman corrales para nemoyolkauan, pero xchiuakan on tlen yonenkijtojkej.

²⁵On itribu* Rubén niman on itribu* Gad okinankilijkej:

—Tejuamej motekitkauan tikchiusaskej nochi on tlen yotitech nauatij. ²⁶Tokoneuan niman tosiuauan, iuan nochi toyolkauan nokauaskej nikan ipan in uejueyikalpanmej de Galaad. ²⁷Pero tejuamej motekitkauan tiaskej ikan totepos ipan on guerra ikan itlanauatil toTEKO, ijkon ken tejuayotitech nauatij.

²⁸Kemaj Moisés okimakak on tiopixki Eleazar, Josué niman on tlayekankej ipan cada tribu* de on israelitas in tlanauatiltin:

²⁹—Tla nochimej on tlakamej de itribu* Gad niman itribu* Rubén panosej nemouan on río Jordán ika intepos para ontlauijsokiskej ken toTEKO kinnauatia, hasta ijkuak yonentetlankej ipan on país, nemejuamej nenkinmakaskej on tlajli de Galaad para inyaxka yes. ³⁰Pero tla xpanouaj nemouan ikan imintepos, tla ijkon, no kiseliskej sen ueyitlalpan nemouan ne ipan Canaán.

³¹On itribu* Gad niman on itribu* Rubén otlanankilijkej:

—Tejuamej motekitkauan tikchiusaskej nochi tlen toTEKO tlanauatia. ³²Tipanoskej ikan totepos ipan on tlajli Canaán. Tiktlakamatiskej on tlen toTEKO technauatia, pero toyaxka yes on ueyitlalpan yejuan onkaj ipan in lado de in río Jordán kampaka ikisayan tonaltsintli.

³³Ijkon Moisés okinmakak itribu* Gad niman itribu* Rubén niman on tlajkotipan itribu* Manasés yejuan itelpoch José, on uejueyi tlalpanmej yejuan achtoj inyaxka katka Sehón yejuan iminrey katka on amorreos, niman Og yejuan rey katka ipan on tlajli Basán. Okinmakak nochi on uejueyikalpanmej yejuan ompa onkatkaj niman on ueyitlalpan yejuan onkatka inyeualkan.

³⁴On yejuan itribu* Gad okinkuejkuektlalijkej on uejueyikalpanmej de Dibón, Atarot, Aroer, ³⁵Atarot-sofan, Jazer, Jogbeha, ³⁶Bet-nimra niman Bet-arán. Okinyeualtsakukej kuajli ikan tepantli niman okinyeualtsakukej iminyolkauan.

³⁷On yejuan itribu* Rubén okinkuejkuetlaliijkej on uejueyikalpanmej Hesbón, Eleale, Quiriataim, ³⁸Nebo, Baal-meón niman Sibma. Sekimej de in uejueyikalpanmej okimpatilijkej imintoka, niman okintokayotikej ken aman imintokaj.

³⁹Iuejyakoneuan Maquir, itelpoch Manasés, okinoyaxkatitoy on tlajli de Galaad, niman okinkixtijkej on amorreos yejuan ompa nemiyaj. ⁴⁰Kemaj Moisés okinmakak iuejyakoneuan Maquir on tlajli Galaad, niman yejuamej ompa onochantijkej.

⁴¹Jair, iuejyakoneu* Manasés, no okinoyaxkatij* keskimej kalpantsitsimej de on amorreos, niman okintokayotij Havot-jair.

⁴²Noba iuan oksekimej okinoyaxkatijkej on ueyikalpan Kenat iuan nochi on kalpanmej yejuan nису onkatkaj niman iuan nouikayaj, niman okitokayotij on ueyitlalpan Noba ken yejua itoka.

On ojtli yejuan on israelitas okinejnenkej

33 ¹Nikan onkaj imintoka on kampa on israelitas opanotiajkej ijkuak okiskej ipan on país Egipto. Tekpantiajay mijmijekej ikan intribus, niman Moisés iuan Aarón yejuamej tlayekanayaj. ²Ika itlanauatil toTEKO, Moisés kijkuilojtiaya imintoka nochiuiyan on kampa ajsiyaj niman kampa kisayaj.

³On israelitas okiskej on kalpan Ramsés ne Egipto, uajmostla de on tonajli ijkuak yokichijkej on iluitl Pascua. Okiskej ipan on kaxtojli* tonajli de on achtoj metstli de on xipan. Okiskej ikan ueyi poder imixpan on Egipcios, ⁴chika on egipcios kintôkayaj inyenkuikoneuan yejuan toTEKO okichiu para ma mikikan. Ijkuak toTEKO okinmiktij, okiteitij ika yejua más kipiya poder xken imindioses on egipcios. ⁵Kemaj on israelitas okiskej ne kalpan Ramsés niman onochachantitoy kampa itoka Sucot. ⁶Kemaj okiskej ne Sucot niman kemaj onochachantitoy Etam kampa peua on xalpatlajkan. ⁷Kemaj okiskej Etam niman otlamalakachotoj para Pi-hahiroto yejuan nokaua kampa ikisayan tonaltsintli de Baal-zefón, niman onokajkej nису Migdol. Ompa ixpan ochachantijkej. ⁸Kemaj okiskej ne Pi-hahiroto, opanokej itlajkotian on Mar Rojo, niman oajsikej ne xalpatlajkan. Niman ijkuak yonejnenkej yeyi tonajli ipan on xalpatlajkan Etam, onochachantitoy ne kampa kuitiaj Mara. ⁹Kemaj okiskej ne Mara niman oajsikej Elim kampa onkatkaj majtlaktli uan ome ameltin niman 70 palmeras. Niman ompa onochachantijkej.

¹⁰Kemaj okiskej ne Elim niman onochachantitoy nису itech on Mar Rojo.

j 33.3 In tonajli kamantika uetsi ipan Marzo niman kamantika ipan ipeuyan Abril ipan totonalamau.

¹¹ Kemaj okiskej itech on Mar Rojo, niman onochachantitoy ipan on xalpatlajkan itoka Sin.

¹² Kemaj okiskej ipan on xalpatlajkan Sin, niman onochachantitoy kampa itoka Dofca.

¹³ Kemaj okiskej Dofca, niman onochachantitoy kampa itoka Alús.

¹⁴ Kemaj okiskej Alús, niman onochachantitoy kampa itoka Refidim kampa xonkatka atl para koniskej.

¹⁵ Kemaj okiskej Refidim, niman onochachantitoy ipan on xalpatlajkan Sinaí.

¹⁶ Kemaj okiskej ne xalpatlajkan Sinaí, niman onochachantitoy kampa itoka Kibrot-hataava.

¹⁷ Kemaj okiskej Kibrot-hataava niman onochachantitoy Hazerot.

¹⁸ Kemaj okiskej Hazerot, niman onochachantitoy kampa itoka Ritma.

¹⁹ Kemaj okiskej Ritma, niman onochachantitoy kampa itoka Rimón-peres.

²⁰ Kemaj okiskej Rimón-peres, niman onochachantitoy kampa itoka Libná.

²¹ Kemaj okiskej Libná, niman onochachantitoy kampa itoka Rissa.

²² Kemaj okiskej Rissa, niman onochachantitoy kampa itoka Ceelata.

²³ Kemaj okiskej Ceelata, niman onochachantitoy ipan on tepetl Sefer.

²⁴ Kemaj okiskej ipan on tepetl Sefer, niman onochachantitoy kampa itoka Harada.

²⁵ Kemaj okiskej Harada, niman onochachantitoy kampa itoka Macelot.

²⁶ Kemaj okiskej Macelot, niman onochachantitoy kampa itoka Tahat.

²⁷ Kemaj okiskej Tahat, niman onochachantitoy kampa itoka Tara.

²⁸ Kemaj okiskej Tara, niman onochachantitoy kampa itoka Mitca.

²⁹ Kemaj okiskej Mitca, niman onochachantitoy kampa itoka Hasmona.

³⁰ Kemaj okiskej Hasmona, niman onochachantitoy kampa itoka Moserot.

³¹ Kemaj okiskej Moserot, niman onochachantitoy kampa itoka Bene-jaacán.

³² Kemaj okiskej Bene-jaacán, niman onochachantitoy kampa itoka Hor de Gidgad.

³³ Kemaj okiskej Hor de Gidgad, niman onochachantitoy kampa itoka Jotbata.

³⁴Kemaj okiskej Jotbata, niman onochachantitoy kampa itoka Abrona.

³⁵Kemaj okiskej Abrona, niman onochachantitoy kampa itoka Ezión-geber.

³⁶Kemaj okiskej Ezión-geber niman onochachantitoy ipan on xalpatlajkan itoka Zin ne Cades.

³⁷Kemaj okiskej Cades, niman onochachantitoy ipan on tepetl Hor itech ika on tlajli Edom.

³⁸Kemaj toTEKO okinauatij on tiopixki Aarón, ma tlejko ipan on tepetl Hor niman ompa omik ipan on achtoj tonajli de on makuijli metstli^k, ijkuak yejuamej kipiyyaj 40 xipan ika okiskej ne Egipto. ³⁹Ijkuak Aarón omik ipan on tepetl Hor, kipiyya 123 xipan.

⁴⁰On rey Cananeo de Arad, yejuan chantiya Néguev de Canaán, okimat ika ye uajlayaj on israelitas.

⁴¹On israelitas okiskej ipan on tepetl Hor, niman kemaj onochachantitoy kampa itoka Zalmona.

⁴²Kemaj okiskej Zalmona, niman onochachantitoy kampa itoka Punón.

⁴³Kemaj okiskej Punón, niman onochachantitoy kampa Obot.

⁴⁴Kemaj okiskej Obot, niman onochachantitoy Ije-abarim kampa iuan nonamiki on tlajli Moab.

⁴⁵Kemaj okiskej Ije-abarim, niman onochachantitoy kampa itoka Dibón-gad.

⁴⁶Kemaj okiskej Dibón-gad, niman onochachantitoy kampa itoka Almón-diblataim.

⁴⁷Kemaj okiskej Almón-diblataim, niman onochachantitoy ipan on tepemey Abarim yejuan nokaua kampaka ikisayan tonaltsintli de on tepetl Nebo.

⁴⁸Kemaj okiskej ipan on tepemey Abarim, niman onochachantitoy ipan on ixtlauatl de Moab nisiu on río Jordán, ixpan on ueyikalpan Jericó. ⁴⁹Kemaj onochachantitoy nisiu on río Jordán ipan on ixtlauatl Moab, desde Bet-jesimot hasta Abel-sitim.

Tlanauatijli de kenijki kixexeloskej on tlajli Canaán

⁵⁰Ipan on ixtlauatl Moab nisiu on río Jordán, ixpan on ueyikalpan Jericó, toTEKO okinots Moisés, niman okijlij:

⁵¹“Ijkin xkinmijli on israelitas: Ijkuak nenkipanoskej on río Jordán niman nenkalakiskej ipan on tlajli Canaán, ⁵²xkinkixtikan nochimej on yejuan nemij ipan on tetlalpan. Xkinxotonikan nochi imindioses yejuan tlamachijchijtin ikan tetl, noso ikan tepostli. Niman xkinxotonikan nochi intlaixpanuan* inkuapan on

tepetsitsimej. ⁵³Xmoyaxkatikan on tlajli niman ompa xmochantikan, pampa nejua nemechmaktilia para nemoyaxka* yes. ⁵⁴Pero on tlajli noneki nenkixexeloskej ikan suertes intech on clanes* de nochimej on tribus*. On clanes yejuan kimpiyaj más miyekej tlakamej, más ueyi tlajli nenkinmakaskej, niman on clanes yejuan xmás kimpiyaj miyekej tlakamej, xmás ueyi nenkinmakaskej imintlal. Cada tribu* kiselis ken kixtiskej ipan on sorteo.

⁵⁵“Pero tla nemejuamej xnenkinkixtiaj on yejuan chantij ipan on región, on yejuan ompa nokauaskej sanoyej mechpajsoloskej ijkuak nemejuamej ompa nenchantiskej, ken itlaj ajuatl yejuan kalakis ipan nemixtololojuan noso ken sen uitstli yejuan tlalaktias ipan nemotlalnakayo. ⁵⁶Tla ijkon, nejua nemechcastigaros ken niknemiliaya nikincastigaros yejuamej.”

34 ¹ToTEKO okinots Moisés niman okijlij:

²“Xkinmaka on israelitas in tlamachtiltin: Xuejkajtika nenkalakiskej ipan on tlajli Canaán yejuan nemechmakas. In yejua tlajli yejuan nemoyaxka* yes, niman in yejua yes itlamiyan:

³Kampaka Sur, on tlnamikilistli uajpeua ipan on xalpatlajkan Zin, niman yas hasta iueyitlalpan Edom. Kampaka ikisayan tonaltsintli, nemoueyitlalpan peuas kampaka Sur de on Mar Muerto, ⁴niman yas kampaka sur hasta on tlaixtli yejuan itoka Acrabim. Niman panos ipan on xalpatlajkan Zin niman ajsis hasta Cades Barnea. Kemaj panos para Hasar-adar niman kemaj hasta Asmón. ⁵De Asmón kiyeualos niman ajsitos hasta on atlautli yejuan iuan nonamiki on tlajli Egipto, niman ontlamis hasta konnamikis on Ueyi Mar Mediterráneo.

⁶Kampaka ikalakiyan tonaltsintli, itlamiyan nemotlal nonamikis iuan itempan on Ueyi Mar Mediterráneo.

⁷Kampaka norte, xtlalikan sen raya desde on Ueyi Mar Mediterráneo hasta ajsis itech on tepetl Hor, ⁸niman de on tepetl Hor hasta ikalakiyan Lebó-hamat, niman kemaj hasta Zedad.

⁹De Zedad, yas hasta Zifrón niman ontlamis itech Hazar-enán. In yejua itlamiyan yes yejuan kampaka norte.

¹⁰Itlamiyan kampaka ikisayan tonaltsintli, xtlalikan sen raya desde Hazar-enán hasta Sefam. ¹¹Niman de Sefam yas hasta Ribla achi más kampaka ikisayan tonaltsintli de Aín. Niman de Aín temos hasta on lado kampaka ikisayan tonaltsintli ipan on Ueyi Mar Cineret.

¹²Kemaj kitokas on río Jordán hasta itlamiyan on Mar Muerto.

“In naukan yejua itlamiyan yes nemopaís.”

Ijkin okinoxelouilijkej on tlajli

¹³Moisés okinmakak on israelitas in tlamachtiltin:

“In tlajli nemoxelouiliskej ikan suertes ken toTEKO yotlanauatij. In tlajli san kiseliskej on chiknauí tribu* uan tlajko yejuan xe

kiseliaj. ¹⁴Ijkon nochiuas pampa on itribu* Rubén iuan itribu* Gad niman on tlajko tribu* de Manasés yokiselijkej imintlal yejuan okinmakakej, ¹⁵ipan on okse lado de on río Jordán, kampaka ikisayan tonaltsintli yejuan onkaj ixpan on kalpan Jericó.”

¹⁶ToTEKO okinots Moisés niman okijlij:

¹⁷“On yejuan kixeloskej on tlajli yeskej on tiopixki Eleazar niman Josué, itelpoch Nun. ¹⁸Niman no xnotsakan sen tlayekanki ipan cada tribu, para tepaleuiskej kixeloskej on tlajli. ¹⁹⁻²⁸On tlakamej yejuan noneki nenkinnotsaskej yejuamej in yeskej:

Tribu

Judá
Simeón
Benjamín
Dan
Manasés,

Efraín,

Zabulón
Isacar
Aser
Neftalí

Tlayekanketl

Caleb, itelpoch Jefone
Semuel, itelpoch Amiud
Elidad, itelpoch Quislón
Buqui, itelpoch Jogli
itelpoch José Janiel, itelpoch
Efod
itelpoch José Kemuel, itelpoch
Siftan
Elizafán, itelpoch Parnác
Paltiel, itelpoch Azán
Ahiud, itelpoch Selomi
Pedaël, itelpoch Amiud.”

²⁹In tlakamej yejuamej katkaj on yejuan toTEKO okinnanuatij ma kixelouilikan on israelitas on tlajli de Canaán.

Iminherencia on levitas

35 ¹ToTEKO okinots Moisés ipan on ixtlauatl Moab itech on río Jordán yejuan onkaj ixpan on ueyikalpan Jericó, niman okijlij:

²“Xkin nauati on israelitas ika itech on inueyitlalpan yejuan kiseliskej, ompa kixtiskej seki uejueyikalpanmej para kinmakaskej on levitas, para ompa chantiskej. Niman no kinkauiliskej tlajli kampa kiminyeualtsakuaskej iminyolkauan inyeualkan on uejueyikalpanmej para ompa tlatlakuajkualtiskej. ³Ijkon on levitas kipi yaskej kampa chantiskej, niman kipi yaskej kampa kiminyeualtsakuaskej iminuakaxuan niman okseki inyolkauan. ⁴On kampa kiminyeualtsakuaskej iminyolkauan nenkinmakaskej 450 metros de itech on tepantli yejuan kiyeualojtok cada ueyikalpan. ⁵Kampa kimintlakuajkualtiskej iminyolkauan cuadrado yes, niman kipi yas 900 metros ipan cada lado. In kijtosneki, sano ichkich yes kampaka ikisayan tonaltsintli, niman kampaka ikalakiyan

tonaltsintli, kampaká norté, niman kampaká sur. Ijkon on kampa kimintlakuajkualtiskej iminyolkauan kiyeualojtos on ueyikalpan.

⁶De on uejueyikalpanmej yejuan nenkinmakaskej on levitas, chikuasen yeskej kampa nomanauilos. Ompa uelis niyanas yakaj yejuan temiktia. Aparte de in chikuasen uejueyikalpanmej, nenkinmakaskej okse 42 uejueyikalpanmej. ⁷Nochi kech nenkinmakaskej on levitas 48 uejueyikalpanmej, cada se kipiya on kampa kiminyeualtsakuaskej iminyolkauan. ⁸Sen tribu* yejuan ueyi, kimakaskej más miyek uejueyikalpanmej para on levitas, niman sen tribu* yejuan xueyi, kimakaskej xmiyek uejueyikalpanmej para on levitas.”

On uejueyikalpanmej kampa nomaniuilos

(Dt 19.1-13; Jos 20.1-9)

⁹Niman toTEKO okijlij Moisés: ¹⁰“Ijkin xkinmijli on israelitas: ‘Ijkuak kipanoseskej on río Jordán para kalakiskej ipan on tlajli Canaán, ¹¹noneki kitlapejpeniskej keski uejueyikalpanmej yejuan imintoka yes ‘Nomanauiloyan’, kampa sen tlakatl uelis nomanauis yejuan xsan teyokolis temiktis. ¹²Niman ompa xuelis itlaj kichiuilis on yejuan ken kita on mikatsintli tla yejua kinekis kuepiltis tlen okichiu. Ijkon on temiktijketl xuelis kimiktiskej ijkuak xe kiyolkuitiaj on jueces imixpan on israelitas. ¹³De on uejueyikalpanmej yejuan notemakaskej, chikuasen yes para kampa uelis nomanauilos. ¹⁴Yeyi ueyikalpan onyas ipan on lado de on río Jordán kampaká ikisayan tonaltsintli, niman on okse yeyi onyas ne Canaán. ¹⁵In chikuasen uejueyikalpanmej yeskej para kampa uelis niyanaskej para nomanauiskej nochimej yejuan israelitas, niman para on yejuan xchanejkej yejuan chantij nemouan noso yejuan nemiskej san keski tonajli nemouan. Ompa uelis niyanaskej nochimej yejuan xsan teyokolij temiktiaj.

¹⁶⁻¹⁹“Tla yakaj kimailia sen tlakatl ikan itlaj tepostli, noso tetl, noso kojtlí, niman on yejuan okimailijkej omik, tla ijkon, on tlakatl yejuan otemailij nochiuas sen temiktijketl, niman ika onkaj nenkimiktiskej.

²⁰“Tla yakaj kimapeua sen tlakatl pampa sanoyej kitlauelita, noso kimotla itlaj ika para ma nokoko, ²¹noso kimajmailia ika matli niman on yejuan okimajmailijkej miki, tla ijkon, on yejuan otekokoj ika onkaj kimikiskej pampa onochiu sen temiktijketl. On yejuan más nisiu ken kita on mikatsintli noneki kimiktis on temiktijketl ijkuak kinextis.

²²“Pero san ma tikonijtokan ika yakaj kimapeua sen tlakatl niman xsan kineki, noso tla kuatemotla itlaj ika, maski xkinekiya ijkon kichiuiulis. ²³Noso san ma tikonijtokan ika xokitak ijkuak okontlajkal sen tetl yejuan uelis temiktis, niman on tetl ouets

ipan on tlakatl niman kimiktia, maski on tlakatl xkitlaueilitaya niman xkinekiya kimiktis. ²⁴Tla ijkon, on israelitas yejuan kiyolkuitiskej on yejuan otemiktij, kisepanitaskej on tlen kijtous on tlanauatijli, niman kenijki uelis kimanauiskej on temiktijketl itech on yejuan ken kita on mikatsintli yejuan kimiktisnekis.

²⁵On israelitas noneki kimanauiskej on temiktijketl itech on yejuan ken kita on mikatsintli yejuan kineki kimiktis. Noneki oksejpa kititlaniskej ipan on ueyikalpan nomanauiloyan kampa onomanauitoya. On yejuan otemiktij noneki nokauas ipan on ueyikalpan nomanauiloyan hasta mikis on ueyi tlayekanki tiopixki. ²⁶Pero tla on tlakatl yejuan temiktia kisa ipan on ueyikalpan kampa nomanauiloyan, ²⁷on yejuan ken kita on mikatsintli xkiptiyas tlajtlakojli tla kinextia niman kimiktia. ²⁸On yejuan otemiktij noneki nemis ipan on ueyikalpan nomanauiloyan hasta mikis on ueyi tlayekanki tiopixki. Sakin, uelis nokuepas ipan itlal.

²⁹In tlanauatiltin yeskej para nemejuamej sen ley yejuan nochipa onyas para nochimej on tatajtin niman para iminuejkekoneuan yejuan tlakatitiaskej, san kanon kampa nemejuamej nenchantiskej.

Leyes para kenijki yakaj kimanauiskej noso kimiktiskej

³⁰Tla sen tlakatl otemiktij, san uelis kimiktiskej tla nemij omemej noso más testigos, yejuan kijtoskej ika okitakej ken onochiu. Pero tla san se testigo nemi yejuan okitak ken onochiu, xuelis nenkimiktiskej on temiktijketl.

³¹Xuelis nenkiseliskej itomin sen tlakatl yejuan otemiktij para nomanauis. On tlakatl, ika onkaj mikis.

³²No ijki, xuelis nenkiseliskej itomin on temiktijketl yejuan nemi ipan on ueyikalpan kampa nomanauiloyan para nenkauiliskej ma nokuepa ichan ijkuak xe miki on ueyi tlayekanki tiopixki.

³³Maka nenkijtlakoskej ikan temiktilistli on tlajli kampa nenchantiskej, pampa on temiktilistli kijtlakoua on tlajli. Niman xonkaj chipaualistli ipan on tlajli tla xkimiktiaj on temiktijketl'

³⁴Maka nenkijtlakoskej on tlajli kampa nenchantiskej niman kampa nejua no nichantis, pampa nejua nemoTEKO ninemi nemouan."

Iminherencia on siuamej

36 ¹On tlayekankej ipan on familias yejuan kisaj itech iclanes Galaad yejuan itelpoch Maquir, ixuiu Manasés niman ika okpa ixuiu José, okitatoj Moisés iminuan on oksekimej intlayekankauan on israelitas. Niman ijkín okinmijlijkej:

²—ToTEKO otlanauatij ika tejua Moisés tikxelos on tlajli ikan suertes para tikinmakas on israelitas. Niman no omitsnauatij ika on tlajli yejuan kitocarouaya tokniu Zelofehad ijkuak mikis xkinmaka ichpochuan. ³Pero tla yejuamej nonamiktiskej iuan tlakamej de okse tribu* israelita, on tlajli yejuan kiseliskej, xok iyaxka* yes totribu, yej panos intech on sekimej iuejkakoneuan yejuan inuan nonamiktiskej. Tla ijkon nochiuas, techkuilijtiaskkej totlal yejuan techmakaskej. ⁴Kemaj ijkuak yejkos on xipan de tlamakaualistli intech on israelitas, on tlajli yejuan inyaxka on siuamej xok toyaxka yes, niman itech nokauas on okse tribu* kampa kisaj on tlakamej yejuan inuan nonamiktiskej.

⁵Kemaj Moisés okinmijlij on israelitas in tlanauatiltin yejuan toTEKO okinauatij:

—On tlakamej de itribu* José kuajli tlen kijtouaj. ⁶ToTEKO kinkauilis ichpochuan Zelofehad ma nonamiktikan san akinon iuan kinekiskej, tla iminueentsitsiuan no kisaskej ipan on itribu* Manasés ken yejuamej. ⁷On tlajli yejuan cada israelita yokitocaroy xuelis panos ipan okse tribu. Ijkon nochiuas pampa nochimej on israelitas noneki nochipa kipiyskej on tlajli yejuan itribu* okiselij. ⁸Tla sen siuatl kiselias sen tlajli, ika onkaj nonamiktis iuan sen tlakatl yejuan kisa sa no ipan itribu. Niman ijkon cada israelita uelis ika nokauas on herencia yejuan okiselij de itajuan. ⁹Nion se tlajli yejuan kiselij ken herencia xpanos ipan okse tribu. Niman cada tribu* intech on israelitas nochipa kipiys on tlajli yejuan okiselij ken herencia.

¹⁰Yejua ika, ichpochuan Zelofehad okichijkej nochi on tlen toTEKO okinauatij Moisés. ¹¹Maala, Tirsa, Hogla, Milca niman Noa, ichpochuan Zelofehad, ononamiktijkej iuan imimprimos yejuan tekoneuan itech imintiojuan on yejuan ikniuan imintataj. ¹²Ijkon tej, iminueentsitsiuan kisayaj ipan itribu* Manasés yejuan katka ikoneu José. Yejua ika, on tlajli yejuan okiselijkej onokau ipan itribu* Manasés ken kitocaroua.

¹³In yejua tlanauatiltin niman tlamachtiltin yejuan toTEKO okinmakak on israelitas itechkopa Moisés ne ipan on ixtlauatl Moab, nisiu itech on río Jordán, ixpan on ueyikalpan Jericó.